

DIDZA' DXI'A BUZÚAJË' MATEO

*Yugu' xuz xinë'e gudödi queë' Jesús
(Lc. 3:23-38)*

¹ Ni ruzúaja' lágaquië' xuz xinë'e gudödi queë' Jesucristo. Nabábagaquië' David, enca' Abraham xuz gudödi queë'.

² Abraham gúquië' xuzë' Isaac.

Isaac gúquië' xuzë' Jacob.

Jacob gúquië' xúzgaquië' Judá, en yugu' bönni' bõchë'ë.

³ Judá gúquië' xúzgaquië' Fares, en Zara, ate' Tamar gúcanu xiná'agaquië'.

Fares gúquië' xuzë' Esrom.

Esrom gúquië' xuzë' Aram.

⁴ Aram gúquië' xuzë' Aminadab.

Aminadab gúquië' xuzë' Naasón.

Naasón gúquië' xuzë' Salmón.

⁵ Salmón gúquië' xuzë' Booz, ate' Rahab gúcanu xinë'ë.

Booz gúquië' xuzë' Obed, ate' Rut gúcanu xinë'ë.

Obed gúquië' xuzë' Isaí.

⁶ Isaí gúquië' xuzë' David.

David na' gunná bé'enë' bönachi Israel, ate' but-saga ná'alënë'-nu nigula na' gúcanu zí'alö nigula queë' Urías, ate' David, en nigula ni guláquië' xuz xinë'ë Salomón.

⁷ Salomón gúquië' xuzë' Roboam.

Roboam gúquië' xuzë' Abías.

Abías gúquië' xuzë' Asa.

⁸ Asa gúquië' xuzë' Josafat.
 Josafat gúquië' xuzë' Joram.
 Joram gúquië' xuzë' Uzías.

⁹ Uzías gúquië' xuzë' Jotam.
 Jotam gúquië' xuzë' Acaz.
 Acaz gúquië' xuzë' Ezequías.

¹⁰ Ezequías gúquië' xuzë' Manasés.
 Manasés gúquië' xuzë' Amón.
 Amón gúquië' xuzë' Josías.

¹¹ Josías gúquië' xúzgaquië' Jeconías, en yugu' bönni'
 böchë'ë.

Yugu' bönni' ni gula'cu'ë dza ni' cate' yugu' bönni'
 Babilonia gula'chë'ë bönachi Israel nadzúngaca lu
 xiyúgaquië'.

¹² Jeconías gúquië' xuzë' Salatiel.
 Salatiel gúquië' xuzë' Zorobabel.

¹³ Zorobabel gúquië' xuzë' Abiud.
 Abiud gúquië' xuzë' Eliaquim.
 Eliaquim gúquië' xuzë' Azor.

¹⁴ Azor gúquië' xuzë' Sadoc.
 Sadoc gúquië' xuzë' Aquim.
 Aquim gúquië' xuzë' Eliud.

¹⁵ Eliud gúquië' xuzë' Eleazar.
 Eleazar gúquië' xuzë' Matán.
 Matán gúquië' xuzë' Jacob.

¹⁶ Jacob gúquië' xuzë' José.

José ni gúquië' bönni' queënu María, ate' María ni
 gúcanu xinë'ë Jesús, lë' ca' Cristo, Bönni' na' tun löza
 bönachi judío guidë' idinná bé'enë' légaquië'.

¹⁷ Caní naca, gulaca chidá' cö' di'a dza ga gusí
 lo zoë' Abraham ga bidxintë zoë' David, ate' gu-
 laca ca' ia'chidá' cö' di'a dza ga gusí lo zoë' David
 ga bidxintë dza yugu' bönni' Babilonia gula'chë'ë

bönachi Israel nadzúngaca, ate' gulaca ca' ia'chidá' cö' di'a dza ga gusí lo dza ni' gula'chë'ë léguequi ga bidxintë dza guljë' Cristo.

Yugu' le guca cate' guljë' Jesucristo
(Lc. 2:1-7)

¹⁸ Caní guca cate' guljë' Jesucristo. Cate' ni' chinazí' lu ná'abi' María, xinë'ë Jesucristo utsaga ná'alenbi' José, en zí'atëlö cate' si' utsaga ná'alenë'-bi', en cabí ne sóalenë'-bi', guyú'ubi' tubi' bí'ido' lë'ëbi' María na'. Guca caní ni'a que yöl-la' huáca queë' Dios Bö' Lá'ayi. ¹⁹ Náquië' José na', bönni' queëbi' María, bönni' tsahui', pero bití' gú'unnë' uzéguië'-bi' didza' lógaca bönachi. Gú'unnë' ulá'alenë'-bi' bagáchi'sö. ²⁰ Tsanni ni' rizá' ládxe'ë José ca na' gunë', buluí'i lahuë' gubáz lá'ayi queë' Xanru' lahuë' José lu yëla bëchigal, en gudxë' lë':

—José, zxi'ini zxi'sóë' David. Bití' gádxinu' si'u-bi' María, para gácabi' nigula quiu', tu' yú'ubi' bi'i bönni'do' lë'ëbi' ni'a que yöl-la' huáca queë' Dios Bö' Lá'ayi. ²¹ Gáljabi' tubi' bi'i bönni'do' queëbi', ate' gu'u labi' Jesús, tu' usölábi' bönachi queëbi' lu dul-la' nabága'gaca.

²² Caní guca yúgu'të lë ni para gaca lë na' gunné' Xanru' lu ru'ë bönni' bë'ë didza' uláz queë' Dios, gunné':

²³ Buli'yútsöca', tu nigula ra'bando',
tsú'ubi' bí'ido' lë'ëbi',
ate' gáljabi' tubi' bi'i bönni'do',
ate' ilu'ë labi' Emanuel.

Emanuel naca tu didza' hebreo le rnna: Len rë'u Dios.

24 Cate' bubanë' José lu yëla bëchigal, benë' ca na' gudxë' gubáz lá'ayi queë' Xanru' lë', ate' guzxi'ë-bi' María, ate' gúcabi' nigula queë'. 25 Biti' guzóalenë'-bi' cate' bidxinrö dza chigúlajbi' bi'i bönni'do' queëbi', bi'i zí'alö queëbi', ate' gulu'ë labi' Jesús.

2

Bönni' ta'yéajni'inë' ridiyúgaquië' bí'ido' Jesús

1 Cate' gúljabí' Jesús lu yödzo Belén, luyú Judea, rinná bë'ë Herodes luyú ni', ate' bila'dxinë' bönni' ta'yéajni'inë' Jerusalén, narúajgaquië' tu yödzo dë saca' ga rilén gubidza. 2 Gula'nabë' bönni' ni, ta'nnë':

—¿Gazxi zóabi' bí'ido' na' ral-la' inná bé'ebi' bönachi judío, bí'ido' na' si' gúljabí'? Cate' ni' zóatu' ga rilén gubidza bilé'etu'-ba' böläj bení' naca bë' chigúlajbi', ate' za'tu' ni para tseaj ládxi'tu'-bi'.

3 Cate' gúquibe'enë' Herodes, bönni' rinná bë'ë, lë ni, gurö'ödë' böniga, en lësca' caní gula'bö' böniga yúgu'të bönachi nacuá' Jerusalén. 4 Ní'irö Herodes na' bulidzë' yúgu'të bixúz unná bë', len bönni' yudo' tu'sedinë', ate' gunábinë' légaquië' gazxi ralla' galjé' Cristo, bönni' na' tunë' löza bönni' judío ilá lahuë' para inná bé'enë' légaquië'. 5 Të' lë':

—Lu yödzo Belén luyú Judea. Caní naca tu' buzúajë' tu bönni' bë'ë didza' uláz queë' Dios le rnna caní:

6 Biti' nácarö cá'asö yödzo Belén luyú Judá lahuë' Dios ca nacagaca yödzo gapa nacuá' nupa ta'nná bë' luyú ni, tu' irúajë' tu bönni' yödzo Belén, en gáquië' lo,

bönni' na' gun chi'ë bönachi Israel quia'.

⁷ Ní'irö Herodes bulidzë' bagáchi'sö bönni' ta'yéajni'inë' na', en gunábinë' légaquië' para inózinë' dxi'a gáca'xte chiguca buluí'i lahui bölaj na' bila'lé'enë'. ⁸ Ní'irö gusöl-lë'ë légaquië' tsöjáquië' Belén. Rë' légaquië':

—Guli'tséaj ni', en guli'tsöjnaba dxi'a nacxi naca queébi' bí'ido' na'. Cate' chibidzölili'-bi', ididíxjöi'ili' neda', para tseja' ca' neda', tseaj ládxa'a-bi'.

⁹ Gudödi bila'yönnë' didza' bëë Herodes na', söjáquië' bönni' ta'yéajni'inë' na', ate' bölaj na' bila'lé'enë' cate' ni' nacu'ë ládzagaquië' söjnöruba' lógaquië' ga bidxintë yöjsóa ga na' dëbi' bí'ido' na'. ¹⁰ Cate' bila'lé'enë' bölaj na', bulu'dzëjade'enë'. ¹¹ Cate' gula'yázië' yu'u, bila'lé'enë'-bi' bi'i bönni'do' na', zóalenbi'-nu María, xiná'abi'. Bulu'zóa zxíbigaquië' lobi', en gula'yéaj ládxi'gaquië'-bi'. Gudödi na' gula'saljë' yugu' yöxaj quégaquië', ate' bulu'nödzjë' queébi' oro, en yalaj, en nörido' rilá' zxixi que yaga mirra. ¹² Tu' chibuzéajni'inë' Dios légaquië' lu yëla bëchigal para cabí tsöjhuöjquië' ga zoë' Herodes na', que lë ni na' yöjhuöjquië' ládzagaquië' nöza yúbölö.

José, en María, ta'chë'ë-bi' Jesús luyú Egipto

¹³ Gudödi bulu'zë'ë yugu' bönni' ta'yéajni'inë' ni', buluí'i lahuë' tuë' gubáz lá'ayi queë' Xanru' lu yëla bëchigal, ga na' dë' José, en rë' lë':

—Guyaschi. Guchë'-bi' bí'ido' ni, enca' xiná'abi', ate' buzxunnaj ni. Guyéaj luyú Egipto, ate'

ugá'anu' ni' cate' guiéra' li' ia'tú. Caní gunu' tu' uguiljē' Herodes bí'ido' ni para gútiē'-bi'.

¹⁴ Ní'irō guyasē' José, en ni' naca chi'i dzō'ölō, guchē'ē-bi' bí'ido' na', enca' xiná'abi', ate' yōjáquiē' luyú Egipto. ¹⁵ Bulu'gá'anē' ni' cate' gútirē' Herodes. Caní guca para gaca lē na' gunné' Xanru' Dios lu ru'ē tu bönni' bē'ē didza' uláz queē', gunné': "Ga naca luyú Egipto bulidza' Zxí'ina'."

Risöl-lē'ē Herodes bönni' ilútiē'-bi' bi'i huē'ēnido' nacué'abi' yōdzō Belén

¹⁶ Cate' gúquibe'enē' Herodes biti' gulunē' bönni' ta'yéajni'inē' ca rnnē', gulénē', ate' gunná bé'enē' bönni' tsōjáquiē' ni' para ilútiē'-bi' yúgu'tēbi' bi'i bönni'do' nacué'abi' yōdzō Belén, en idú gásibi'ilō ga dē Belén na', yugu' bí'ido' chiyú'ugacabi' chopa iz, en bí'ido' nahuē'ēnigacarōbi'. Caní benē' ca busáquiē' queē' Herodes na', tsca chiguca dza bulu'i lahui böljaj na', dza na' bulu'zéajni'inē' bönni' ta'yéajni'inē' na' lē'. ¹⁷ Caní guca, bidxín lē na' gunné' Jeremías, bönni' bē'ē didza' uláz queē' Dios, gunné':

¹⁸ Lu yōdzō Ramá riyōn chí'igaca

nupa ta'bōdxi, en nupa ta'bōdxi yechi'.

Raquel ribōdxinu ni'a quégacabi' zxi'ininu.

Biti' gaca nu huē tsahui' lēnu, tu' chinátigacabi'.

¹⁹ Gudōdi gútiē' Herodes na', ní'irō bulu'i lahuē' gubáz lá'ayi na' queē' Xanru' lu yēla béchigal lahuē' José ga ni' zoē' luyú Egipto, ate' rē' lē':

²⁰ —Guyasa. Guchē'-bi' bi'i bönni'do' ni, enca' xiná'abi', ate' böaj luyú Israel, tu' chigulátiē' bönni' ni' gulē'ēnnē' ilútiē'-bi' bi'i bönni'do' ni.

21 Ní'irö guyasë' José, ate' guchë'ë-bi' bi'i bönni'do' na', enca' xiná'abi', ate' yöhuøjquië' luyú Israel. 22 Cate' gúquibe'enë' José rinná bëë Arquelao luyú Judea tu' chigútië' Herodes, xuzë' Arquelao na', que lë ni na' gúdxinë' José huøjë' ni'. Cate' buzéajni'inë' Dios lë' lu yëla bëchigal, guyijë' luyú Galilea. 23 Cate' bidxinë' ni', yöjsóë' lu yödzö Nazaret. Caní guca para gaca lë na' gula'nnë' yugu' bönni' gulu'ë didza' uláz queë' Dios ca ral-la' gaca queë' Jesús, si' Lë', Bönni' Nazaret.

3

Juan, bönni' ruquilë' bönachi nisa runë' libán lu lataj cá'asö

(Mr. 1:1-8; Lc. 3:1-9, 15-17; Jn. 1:19-28)

1 Yugu' lu dza ni' buluí'i lahuë' Juan, bönni' na' buquilë' bönachi nisa, en runë' libán lu lataj cá'asö luyú Judea. 2 Juan na' rnnë':

—Buli'bí'i ládxi'li', tu' chizóa idxín dza idinná bë' Nu na' zoa yehua' yubá luyú ni.

3 Ca naca queë' Juan na', buzúajë' Isaías, bönni' bë'ë didza' uláz queë' Dios dza ni'të, le rnna caní:

Riyön chi'ë bönni' rulidzë' lu lataj cá'asö, rnnë':

“Buli'pá'a nöza para idxín Xanru' ga zóali'.

Guli'béaj li yugu' nöza lasi tödë' lu icja ládximo'oli'.”

4 Nácuë' zxë' Juan lari' néquini lítsa'ba' böa', ate' núguë'ë lë'ë le néquini guídi. Rahuë'-ba' böchi'zu, en re'jë' bidxindo' que buzdo'. 5 Yugu' bönni' yödz Jerusalén len bönachi narúajgaca idú luyú Judea, en idú gásibi'ilö ga dë yegu Jordán bila'dxinë' ga zoë' Juan na'. 6 Cate' gula'xóalëpë' dul-la'

nabága'gaquië', Juan na' buquilë' légaquië' nisa lu yegu Jordán na'.

⁷ Cate' bilé'enë' Juan ta'dxinë' zián bönni' yudo' fariseo len yugu' bönni' yudo' saduceo ga zoë' para ila'dilë' nisa, gudxë' légaquië':

—Libi'ili', di'a dza quégacaba' bëla sínia'. ¿Zoa nu buzéajni'i libi'ili' para izxúnnajli' yöl-la' rusiúdxina' si' gaca quégaca bönachi? ⁸ Guligún le gaca bë' chibubí'i ládxi'li'. ⁹ Biti' cuéqui ícjali', biti' innali' nácali' tsahui' tu' naca Abraham xuz gudödi queëli'. Rea' libi'ili', huáca gunë' Dios ga ulu'huóaca yugu' guiöj nacua' ni di'a dza queë' Abraham. ¹⁰ Chizóa riböza guië huága para ichugu yugu' yaga le rulu'i ca gaca queëli'. Yúgu'të yaga bití' ta'bía le naca dxi'a, irúgugaca, ate' ila'gu'ë léguequi lu guí. ¹¹ Le nácatë neda' ruquila' libi'ili' nisa lu nisa, núlöli' chibubí'i ládxi'li', pero Bönni' na' ral-la' guidé' cate' tödi quia' neda', Lë' gunë' le rulu'isö yöl-la' ridila nisa ni, uchízië' libi'ili' Dios Bö' Lá'ayi len guí' queë'. Bönni' ni nácatërë' lo ca neda', ate' neda' bití' naca' lesaca' ilecja' xiráchuë' nudë'ë. ¹² Zönë' lu në'ë böcö' queë', le ulúbinë' ga ridxi'a zxoá' xtila queë'. Cu'ë zxoá' xtila queë' lu yu'u ga ni' gun chí'ë le, pero uzégui'ë bëbu que lu guí, ate' guí na' bití' ca' ulu.

Ridile' nisa Jesús

(Mr. 1:9-11; Lc. 3:21-22)

¹³ Ní'irö buzë'ë Jesús luyú Galilea, ate' bidxinë' ra' yegu Jordán ga na' zoë' Juan, para idilë' nisa lu në'ë Juan na'. ¹⁴ Juan buzáguë'ë xinözë', en rë Jesús:

—Neda' ral-la' idila' nisa lu no'o Li'. ¿Za'tso' Li' quia' neda'?

¹⁵ Bubi'ë didza' Jesús, rë' lë':

—Benna lataj na'a, tu' caní ral-la' gunru' idütë le naca tsahui'.

Ní'irö Juan bë'ë Lë' lataj. ¹⁶ Cate' chinadilë' Jesús nisa, la' burúajtë' lu nisa. Ní'irö gyalaj lúzxiba lahuë' Jesús, ate' bilé'enë' ruhuötjë' Dios Bö' Lá'ayi, en bidxinë' ga na' zoë', rinë'ë ca riná'aba' gu'dödo'.

¹⁷ Ní'irö biyön chi'i nu ru'i didza' yehua' yubá, rnna:

—Bönni' ni náquië' Zxí'ina'. Nadxí'ida' Lë', en raza ládxa'a Lë'.

4

Rë'ëni Satanás tu' xihui' ibaga' Jesús dul-la'
(Mr 1:12-13; Lc. 4:1-13)

¹ Ní'irö la' guchë'të' Dios Bö' Lá'ayi Jesús lu lataj cá'asö para gata' lataj si' bë' Satanás tu' xihui' Lë'.

² Idú choá' dza choá' yëla bití' bi gudahuë' Jesús, ate' gudödi ni' ridunë'. ³ Ní'irö tu' xihui', nu na' run ga tá'baga' bönachi dul-la', bidxín ga zoë' Jesús, en rë Lë':

—Channö nacu' idú Zxí'inë' Dios, gunná na'a ulu'huöáca guiöj nacuá' ni yöta xtila.

⁴ Bubi'ë didza' Jesús, rë' le:

—Nazúaj lu guichi lá'ayi le rnna: “Calégasö yöta xtila nabánigaca bönachi, pero lësca' yúgu'të didza' ru'ë Dios nabánigaca bönachi.”

⁵ Ní'irö tu' xihui' guchë' Jesús lu yödzö lá'ayi Jerusalén, ate' budxía Lë' ga naca xitsá' ícjo'olö yudo'. ⁶ Ní'irö tu' xihui' rë Lë', rnna:

—Channö nacu' Li' idú Zxí'inë' Dios, busuladzu' cuinu' ni, tu' nazúaj lu guichi lá'ayi le rnna: Dios isöl-lë'ë gubáz lá'ayi queë' para ilún chi'ë Li', ate' ulu'chisë' Li' lu ná'agaquië', para cabí tsøjchégu'u guiøj, en cabí gunu' zi' ni'u.

⁷ Bubi'ë didza' Jesús, rë' le:

—Ia'stú nazúaj lu guichi lá'ayi, le rë bönachi, rnna: “Biti' ugunu' dxin Xanu' Dios.”

⁸ Ní'irö tu' xihui' guchë' Jesús ga naca tu lu guí'a sibi, ate' ni' buluí'i Lë' yúgu'të yödzö nacua' yödzölió ni, en yúgu'të yöl-la' tsahui' quéguequi.

⁹ Ní'irö rë Lë':

—Yúgu'të lë ni udöda' lu no'o channö uzóa zxibu' lahua', en gunu' neda' zxön.

¹⁰ Jesús rë' le:

—Böaj quiu' li', Satanás tu' xihui', tu' nazúaj lu guichi lá'ayi le rë netu', rnna: “Xanu' Dios tseaj ladxu'u, en udödi cuinu' lu na' tuzë' Lë'.”

¹¹ Ní'irö buzá' Satanás tu' xihui' ga na' zoë' Jesús, ate' gubáz lá'ayi queë' Dios bila'dxinë' ga zoë', en gulácalenë' Lë', en gula'gu'ë le gudahuë'.

Risí lahuë' Jesús runë' libán luyú Galilea

(Mr. 1:14-15; Lc. 4:14-15)

¹² Cate' biyönnë' Jesús nadzunë' Juan lidxi guié, guyijë' luyú Galilea. ¹³ Buzë'ë yödzö Nazaret, ate' yöjsöë' lu yödzö Capernaum ga naca ra' nísado', lu buzá' quégaca bönachi Zabulón, en bönachi Neftalí.

¹⁴ Caní guca, bidxín lë na' gunné' Isaías, bönni' bë'ë didza' uláz queë' Dios, gunné':

¹⁵ Luyú Zabulón, en luyú Neftalí,

la' nöza ra' nísado' ia'tsölá'a yegu Jordán saca' ga rilén gubidza.

Luyú Galilea, ga nacuá' bönachi biti' nácagaca judío.

¹⁶ Bönachi chul-la niti ni' bila'lé'e bení',
ate' bönni' ni' nácagaquië' ca nupa chinátigaca,
gulén quégaquië' bení'.

¹⁷ Cate' ní'irö gusí lahuë' Jesús runë' libán, en rë'
bönachi ni':

—Buli'bí'i ládxi'li', tu' chizóa idxín dza idinná bë'
Nu na' zoa yehua' yubá luyú ni.

*Jesús rulidzë' tapë' bönni' uzxön böla para
tsöjtá'gaquië' Lë'*

(Mr. 1:16-20; Lc. 5:1-11)

¹⁸ Cate' gudë' Jesús ra' nísado' que Galilea,
bilé'enë' chopë' bönni'. Tuë' lë' Simón, en zoa ia'tú
lë' Pedro, ate' dzáguië' Andrés, bönni' böchë'ë, lë'.
Chopë' ni ta'chiljë' yöxaj böla quégaquië' lu nísado'
na' tu' nácagaquië' uzxön böla. ¹⁹ Jesús rë' légaquië':

—Guli'dutá' neda', ate' guna' ga ichë'ëli' bönachi
quia', gunli' ca runli' rizönli'-ba' böla.

²⁰ Chopë' ni la' bulu'cá'anatë' yugu' yöxaj böla
quégaquië', ate' sōjácalenë' Jesús.

²¹ Cate' gudödë' Jesús ia'lati' ní'ilö, bilé'enë'
ia'chopë' bönni'. Tuë' lë' Jacobo, ate' dzáguië'
Juan, bönni' böchë'ë lë'. Nácagaquië' xzí'inë' Zebe-
deo. Nacu'ë lë'e bárcodo' dzágagaquië' Zebedeo,
xúzgaquië', en tu'únë' yöxaj böla quégaquië'. Ní'irö
Jesús bulidzë' chopë' ni para tsöjtá'gaquië' Lë'.

²² La' bulu'cá'anatë' bárcodo' na', enca' xúzgaquië',
ate' sōjácalenë' Jesús.

Jesús rusédinë' bönachi zían

(Lc. 6:17-19)

²³ Gudë' Jesús idú luyú Galilea, rusédinë' bönachi
gapa naca lu yu'u ga tu'dubë' bönni' judío, en

tu'sedë' queë' Dios. Benë' libán ni' que didza' dxi'a ca si' idinná bē'ë Dios luyú ni', en bunë' yúgu'të nupa te'e tsa naca yödzo'huë' té'eguequi. ²⁴ Guzë didza' que yöl-la' huáca queë' Jesús, ate' bila'yöni bönachi idú luyú Siria, ate' dujuá'gaquië' yúgu'të bönni' té'enë' zían yödzo'huë' que queëgaquië', en ta'guí' ta'zaquië', ga zoë' Jesús. Dujuá'gaquië' ca' yugu' bönni' yú'ugaquië' bö' xihui', en yugu' bönni' té'enë' huë' xjote', en yugu' bönni' nacú'unigaquië' bin ni'a ná'agaquië', ate' Jesús bunë' yúgu'të bönni' na'. ²⁵ Bönachi zían bila'rúajgaca luyú Galilea, en yugu' yödzo' Decápolis, en yödzo' Jerusalén, enca' luyú Judea, en yugu' yödzo' nacuá' ía'tsölá'alö yegu Jordán saca' ga rilén gubidza, ate' rójácalen Jesús.

5

Libán benë' Jesús ga naca lu guí'ado'

(Lc. 6:20-23)

¹ Cate' bilé'enë' Jesús bönachi zían sójácalen Lë', ní'irö gurenë' tu lu guí'ado' ga naca xitsá'alö, ate' gurö'ë lu guí'a ni'. Ní'irö bulu'dubë' bönni' usëda queë' ga zoë'. ² Gusí lahuë' rusédinë' légaquië', rnnë':

³ —Bica' ba yugu' bönni' téquibe'enë' ta'yádzjanë' le naca queë' Dios, tu' nadéli'gaquië' lataj ga rinná bē'ë Bönni' na' zoë' yehua' yubá.

⁴ Bica' ba yugu' bönni' tu'huí'ini ládxi'gaquië' tu' nabága'gaquië' dul-la', tu' huë' tsahuë'ë Dios caz légaquië'.

⁵ Bica' ba yugu' bönni' nácagaquië' nöxaj ladxi' lahuë' Dios, tu' gata' quégaquië' luyú ni.

⁶ Bica' ba yugu' bönni' ta'zë ládxi'gaquië' le naca tsahui' lahuë' Dios, ate' raca quégaquië' ca raca

quégaca nupa ta'dún, en ta'bidxi nisa, tu' gunë Dios ga ulu'zi'ë xibé lë na' ta'zë ládxi'gaquië'.

⁷ 'Bica' ba yugu' bönni' tu'huechi' ládxi'gaquië' luzá'agaquië', tu' huéchi' ládxi'ë Dios légaquië'.

⁸ 'Bica' ba yugu' bönni' naca tsahui' icja ládxi'do'gaquië', en biti' bi dul-la' nabága'gaquië', tu' ila'lé'enë' Dios.

⁹ 'Bica' ba yugu' bönni' ta'bequi dxíë' didza' bizxaj, tu' ila'zí' lágaquië' zxí'ini cazë' Dios.

¹⁰ 'Bica' ba yugu' bönni' ta'zaca' ta'gui'ë lu le ta'bía ládxi'gaca bönachi légaquië' cate' tunë' le naca tsahui', tu' dë lataj quégaquië' ga rinná bë'ë Bönni' na' zoë' yehua' yubá.

¹¹ 'Bica' ba libí'ili' cate' tu'lidza bönachi libí'ili' zi', en ta'bía ládxi'gaquië' libí'ili', ate' lu yöl-la' rizí' yë' ta'nnë' queéli' le xihui' tu' dá'ali' neda'.

¹² Buli'dzeja, en guli'chaza ládxi'li', tu' uzí'da'ali' xibé yehua' yubá. Ca raca queéli', guca quégaquië' bönni' gulu'ë didza' uláz queë' Dios, en gula'cu'ë zí'atëlö ca libí'ili', tu' gula'bía ládxi'gaca ca' bönachi légaquië'.

*Bönachi dá'gaca Cristo ilaca ca zödi', en ca bení'
(Mr. 9:50; Lc. 14:34-35)*

¹³ Gunnë' ca' Jesús:

—Libí'ili' nácali' ca zödi' luyú ni, pero channö initi zödi' na' yöl-la' siná'a que, biti' gaca gunru' ga huóaca siná'a. Bítirö naca lesaca', pero chinaca tu le chú'unaru', ate' ulu'libi bönachi le.

¹⁴ 'Libí'ili' nácali' ca bení' yödzölió ni para ulu'ili' lahui le naca queë' Dios. Ral-la' gácali' ca tu yödzö rö'ö tu lu guí'a, tu' cabí gaca igachi' yödzö na'.

¹⁵ Cate' ruquéla'ru' guí', biti' rigú'uru' le tu zxan

guí'ina, pero ruzóaru' le ga liná' para uzení' yúgu'të nupa nacuá' lu yu'u. ¹⁶ Ca na' run bení', ral-la' gunli' ca' libí'ili', güf'ili' lataj gaca bē' le nácali' lógaca yúgu'të bönachi, para cate' ila'lé'e le naca tsahui' runli', ila'gú'u-nē' Xúzili' Dios zoë' yehua' yubá yöl-la' ba.

Rusédinë' Jesús que le gunná bē'ë Dios lu nē'ë Moisés

¹⁷ Gunnë' ca' Jesús:

—Biti' guéquili' bida' para usunítia' yugu' le gunná bē'ë Moisés, o xibá na' bulu'sédinë' bönni' gulu'ë didza' uláz queë' Dios. Bida', calëga para usunítia' yugu' lë na', pero para ulu'a lahui idútë le tu'sedi lë na'. ¹⁸ Le nácatë rea' libí'ili'. Tsanni nacuá' lúxiba, en yödzölió ni, bití' tödi cá'asö nitú dídza'do', en nitú le rinná bē' xibá na', cate' gácarö yúgu'të le ral-la' gaca. ¹⁹ Que lë ni na', núti'tës bönni' quitsjë' tu xibá cuídi'do'os le zoa lu xibá na', en usédinë' bönachi para ilún caní, bönni' ni gácatërë' cuídi'do'os ca yúgu'të nupa ila'cuá' ga rinná bē' Bönni' na' zoë' yehua' yubá, pero núti'tës bönni' gunë' ca rinná bē' xibá na', en usédinë' bönachi para ilún ca' caní, bönni' ni tsëpisëtërë' ga rinná bē' Nu na' zoa yehua' yubá. ²⁰ Rea' ca' libí'ili': Channö cabí gunli' le nácatërö tsahui' ca le tunë' bönni' yudo' usedi, enca' ca tunë' bönni' yudo' fariseo, bití' ca' tsú'uli' ga rinná bē'ë Dios yehua' yubá.

Rusédinë' Jesús ca naca que nu rilé luzë'e (Lc. 12:57-59)

²¹ Gunnë' ca' Jesús:

—Chibiyónili' ca gula'nně' bönni' guta' lu ná'agaquiě' le gulě' xuz xtó'oli': "Biti' gútili' bönachi. Nu bönni' gútiě' bönachi, nabáguě'ě xíguia', ate' huadxiné' ga uchi'a usöröě' Dios lě'." ²² Na'a, neda' rea' libí'ili': Nu bönni' rileně' böchi' luzě'ě, nabáguě'ě xíguia' huadxiné' ga uchi'a usöröě' Dios lě'. Lěsca' caní, nu bönni' inně' zí'ě queě' böchi' luzě'ě nabáguě'ě xíguia' ulu'chi'a ulu'söröě' bönni' lo tu'chi'a tu'söröě' lě', ate' nu bönni' guí'ě luzě'ě: "¡Böa' canöz!" nabáguě'ě xíguia' tsöjtsu'ě lu guí' gabila.

²³ Caní naca, channö chizóa cu'u tu le unödzu' lu bucugu lá'ayi, ate' tsöjnenu' ni' zoa bizx que rileně' böchi' luzó'o li', ²⁴ bucá'ana lě na' unödzu' lu bucugu ni', en böaj lidxu'. Zí'alö yöjca'ana tsahui' le benu' queě' böchi' luzó'o, ate' ní'irö gudá unödzu' lě na' nu'u.

²⁵ Channö zoa nu bönni' rinábině' li' bi ubi'u queě', en ichě'ě li' ga uchi'a usöröě' tu bönni' li', budzágatě tsahui' bönni' na' tsanni ni' yú'ulenu' lě' nōza, para cabí udödě' li' lahuě' bönni' ruchi'a rusöröě', ate' bönni' ni udödě' li' lu ně'ě bönni' rusayjě' lidxi guí'ě, ate' lě' cu'ě li' lidxi guí'ě na'. ²⁶ Le nácatě rea' li', biti' ca' uruju' ni' cate' idxinrö dza quizxju' ga buitě le ral-lu'u.

Rusédině' Jesús ca naca que nu riguitsaj xibá que yöl-la' nutsaga na'

²⁷ Gunně' ca' Jesús:

—Chibiyónili' ca na' gula'nně': "Biti' gunu' dul-la' le riguitsaj xibá que yöl-la' nutsaga na'." ²⁸ Na'a, neda' rea' libí'ili': Núti'tēs bönni' ruyú'ě tu nigula len yöl-la' rizě ladxi' le ruá' dö', chibeně' dul-la' len lěnu lu icja ládxi'da'ahuě'.

29 'Que lë ni na', channö guiöj lo' ibëla gun ga gunu' dul-la', guléaj le, en gurú'una le. Gácarö dxi'a quiu' unítíu' tu guiöj lo', en calëga idúteo' tsöjtsú'u lu guí' gabila. 30 Channö no'o ibëla gun ga gunu' dul-la', guchugu le, en gurú'una le. Gácarö dxi'a quiu' unítíu' tu no'o, en calëga idúteo' tsöjtsú'u lu guí' gabila.

Rusédinë' Jesús ca naca que nu bönni' rulá'alenë' nigula queë'

(Mt. 19:9; Mr. 10:11-12; Lc. 16:18)

31 Gunnë' ca' Jesús:

—Lësca' gula'nnë': "Núti'tës bönni' rusanë'-nu nigula queë', ral-la' unödzejë' queënu tu guichi le rnna rulá'alenë'-nu." 32 Na'a, neda' rea' libí'ili', channö zoë' nu bönni' rusanë'-nu nigula queë', en biti' zoa le ruá' dö' runnu, gunë' bönni' na' ga gunnu dul-la' le riguitsaj xibá que yöl-la' nutsaga na' channö utsaga ná'lennu bönni' yúbölö, ate' bönni' na' si'ë-nu nigula na', lësca' gunë' dul-la' le riguitsaj xibá que yöl-la' nutsaga na'.

Rusédinë' Jesús ca naca que nu ruzötaj La la'ayi queë' Dios

33 Gunnë' ca' Jesús:

—Lësca' biyónili' ca yugu' bönni' guta' lu ná'agaquië' gulé' xuz xtó'oli', gula'nnë': "Biti' si' yë'u cate' run tsutsu xtídzu'u ni'a queë' Dios, en ral-la' gunu' lahuë' Xanru' Dios idútë lë na' run tsutsu xtídzu'u ni'a queë' Lë'." 34 Na'a, neda' rea' libí'ili', biti' ca' gun tsutsu xtídza'li'. Biti' gun tsutsu xtídza'li' ni'a que yehua' yubá, tu' naca ga rö'ë rinná bë'ë Dios. 35 Biti' gun tsutsu xtídza'li' ni'a que luyú ni, tu' naca luyú ni ca xilibi

ni'ë Dios, en calëga ni'a que Jerusalén, tu' naca ladzë' Bönni' nayëpisëtërë' rinná bë'ë. ³⁶ Biti' gun tsutsu xtídzu'u ni'a que icju', tu' cabí gaca gunu' ga huóáca chiguichi o gasaj nitú guitsa' icju'. ³⁷ Ral-la' innásili': "Ön", o innásili': "Biti'", tu' naca que tu' xihui' le nadödi bë' ca nácagaca didza' ni.

Rusédinë Jesús ca naca que nu ruzí' lëbi luzë'e
(Lc. 6:29-30)

³⁸ Gunnë' ca' Jesús:

—Chibiyönili' ca naca le gunná bë'ë Moisés, gunné': "Nu bi run que guiöj lahui luzë'e, ubí'i ca' que, enca' nu bi run que layi' luzë'e, ubí'i ca' que." ³⁹ Na'a, neda' rea' libí'ili': Biti' tá'baga'li' nu guá' dö' queëli', ate' channö nu capa' xagu' ibëla, bë' lataj capa' ca' ia'tú xagu' yögöla. ⁴⁰ Channö zoa nu gun ga uchi'a usöröë' tu bönni' li', en cuë' zxo', bë' ca' queë' lari' rixóa cúdzu'u. ⁴¹ Channö zoa nu gun bayudxi gu'u yua' que tu chi'i, guyéajlen nu na' chopá chi'i. ⁴² Nu bi rinábini li', bunödzej que, en nu bi gué'ëni gunnu' que tu chi'i, bití' tá'bagu'u lë na' inabi li'.

Rusédinë Jesús ca ral-la' idxí'iru' nupa bití' ta'lé'e
rë'u dxi'a
(Lc. 6:27-28, 32-36)

⁴³ Gunnë' ca' Jesús:

—Lësca' caní biyönili' lë na' gula'nnë': "Ral-la' idxí'inu' nu nadxí'i li', en udí'inu' nu bití' rilé'e li' dxi'a." ⁴⁴ Na'a, neda' rea' libí'ili', guli'dxí' nupa bití' ta'lé'e libí'ili' dxi'a. Guli'nábinë' Dios gácalenë' nupa tu'lidza libí'ili' zi'. Guli'gún le naca tsahui' quégaca nupa tu'dí'i libí'ili', en buli'lidzë' Dios inábili'-në' gunë' ga gaca dxi'a quégaca nupa

ta'nné queéli', en tuá' dö' queéli'. ⁴⁵ Channö gunli' caní, gácali' xzí'ini cazë' Xúziru' Dios, zoë' yehua' yubá, tu' runë' Lë' ga ruzení' gubidza queë' ga nacuá' bönachi tuá' dö', enca' ga nacuá' bönachi tsahui'. Risöl-lë'ë tu nisa guiöj lu yu quégaca bönachi tsahui', enca' lu yu quégaca bönachi biti' nácacaca tsahui'. ⁴⁶ Channö nadxí'isili' bönni' nadxí'iguesquinë' libí'ili', ¿nuzxi caz cu'u libí'ili' yöl-la' ba? Lësca' caní tunë' bönni' biti' nácacaca tsahui' na', bönni' tu'quixjë' uláz que yödzo zitu', nadxí'iguesquinë' luzá'agaquië'. ⁴⁷ Channö rugápali' Dios tuzë' böchi' luzá'ali', ¿bizxi caz runli' le nácatë'rö dxi'a? Lësca' caní tunë' bönni' biti' núnbë'gaquië' Dios. ⁴⁸ Pero libí'ili', guli'gaca idú tsahui', ca na' náquië' Xúziru' Dios, zoë' yehua' yubá, náquië' idú tsahui'.

6

Rusédinë' Jesús ca ral-la' gácalenru' bönachi

¹ Gunnë' ca' Jesús:

—Guli'güi' ládxi'li' gaca idú ca reaj ládxi'li'-në' Dios. Biti' gúnsili' lë ni lógaca bönachi para ila'lé'e ca na' runli'. Channö runli' caní, biti' bi gunnë' Xúziru' Dios zoë' yehua' yubá queéli'. ² Cate' bi unödzu' que nu bi riyadzaj, biti' gunu' ga ilá' lahui lë na' runu' ca tunë' bönni' tu'lu'isö tsahui' cuíngaquië' ga naca lu yu'u ga tu'dübë' bönni' judío, en tu'sëdë' queë' Dios, enca' ga naca lu yë'ëyi. Caní tunë' para ila'gú'u bönachi légaquië' yöl-la' ba. Le nácatë' rea' libí'ili', cá'asö naca yöl-la' ba gata' quégaquië'. ³ Pero li', cate' bi unödzu' que nu bi riyadzaj, biti' ca' gu'u lataj nu inözi. ⁴ Na'a, lë na' unödzu', bagáchi'sö ral-la' unödzu', ate' Xúziru'

Dios, Nu rilé'e ca na' runu' bagáchi'sö, Lë' ubi'ë quiu'.

*Rusédinë' Jesús ca ral-la' ulídzaru'-në' Dios
(Lc. 11:2-4)*

⁵ Gunnë' ca' Jesús:

—Cate' ulídzali'-në' Dios, biti' gunli' ca tunë' bönni' tu'lu'isö tsahui' cuíngaquië', tu' ta'yaza ládxi'gaquië' ta'zuínë' tu'lidzë' Dios gapa naca lu yu'u ga tu'dubë' tu'sëdë' bönni' judío queë' Dios, en gapa naca lu yë'ëyi para ila'lé'e bönachi légaquië'. Le nácatë rea' libí'ili', cá'asö naca yöl-la' ba gata' quégaquië'. ⁶ Pero libí'ili', cate' ulídzali'-në' Dios guli'tsaza lídxili', en buli'sayaj yu'u. Buli'lidzë' Dios inábali'-në' Xúziru' Dios, zóalenë' libí'ili' ga na' zóali' queézili', ate' Xúziru' Dios, Nu rilé'e ca runli' bagáchi'sö, Lë' ubi'ë queëli'.

⁷ Cate' ulídzali'-në' Dios biti' gunli' la' yë'ëyi la' lez ca na' tunë' bönni' biti' núnbë'gaquië' Dios, tu' téquinë' huayönnë' Dios légaquië' tu' tu'lidzë' la' yë'ëyi la' lez. ⁸ Biti' gunli' ca na' tunë' légaquië'. Xúziru' Dios, zí'atëlö cate' si' inábali'-në', chinöz quézinë' le riyadzaj queëli'. ⁹ Que lë ni na', ral-la' ulídzali'-në' Dios innali' caní:

Xuz netu', zu' yehua' yubá, gaca zxön Lo'.

¹⁰ Gudá inná bë'u luyú ni.

Ben ga gaca luyú ni ca raza ládxi'u Li' ca na' raca yehua' yubá.

¹¹ Benna le gágutu' na'a dza.

¹² Buniti lo netu' le huiá' dö' bentu' Lo' Li' ca runtu' netu', runiti lotu' nupa bi tun queëtu'.

¹³ Biti' gu'u lataj si' bë' tu' xihui' netu', pero busölá netu' lu na' nu ruá' dö'.

Nequi quiu' ga rinná bē'u, en yöl-la' unná bē', en yöl-la' ba.

Caní ré'ënitú' gácatíca'sö. ¡Ca' gaca!

¹⁴ 'Channö uniti loli' luzá'ali', nupa tuá' dö' queëli', uniti lahuë' Xúziru' Dios, zoë' yehua' yubá, libí'ili'. ¹⁵ Channö cabí uniti loli' luzá'ali', bití' uniti lahuë' Xúziru' Dios libí'ili' ca naca dul-la' nabága'li'.

Rusédinë Jesús ca ral-la' gunru' gubasa

¹⁶ Gunnë' ca' Jesús:

—Cate' gunli' gubasa, bití' gunli' bayechi' loli' ca tunë' bönni' tu'lu'isö tsahui' cuíngaquië', tu' tunë' bayechi' lógaquië' para iléquiibe'e bönachi tunë' gubasa. Le nácatë rea' libí'ili', cá'asö naca yöl-la' ba gata' quégaquië'. ¹⁷ Libí'ili', cate' gunli' gubasa, buli'pá'a ícjalí', en guli'quibi loli', ¹⁸ para cabí iléquiibe'e bönachi runli' gubasa. Bagáchi'sö ral-la' gunli' gubasa, ate' Xúziru' Dios, zóalenë' libí'ili' ga na' zóali' queëzili', Lë' ubi'ë queëli'.

Yehua' yubá ral-la' utúbiru' yöl-la' tsahui' queëru' (Lc. 12:33-34)

¹⁹ Gunnë' ca' Jesús:

—Bití' utúbili' yöl-la' tsahui' luyú ni, ga ni bëlado' que tu'töba' le, ate' raca ditaj, en ga ni ta'yaza gubán, ta'banë'. ²⁰ Buli'tubi yöl-la' tsahui' yehua' yubá, ga ni bëlado' que bití' ulu'töba' le, en bití' gaca ditaj, en ga ni' bití' ila'yázië' bönni' gubán, en bití' ila'banë'. ²¹ Ga ni' dë yöl-la' tsahui' queëli', ni gü'i ládxi'li' idxinli'.

Le rigú'u bení' icja ládxi'do'oru' (Lc. 11:34-36)

²² Gunnë' ca' Jesús:

—Guiöj loru' naca ca tu le rigú'u bení' icja ládxi'do'oru'. Que læ ni na', channö guiöj loli' naca tsahui', idútëli' tsépili' yösa bení'. ²³ Channö guiöj loli' biti' naca tsahui', idútëli' nachúl-lali'. Que læ ni na', channö bení' zóalen libí'ili' nuhuöáca le naca chul-la, yénni'tërö nachúl-lali'.

Dios, en dumí
(Lc. 16:13)

²⁴ Gunnë' ca' Jesús:

—Cuntu nu bönni' gaca gunë' xichíngaquië' chopa xanë', tu' uzóë' tuë' tsölá'alö, ate' ia'tué' na' idxí'inë', o ugá'analënë' tuë', ate' ia'tué' na' usán ládxi'ë. Biti' gaca gunli' xichinë' Dios, enca' dumí.

Dios rapa chi'ë nupa néquiquequi queë'
(Lc. 12:22-31)

²⁵ Gunnë' ca' Jesús:

—Ia'stú rea' libí'ili': Biti' ubi uguí'ili' ni'a que le gáguli' o ni'a que le guí'jali', yugu' le nabánili', o ni'a que lari' gáculi'. Nazáca'tërö yöl-la' na'bán queëli' ca le gáguli', ate' nácatërö lesaca' le nácali' ca lari' gáculi'. ²⁶ Buli'yú ca raca quégacaba' biguínido' ta'daba' lúzxiba. Biti' bi taz tu'zóaba', en biti' tu'lápaba', en biti' tu'túbiba' ga bi ila'gú'uba' quégacaba', pero Xúziru' Dios zoë' yehua' yubá, rugagu cazë' légacaba'. Nazáca'tëröli' libí'ili' ca yugu' biguínido' na'. ²⁷ ¿Nuzxi caz bönni' nútsë'ë ládjali' gaca gunë' ga soë' ibanë' ia'túz dza tu' ruúbi ruguí'inë' para gaca caní queë'?

²⁸ ¿Bizx que ruúbi ruguí'ili' ni'a que le gáculi'? Buli'yútsöca' ca raca quégaca yöjdo' rögaca la' guixi' ca ta'zxön. Biti' tun dxin, en biti' tun du lari'.

²⁹ Neda' rea' libí'ili', Salomón, bönni' ni' gunná bë'ë,

sal-la' gúta'da' yöl-la' tsahui' queë', lari' gúcuë' biti' gunná'tërö lachi ca rinná'gaca yöjdo' na'. ³⁰ Dios caz runë' lachi yöj guíxi'do', le rő'gaca la' guixi', le nacuá' na'a dza, ate' cuxó huidzaj ila'yegui lu guí'. Channö caní ruí'i ládxi'ë yöj guíxi'do', runë' léguequi lachi, gúnda'arë' ca' queéli', sal-la' biti' réajlë'ëli'-në' idú ládxi'li'. ³¹ Que lë ni na', biti' ubi uguí'ili', en biti' innali': "¿Bizxi gágutsatu'?" o "¿Bizxi guíjatsatu'?" o "¿Bizxi lari' gácutsatu'?" ³² Bönachi yödzölió ni tu'úbi tu'guí'i ni'a que yúgu'të lë ni, pero zoë' Xúziru' yehua' yubá, ate' Lë' nőzinë' naquínili' yúgu'të lë ni. ³³ Na'a, guli'güí'irö ládxi'li' inná bé'enë' Dios libí'ili', en gunli' le naca tsahui' lahuë' Lë', ate' Lë' cu'ë xinözali' yúgu'të lë ni. ³⁴ Que lë ni na', biti' ubi uguí'ili' ni'a que le ral-la' gaca cuxó huidzaj, tu' huáca güí'i ládxi'li' cuxó huidzaj le gaca queéli' dza na'. Tu tu dza ilaca le ral-la' güí'i ládxi'li' dza na'.

7

Biti' ral-la' ichugu bë'ëru' böchi' luzá'aru'
(Lc. 6:37-38, 41-42)

¹ Gunnë' ca' Jesús:

—Biti' ichugu bë'ëli' böchi' luzá'ali', para cabí ichugu bë'ë Dios queéli', ² tu' ichugu bë'ë Lë' queéli' la' leze ca na' richugu bë'ëli' queë' böchi' luzá'ali', ate' ca na' rurixi rudödili' que luzá'ali', la' cá'asö urixi udödë' Dios queéli'. ³ ¿Bizx que ruyú' bëbudo' yu'u guiój lahuë' böchi' luzó'o, en biti' réquibe'enu' yu'u le zxöntërö guiój lo' li'? ⁴ ¿Guiëtso' böchi' luzó'o: "Gulöz, cueja' bëbudo' yu'u guiój lo'", ate' li', le zxöntërö ca' yu'u guiój lo' li'? ⁵ Li', bönni

rulu'isö tsahui' cuinu'. Guléaj zí'alö le zxön yu'u guiöj lo' li', ate' ní'irö ilé'enu' tsáhui'do' para gaca cueju' bébudo' yu'u guiöj lahuë' böchi' luzó'o.

⁶Biti' güi'ili' quégacaba' bö'cu' le naca lá'ayi, para cabí ulu'huécjaba', en iláguya'aba' libí'ili', en biti' chú'unali' le naca lesaca' queéli' láhuigacaba' cuchi, para cabí ulu'zadi' ní'aba' le.

Guli'naba, guli'guilaj, en buli'lidza ra' yu'u

(Lc. 11:9-13; 6:31)

⁷Gunnë' ca' Jesús:

—Guli'naba, ate' Dios gunnë' queéli'. Guli'guilaj, ate' gunnë' lataj idzöli queéli'. Buli'lidza ra' yu'u, ate' Lë' isaljë' queéli'. ⁸Núti'tës bönni' rinabë', ridéli'në', ate' bönni' riguiljë', ridzöli queë', ate' bönni' rulidzë' ra' yu'u, ralaj queë'.

⁹Channö zoë' nu bönni' ladjali' libí'ili', ate' zóabi' bi'i queë', channö inábibi' lë' yöta xtila, ¿naru' unödzjë'-bi' guiöj? ¹⁰Channö inábibi' lë' tuba' böla, ¿naru' unödzjë'-bi' bëla? ¹¹Libí'ili' nácali' huiá' dö', pero nözili' unödzjali' zxí'inili' le naca tsahui'. Nácatëro löza, Xúzili' zoë' yehua' yubá unödzjë' nupa ta'nábini Lë' le naca dxi'a.

¹²'Que lë ni na', ca na' rë'ënili' ilún bönachi queéli', lësca' caní guli'gún quégaquië'. Lë ni naca le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios.

Tu ga ral-la' tsú'uru' le naca tsúpi'do'

(Lc. 13:24)

¹³Gunnë' ca' Jesús:

—Guli'tsáz ga nu riyaza le naca tsúpi'do'. Blaga' naca ga nu riyaza, en yalaj naca nöza le röjácalenë' bönni' ga ni' ila'nítië', ate' ta'yázië' bönni' zián ni'.

14 Tsúpi'do' naca ga nu riyaza, en lásido'os naca nöza le röjácalen bönachi ga ni' ila'deli' yöl-la' na'bán idú, ate' nabábasö nupa ta'dzöli le.

Le runru' naca bë' le nácaru'
(Lc. 6:43-45)

15 Gunnë' ca' Jesús:

—Guli'gún chi'i cuinli' para cabí ila'zí' yé'enë' bönni' ta'zí' yë'ë libí'ili', ta'nnë' tu'ë didza' uláz queë' Dios. Ila'dxinë' bönni' caní ga zóali', en ulu'luí'i cuíngaquië' nöxaj ládxi'do' ca nácagacaba' bö'cu' zxíla'do', pero lu icja ládxi'do'gaquië' nácagaquië' ca bö'cu' guí'a sínia'. 16 Yugu' le tunë' ilaca bë' le nácagaquië'. Biti' ruchíbiru' le ribía lubá uva lu yaga yötsi', en bití' ruchíbiru' le ribía yaga higo lu guixi' legui lásido'. 17 Caní naca, yúgu'të yaga dxi'a ta'bía le naca dxi'a, ate' tu yaga cabí naca dxi'a ribía le cabí naca dxi'a. 18 Yaga dxi'a na' bití' gaca cuía le cabí naca dxi'a, ate' yaga na' bití' naca dxi'a bití' gaca cuía le naca dxi'a. 19 Yúgu'të yaga bití' ta'bía le naca dxi'a ila'rugu, ate' ila'gu'ë léguequi lu guí'. 20 Caní naca, yugu' le tunë' bönni' na' ilaca bë' le nácagaquië'.

Nupa bití' ila'yázië' ga rinná bë'ë Dios
(Lc. 13:25-27)

21 Gunnë' ca' Jesús:

—Zian nupa të neda': "Xan, Xan", pero calëga yúgu'të' ila'yázië' ga rinná bë'ë Dios yehua' yubá. Ila'yázasë' ni' bönni' tunë' ca rë'ënë' Xuza' Dios, zoë' yehua' yubá. 22 Cate' idxín dza údxi que yödzölió ni, bönni' zían ilë' neda', ila'nnë': "Xan, Xan, bentu' libán que xtídzë'ë Dios, buguntu' dxin Lo', en buguntu' ca' dxin Lo' para bubéajtu' yugu'

bö' xihui', en buguntu' ca' dxin Lo' bentu' zían yöl-la' huáca zxön." ²³ Ní'irö neda' guía' légaquië': "Biti' ca' núnbë'a libí'ili'. Guli'cuíta ga zoa', libí'ili' ruá'ali' dö'."

Chopa ca gaca udxíaru' xilibi zö'ö

(Lc. 6:47-49; Mr. 1:22)

²⁴ Gunnë' ca' Jesús:

—Ia'stú ca', nu bönni' riyönnë' xtídza'a ni, en gunë' ca rna, bönni' ni náquië' ca tu bönni' réajni'inë', budxië' lidxë' ga naca lu guiöj. ²⁵ Cate' gulaj guiöjsiu', en guzxön yegu gubó'o, en guyecja bö', gudibi nisa cuita yu'u na', pero biti' gubixi, tu' dxía xilibi lu guiöj. ²⁶ Na'a, nu bönni' riyönnë' xtídza'a ni, en biti' runë' ca rna, bönni' ni náquië' ca tu bönni' biti' réajni'inë', budxië' lidxë' lu yu dzöbi. ²⁷ Cate' gulaj guiöjsiu', en guzxön yegu gubó'o, en guyecja bö', ní'irö gudá'a nisa cuita yu'u na', ate' gubíxite, en tsaz biguinnaj.

²⁸ Cate' Jesús budxi bé'lenë' légaquië' didza' ni, bulu'bani bönachi zían nacuá' ni' ca naca le rusédinë', ²⁹ tu' rusédinë' légaquië' ca tu bönni' dë lu në'ë, en calëga ca tunë' bönni' yudo' usedi quégaquië'.

8

Ruhuóáquië' tu bönni' ré'enë' huë' nudzu' ruzödi

(Mr. 1:40-45; Lc. 5:12-16)

¹ Cate' böjtjë' Jesús lu guí'a na', söjácalen bönachi zían Lë'. ² Bidxinë' tu bönni' ré'enë' huë' nudzu' ruzödi ga zoë' Jesús, ate' buzóa zxibë' lahuë' Jesús, en rë' Lë':

—Xan, channö ré'ënu', huáca unu' neda'.

³ Ní'irö Jesús la' bulitë në'ë, en gudanë' lë'. Rë' lë':

—Rě'ënda'. Huöácu' dxi'a.

La' bunítitë xihuë'ë bönni' huë' na'. ⁴ Ní'irö Jesús gudxë' lë':

—Buyú, cuntu nu guío' caní, pero guyéaj, yöjluí'i cuinu' lahuë' bixúz, ate' yöjnödzej le gunná bē'ë Moisés le uluí'i bönachi chiböácu'.

Jesús ruúnë' bi'i huen dxin queë' tu bönni' rinná bē'ë lu gudil-la

(Lc. 7:1-10)

⁵ Cate' guyázië' Jesús yödzö Capernaum, bidxinë' tu bönni' ga zoë', bönni' rinná bé'enë' tu gáyú'ë bönni' röjáquië' gudil-la, ate' gúta'yuë' lahuë' Jesús, ⁶ en rë' Lë':

—Xan, bi'i huen dxin quia' dëbi' yu'u, ré'ebi' huë' nacú'unibi' bin, ate' riguí'i rizáca'da'abi'.

⁷ Jesús rë' lë':

—Neda' guída' una'-bi'.

⁸ Bubi'ë didza' bönni' na' rinná bé'enë' bönni' röjáquië' gudil-la, en rë' Jesús:

—Xan, biti' naca' zi tsáziu' lidxa', pero tsa innasu' quia', ate' huöácabi' bi'i huen dxin quia'. ⁹ Lësca' neda', zoa nu rinná be'e neda', en nacú'ë ca' bönni' röjáquië' gudil-la rinná bé'egacada'-në'. Cate' rea'-në' tuë': “Guyéaj ni”, rejë'. Cate' rea'-në' ia'tué': “Gudá ni”, ridë'. Cate' rea'-në' bönni' huen dxin quia': “Ben dxin ni”, la' runtë' dxin na'.

¹⁰ Cate' biyönnë' Jesús didza' ni, bubáninë', ate' gudxë' bönni' söjácalenë' Lë', rnnë':

—Le nácatë rea' libí'ili', ga nacúa' bönachi Israel, cuntu nu bönni' röjxéqui'da'-në' réajlë'ë neda' ca runë' bönni' ni. ¹¹ Ia'stú rea' libí'ili': Ila'rúaj bönachi zían saca' ga rilén gubidza, en saca' ga ribía gubidza, ate' ila'bö'len tsözxön Abraham, en Isaac,

en Jacob, yehua' yubá ni' ga rinná bē'ē Dios, ¹² pero yugu' bönni' na' gurō cazē' Dios para ila'yáziē' ga na' rinná bē'ē Lē', chú'unē' légaquiē' ní'lō ga na' naca chul-la, ate' ni' ila'bōdxē', en ulu'til-la láyē'ē lu yōl-la' ruhu'ini quégaquiē'.

¹³ Ní'irō Jesús gudxē' bönni' na' rinná bé'enē' bönni' rōjáquiē' gudil-la, rnnē':

—Bōaj lidxu'. Ca na' réajlē'u, ca' gaca quiu'.

La' ná'asō bōácatēbi' bi'i huen dxin queē' na'.

Jesús ruúnē' xiná'anu nigula queē' Pedro

(Mr. 1:29-31; Lc. 4:38-39)

¹⁴ Bidxinē' Jesús lidxē' Pedro, ate' ni' bilé'enē'-nu xiná'anu nigula queē', dēnu lu da'a, en yú'unu tu xilá. ¹⁵ Gudanē' Jesús ná'anu, ate' la' burúajtē xilá na' yú'unu. Ní'irō bōásanu, en bunōdzjanu le gulahuē'.

Jesús ruúnē' zían nupa te'e

(Mr. 1:32-34; Lc. 4:40-41)

¹⁶ Cate' chiridzō' dza na', dujuá'agaquiē' zían bönni' yú'ugaca bö' xihui' légaquiē' ga zoē' Jesús, ate' len yōl-la' rinnēsō queē' bubéajē' yugu' bö' xihui' na', en bunē' ca' yúgu'tē nupa te'e. ¹⁷ Caní guca para gaca ca na' gunnē' Isaías, bönni' bē'ē didza' uláz queē' Dios, gunnē': "Lē' bu'ē yugu' le rizáca'ru', en bu'ē ca' yugu' yōdzōhuē' queēru'."

Nupa gulē'ēni tsōjácalen Jesús

(Lc. 9:57-62)

¹⁸ Cate' bilé'enē' Jesús nacué' bōnachi zían gásibi'ilē', gunná bé'enē' yugu' bönni' usēda queē' ila'dōdē' ia'tsölá'a nísado' ni'. ¹⁹ Bidxinē' tu bönni' yudo' usedi ga na' zoē' Jesús, en rē' Lē':

—Bönni' Usedi, sá'lēna' Li' gátitēs ga tseju'.

20 Jesús rē' lē':

—Yugu' böza' nacuá' zzan guiöj quégacaba', ate' yugu' biguinnido', nudxiagacaba' xicá'agacaba', pero neda', Bönni' Guljē' Bönachi, biti' dē ga quíxaj icja'.

21 Ia'tuē' bönni', náquiē' bönni' usēda queē' Jesús, gudxē' Lē':

—Xan, benna neda' lataj huöja' ga idxinrö dza chibucácha'a-nē' xuza'.

22 Jesús gudxē' lē':

—Gudá' neda'. Bē' lataj yugu' bönni' tati cazē' ulu'cáché'ē nupa ilátigaca quégaquiē'.

Jesús ribequi dxíē' bö' budunu'

(Mr. 4:35-41; Lc. 8:22-25)

23 Gurenē' Jesús lē'e bárcodo', ate' dzágagaquiē' Lē' bönni' usēda queē'. 24 Ní'irö guyecja bö' budunu' lu nísado' na', ate' riyasa ridxiada' nísado' na' ga bidxintē riyaza nisa lē'e bárcodo' na'. Dē' rásiē' Jesús lē'e barco na'. 25 Ní'irö bila'dxinē' bönni' usēda queē' Jesús ga na' zoē', ate' bulu'subanē' Lē', en tē' Lē':

—Xan, busölá netu'. Chirigáchi'ru' lu nisa.

26 Bubi'ē didza' Jesús, en rē' légaquiē':

—¿Bizx que rádxili'? Látí'do'os réajlē'ēli'-nē' Dios.

Ní'irö guyasē' Jesús, en bulidzē' bö' na' recja, en nísado' na', ate' la' gurö'ötē dxi. 27 Bulu'báninē' bönni' na', ta'nnē':

—¿Nuzxi caz bönni' ni? Ruí'sē' didza', ate' bö' recja, en nísado' tun ca rnnē'.

Yugu' bönni' Gadara yú'ugaca bö' xihui' légaquiē'

(Mr. 5:1-20; Lc. 8:26-39)

28 Cate' bidxinë' Jesús ia'tsölá'a nísado' ga na' naca lu xiyú yödzo Gadara, bila'rúajë' chopë' bönni' ga nacuá' ba quégaca nupa nátigaca, dutságagaquië' Jesús. Nácagaquië' sínia', ate' cuntu nu gaca tödi la' nöza ni'. 29 La' gulu'itë' zidzaj didza' chopë' ni, ta'nnë':

—¿Bizxi ral-la'tu' quiu', Jesús, Zxí'inë' Dios? ¿Naru' bidxintso' ni dusaca' zi'u netu' zí'aló ca idxín dza queëtu'?

30 Ga ni' nacu'ë nacuá'aba' cuchi zían ta'daba' táguba', nacuá'aba' láti'do' ga naca zi'tu'.

31 Gula'naba yechi' bö' xihui' na' Jesús, en të Lë':

—Channö ubéaju' netu', benna lataj tsöjtsú'ugacatu'-ba' cuchi zían ni'.

32 Ní'irö Jesús gudxë' léguequi:

—Guli'tséaj.

La' bila'rúajtë bö' xihui', en yöjcházagaca cuchi zían ni'.

Ní'irö yúgu'tëba' cuchi zían na' yöjbíxitégacaba' ga naca lë'e guiöj, en yöjcházagacaba' lu nísado', ga ni' gula'yépiba' nisa, en gulátiba'.

33 Guládxinë' bönni' tu'yüë'-ba' cuchi na', ate' bulu'zxúnnajë'. Cate' bila'dxinë' lu yödzo, gula'guíxjö'ë yúgu'të lë na' guca quégaquië' bönni' ni' gula'yú'u bö' xihui' légaquië'. 34 Ní'irö bila'rúaj bönachi lu yödzo ni', yöjtságagaquië' Jesús. Cate' bila'lé'enë' Lë', guláta'yüë' lahuë' uzé'ë lu xiyúgaquië' na'.

9

*Jesús ruúnë' tu bönni' nacú'unië' bin
(Mr. 2:1-12; Lc. 5:17-26)*

¹ Ní'irö bubenë' Jesús lë'e bárcodo', en gudödë' ia'tsölá'a nísado' ní', ate' budxinë' ga naca ladzë'.
² Ní' dujuá'gaquië' tu bönni' nacú'unië' bin ga zoë' Jesús, zxoë' lu da'a yaga. Cate' bilé'enë' Jesús ca na' ta'yéajlë'ë bönni' ni Lë', gudxë' bönni' na' nacú'unië' bin, rnnë':

—Butipa ládXu'u, zXí'ina'do'. Chibuníti lahua' dul-la' nabágu'u.

³ Nacu'ë ca' bönni' yudo' tu'sédinë' ni', ate' ta'nnë' lu icja ládxi'do'gaquië', ta'nnë': “Didza' ru'ë bönni' ni ruzóa Dios tsölá'alö.”

⁴ Cate' réquibe'enë' Jesús le ta'zá' ládxi'gaquië', rë légaquië':

—¿Bizx que rizá' ládxi'li' caní le cabí naca tsahui'?

⁵ Biti' naca böniga nu guiësö bönni' ni: “Yugu' dul-la' nabágu'u chibuníti lahua'”, pero naca böniga nu gun ga huöásë', en uzé'enë'. ⁶ Na'a, uluí'ida' libí'ili' neda', Bönni' Guljë' Bönachi, dë lu na'a yöl-la' unná bë' uniti lahua' dul-la' luyú ni.

Ní'irö Jesús gudxë' bönni' na' nacú'unië' bin, rnnë':

—Guyása. Buchisa da'a yaga quiu', en böaj lidxu'.

⁷ Ní'irö la' guyásatë' bönni' na' nacú'unië' bin, en böajë' lidxë'. ⁸ Cate' bila'lé'enë' bönni' nacu'ë ni' lë ni, bulu'báninë', ate' gula'gu'ë Dios yöl-la' ba tu' bunödZjë' yöl-la' huáca caní quégaca bönachi.

Jesús rulidzë' Mateo

(Mr. 2:13-17; Lc. 5:27-32)

⁹ Cate' buzë'ë Jesús ni', bilé'enë' bönni' lë' Mateo, rö'ë ga na' ruquíxjë' uláz que yödZö zi'tu', ate' Jesús gudxë' lë':

—Gudá' neda'.

Ní'irö la' guyásatë' Mateo na', ate' sa'yéajlenë' Jesús.

¹⁰ Ia'tú le guca, cate' ni' rö'ë Jesús rahuë' ga naca lidxë' Mateo, zián bönni' tu'quíxjë', en yugu' bönni' cá'asö bila'dxinë' ga zoë', ate' gula'bõ'lenë' Jesús tsözxõn len yugu' bönni' usëda queë'. ¹¹ Cate' bönni' yudo' fariseo bila'lé'enë' lë ni, gula'nábinë' yugu' bönni' usëda queë' Jesús, ta'nnë':

—¿Naru' bönni' rusédinë' libí'ili' rágulentse' tsözxõn bönni' tu'quíxjë', en iá'zica'rë' bönni' dul-la'?

¹² Cate' biyönnë' Jesús lë ni, rë' légaquië':

—Biti' naquíniguequinë' bönni' nácagaquië' dxi'a nu un bönachi, pero bönni' té'enë' naquíniguequinë' nu un bönachi. ¹³ Guli'tséaj, en buli'sëda le rnna lë na' nazúaj lu guichi lá'ayi, le rnna caní: “Rë'ënda' ulu'huéchi' ládxi'gaquië' bönni' luzá'agaquië', en calëga ilútië'-ba' böa' bëdxi lu bucugu lá'ayi quia'.” Bida' ni, calëga para ulídzagaca'-në' bönni' tsahui', pero bida' para ulídzagaca'-në' bönni' dul-la' para ulu'bí'i ládxi'gaquië'.

Rusédinë' Jesús ca ral-la' gunru' gubasa
(Mr. 2:18-22; Lc. 5:33-39)

¹⁴ Ní'irö bönni' dá'gaquië' Juan, bönni' na' buquilë' bönachi nisa, bila'dxinë' ga zoë' Jesús, ate' gula'nábinë' Lë', ta'nnë':

—¿Bizx que na' netu', enca' yugu' bönni' yudo' fariseo, zián luzuí runtu' gubasa, pero yugu' bönni' usëda quiu' Li' bití' tunë' gubasa?

¹⁵ Bubi'ë didza' Jesús, en rë' légaquië':

—¿Naru' huácatsö ila'sëbi ládxi'gaca nupa nacuá' laní que yöl-la' rutsaga na' tsanni ni' bönni' rutsaga

në'ë zóalenë' légaquië'? Za' dza cate' idué' bönni' na' rutsaga në'ë ga nacu'ë. Dza ní'irö ilunë' gubasa.

¹⁶ Bucúdzu'ë didza' Jesús, rnnë':

—Cuntu nu un tu lari' tēbi len lari' cubi, tu uxú'uni lari' cubi na' nugu'ë lari' tēbi na', ate' ichöza'rö lari' tēbi na'. ¹⁷ Lësca' caní, cuntu nu bönni' riguë'ënë' xisi uva cubi tu lu buzudi guídi gula, tu' galaj ilēbi xisi uva cubi na', en uzzuxxaj buzudi guídi gula na', ate' gaca ditaj xisi uva na', ate' initi ca' buzudi guídi na'. Rigá'aru' xisi uva cubi tu lu buzudi guídi cubi, ate' irópatē taca chi'i.

Rubanbi' bi'i nigula queë' Jairo, en ruhuóácanu tu nigula gudannu lari' nácuë' Jesús

(Mr. 5:21-43; Lc. 8:40-56)

¹⁸ Tsanni ní' Jesús ru'ilenë' légaquië' didza' ni, tu bönni' rinná bé'enë' bönachi judío bidxinë' ga zoë', ate' buzóa zxibë' lahuë' Jesús, en rë' Lë':

—Bi'i nigúlado' quia' la' gútitēbi'. Gudá ixóa no'o lēbi', ate' ubanbi'.

¹⁹ La' guzuítenë' Jesús, en sa'yéajlenë' lë'. Dzágagaquië' bönni' usēda queë' Lë'.

²⁰ Ní'irö bidxinnu tu nigula zaca' cúde'lë' Jesús, chiguca chinnu iz ré'enu, biti' ruhuí'i rön queënu que huë' quégaca cázanu nigula, ate' gudannu lari' nácuë' Jesús. ²¹ Caní bennu tu' rizá' ládxi'nu, rnnanu: Channö cansa' zxë', huóáca'. ²² Ní'irö buécjë' Jesús, en ruyúë' lēnu, ate' rë'ë-nu:

—Butipa ládxi'u, zxí'ina'do'. Chibóácateu' tu réajlë'u neda'.

La' ná'asö böácatēnu.

²³ Cate' bidxinë' Jesús lidxë' bönni' unná bē' na', bilé'enë' nacu'ë ní' bönni' tu'cödxë' gui, en nupa ta'bödxí yechi'. ²⁴ Jesús rë' légaquië':

—Guli'cuita ni, tu' cabí nátibi' bi'i nigúlado' ni. Rásisibi' na'.

Ní'irö nupa nacuá' ni' bulu'titaj Lë'.

²⁵ Cate' chinubéajë' Jesús bönachi na' ní'lö, guyázië', en gudélé'ë ná'abi' bi'i nigula na', ate' la' guyásatëbi'. ²⁶ Guzë didza' ca guca lë ni, ate' bila'yöni bönachi nacuá' idútë luyú na'.

Jesús ruúnë' bönni' nachul-la guiöj lógaquië'

²⁷ Cate' Jesús burúajë' ni', chopë' bönni' nachul-la guiöj lógaquië' sójácalenë' Lë'. Tu'ë zidzaj didza', ta'nnë':

—Zxí'ini xi'sóë' David, buéchi' ladxi' netu'.

²⁸ Cate' bidxinë' Jesús ga naca lu yu'u, bila'dxinë' chopë' bönni' na' nachul-la guiöj lógaquië' ga zoë'. Jesús gunábinë' légaquië', rnnë':

—¿Ba réajlë'ëli' neda', huáca una' libí'ili'?

Légaquië' ta'nnë':

—Ön, Xan.

²⁹ Ní'irö Jesús gudanë' guiöj lógaquië', ate' rnnë':

—Ca réajlë'ëli', ca' gaca queéli'.

³⁰ La' böáljatë guiöj lógaquië'. Ní'irö Jesús buzenë' bach légaquië', rnnë':

—Guli'gü'ítica'sö ládxi'li' cuntu nu inözi lë ni.

³¹ Cate' bulu'rúajë' ni', la' bulu'zëtë' didza' idútë luyú ni' ca naca lë na' benë' Jesús.

Jesús ruúnë' tu bönni' biti' ru'ë didza'

³² Cate' Jesús, en yugu' bönni' usëda queë' bulu'rúajë' tu lu yu'u, bila'dxinë' bönni' ga zoë' Jesús nachë'gaquië' lahuë' tu bönni' biti' ru'ë didza', tu' yu'u lë' bö' xihui'. ³³ Cate' bubéajë' Jesús bö' xihui' na', la' gunnëtë' bönni' na' biti' guca gu'ë didza'. Bulu'bánninë' bönni' nacu'ë ni', ta'nnë':

—Catu caz rilé'etu' le caní ladaj bönachi Israel.

³⁴ Ní'irö bönni' yudo' fariseo gula'nné' queë' Jesús, ta'nné':

—Bönni' ni rubéajë' yugu' bö' xihui', rugunë' dxin yöl-la' unná bë' que xángaca bö' xihui' na'.

Jesús ruhuéchi' ládxë'ë bönachi zián

³⁵ Gudë' Jesús idú gásibi'ilö gapa nacua' yödzö zxön, en gapa nacua' yödzödo', ate' gapa naca lu yu'u ga tu'dubë' tu'sedë' bönni' judío queë' Dios. Rusédinë' Jesús bönachi nacua' ni', en runë' libán que didza' dxi'a ca rinná bë'ë Dios. Bunë' yúgu'të nupa bi ta'guí'i ta'zaca' yugu' lu yödzö na'. ³⁶ Cate' Jesús bilé'enë' bönni' zián ni', buéchi' ládxë'ë légaquië', tu' ta'guí'i ta'záquië', en nudú ládxi'gaquië' ca raca quégacaba' bö'cu' zxila' biti' zoa nu ruyú légacaba'. ³⁷ Ní'irö Jesús rë' yugu' bönni' usëda queë', rnnë':

—Le nácatë dëda' yöla, pero nabábasö nupa tu'lapa. ³⁸ Que lë ni na', guli'gáta'yu lahuë' Dios, náquië' Xan yöla na', inábili'-në' isöl-lë'ë bönni' huen dxin ulu'lapë' yöla queë'.

10

Jesús riböë' bönni' ilácagaquië' gubáz queë'

(Mr. 3:13-19; Lc. 6:12-16)

¹ Ní'irö bulidzë' Jesús idxínnutë' bönni' usëda queë', en budödë' lu ná'agaquië' yöl-la' unná bë' para ulu'béajë' bö' xihui' yú'ugaca bönachi, en ulu'únë' yúgu'të nupa te'e, en yúgu'të nupa bi ta'guí'i ta'zaca'.

² Caní naca lágaquië' idxínnutë' gubáz na' nasöl-lë'ë Jesús:

Simón, (lë' ca' Pedro),
 Andrés, (böchë'ë Simón na'),
 Jacobo, (zxí'inë' Zebedeo),
 Juan, (böchë'ë Jacobo na'),
³ Felipe, Bartolomé, Tomás,
 Mateo, (bönni' uquízxaj),
 Jacobo, (zxí'inë' Alfeo),
 Lebeo, (lë' ca' Tadeo),
⁴ Simón, (bönni' ruí'i ládxe'ë yödzö queë'),
 Judas Iscariote, (bönni' udödë' Jesús lu ná'agaquië'
 bönni' ilútië' Lë').

Jesús risöl-lë'ë gubáz queë' tsöjéngaquië' libán

(Mr. 6:7-13; Lc. 9:1-6)

⁵ Ní'irö Jesús gusöl-lë'ë idxínnutë' bönni' ni tsöjéngaquië' libán, ate' gunná bé'enë' légaquië', rnnë':

—Biti' tséajli' ga nacuá' bönachi bití' nácagaca judío, en bití' tsú'uli' ládzagaca bönachi nacuá' luyú Samaria. ⁶ Guli'tséaj ga nacuá' bönachi Israel, nácagaquië' ca bö'cu' zxíla'do' nanítigacaba'.

⁷ Guli'tsöjén libán, innali': "Chibidxín gala' dza Dios, Nu na' zoa yehua' yubá, inná bé'ë luyú ni." ⁸ Buli'ún nupa te'e. Buli'ún dxi'a nupa te'e huë' nudzu' ruzödi. Buli'subán nupa chinátigaca. Buli'béaj bö' xihui' yú'ugaca bönachi. Bénnasa' queëli' yöl-la' unná bé' ni. Buli'gún dxin le, en bití' bi uquíxjali'.

⁹ 'Biti' bi guá'ali' lu buzudi queëli', calëga dumí oro, en calëga dumí plata, en calëga dumí lásido'.

¹⁰ Biti' guá'ali' yöxaj yöta queëli' le gáguli' la' nöza. Tuz lari' ixóa yenli', en bití' guá'ali' xiráchuli' o xiyaga queëli', tu' idzöli quézinë' bönni' huen dxin le gahuë'.

11 'Gáti'tës yödzo zxön o yödzödo' ga idxinli', guli'naba nuzxi naca idú ladxi' lu yödzo ni', ate' ugá'anali' lidxi nu na' cate' gála'rö dza urúajli' yödzo na'. 12 Cate' tsú'uli' tu lu yu'u, buli'gapa Dios bönachi nacua' lu yu'u na', inábali'nē' Dios unödzejē' quégaquiē' le cuéqui dxi icja ládxi'do'gaquiē'. 13 Channö bönachi nacua' lu yu'u ni' nácgaca lesaca', ugá'analen le ribequi dxi ladxi' na' léguequi, pero channö bönachi na' cabí nácgaca lesaca', inábali' cabí ugá'ana lē na' ribequi dxi ladxi' len léguequi. 14 Gáti'tës ga idxinli' ga bönachi ni' biti' ilún libí'ili' bal, en biti' ulu'zē nagui xtídza'li', buli'rúaj lu yu'u ni' o yödzo ni', ate' guli'cuíbi bēchtö da' lē'e lábali', le ulu'í léguequi nabága'gaca xíguia'. 15 Le nácatē rea' libí'ili', cate' idxín dza ichúguiē' Dios quégaca bönachi, ila'guí'i ila'záca'rö bönachi yödzo na' ca ila'guí'i ila'záca' bönachi gula'cuá' yödzo Sodoma, en yödzo Gomorra, nupa ni' busunítiē' Dios.

Nupa biti' ta'yéajlē' ulu'saca' zi' nupa dá'gaca Cristo

16 Gunnē' ca' Jesús:

—Buli'yútsöca', neda' risöl-la'a libí'ili', ate' gácali' ca bö'cu' zxíla'do' ta'daba' ga dzö'öba' bö'cu' gu'a sínia'. Guli'gaca sina' ca nácgacaba' sina' bēla sínia', pero guli'gaca ca' nöxaj ladxi' ca nácgacaba' gu'dödo'. 17 Guli'gún chí'i cuinli' quégaca bönachi, tu' ulu'dödē' libí'ili' lu ná'agaquiē' bönni' yúlahui', en ila'guínē' libí'ili' gapa naca lu yu'u ga tu'dubē' tu'sedē' bönni' judío queē' Dios. 18 Lēasca' caní, ila'ché'e libí'ili' lógaquiē' bönni' lo, en lógaquiē' bönni' ta'nná bē'e, tu' dá'ali' neda'. Caní gaca

para gaca gunli' ba nalí quia' lógaquië' bönni' ni', en lógaquië' bönni' biti' nácagaquië' judío. ¹⁹ Ní'irö cate' ulu'dödë' libí'ili' lu ná'agaquië' bönni' unná bë' na', biti' cõ'öli' böniga nacxi innali', tu' ichizë' Dios icja ládxi'do'oli' didza' gü'í'ili', en ca innali' la' dza ná'asö. ²⁰ Calëga libí'isili' na' innali', pero Dios Bö' Lá'ayi, Nu na' risöl-lë'ë Xúziru' Dios queëli', Lë cazë' sóalenë' libí'ili', en gu'ë didza'.

²¹ 'Ila'cuá' bönachi ulu'dödi böchi'guequi lu ná'agaquië' bönni' ilútië' légaquië', en lësca' caní, bönni' nácagaquië' xuz ulu'dödë' zxí'inigaquië', ate' ila'cuá'abi' bi'i ila'dá'baga'bi' xúzgacabi', en ilunbi' ga ilátië' xúzgacabi' na'. ²² Yúgu'të bönachi ulu'zóa libí'ili' tsólá'alö tu' dá'ali' neda', pero nu ugá'ana tsutsu ga idxinrö dza údxi, nu ni ulá. ²³ Cate' ulu'saca' zi' bönachi libí'ili' tu lu yödzo, buli'zxunnaj ni', ate' tséajli' ia'tú yödzo, tu' rea' libí'ili', huöda' neda', Bönni' Guljë' Bönachi, zí'alö cate' údxi gunli' libán gapa nacuá' yugu' yödzo quégaca bönachi Israel.

²⁴ Núti'tës bönni' náquië' bönni' usëda biti' nácarë' lo ca nu rusëdi lë', en lësca' caní, nu bönni' náquië' huen dxin biti' nácarë' lo ca xanë'. ²⁵ Nu na' naca bönni' usëda ral-la' udzëjanë' channö huadéli'në' gáquië' ca naca nu rusëdi lë', ate' bönni' huen dxin na' ral-la' udzëjanë' channö gáquië' ca naca xanë'. Channö ta'nnë' quia' neda', bönni' xan yu'u, ta'nnë' naca' Belzebú tu' xihui', ila'nnë' zí'irë' quégaca bönachi tá'gaquië' neda'.

*Nu ral-la' gádxiru'
(Lc. 12:2-9)*

²⁶ Gunnë' ca' Jesús:

—Que lë ni na', bití' gádxili' bönachi. Hualá' lahui yúgu'të le raca bëdxi lándó'os, ate' huáca bë' yúgu'të le nagachi'. ²⁷ Yugu' didza' ru'ílëna' libí'ili' ga naca chul-la, guli'quixjö' ga naca lu bení', ate' le rea' libí'ili' ga nagachi', guli'nnë zidzaj ga naca lahui' lógaca bönachi. ²⁸ Bití' gádxili' nupa tuti le nácagaca caz bönachi, pero bití' gaca ulu'suniti bö' naca cázarú'. Guli'gadxi Dios, Bönni' na' gaca gútië' idútë le nácali', en chú'unë' bö' naca cázali' lu guí' gabila.

²⁹ 'Ta'dá'uba' chópaba' biguínido' len tu dumí lásido', pero bití' ibíxiba' tuba' lu yu channö cabí ru'ë Xúziru' Dios lataj gaca caní. ³⁰ Lësca' caní, nabábagaca yúgu'të guitsa' ícjali' lahuë' Dios. ³¹ Que lë ni na', bití' gádxili'. Ru'itë'rö ládxe'ë Dios libí'ili' ca ru'í ládxe'ë-ba' zianba' biguínido'.

Yugu' bönni' ta'zí' lu ná'agaquië' Cristo lógaca bönachi

(Lc. 12:8-9)

³² Gunnë' ca' Jesús:

—Nu bönni' si' lu në'ë neda' lógaca bönachi, neda' si' lu na'a bönni' na' lahuë' Xuza' zoë' yehua' yubá. ³³ Bönni' ta'dá'baguë'ë lógaca bönachi, ila'nnë' bití' ta'dë'ë neda', lësca' caní neda' tá'baga'a légaquië' lahuë' Xuza' zoë' yehua' yubá.

Jesús náquië' le run ga ila'rúaj choplö bönachi

(Lc. 12:51-53; 14:26-27)

³⁴ Gunnë' ca' Jesús:

—Bití' guéquili' za'a idigu'a le ribequi dxi bönachi yödzölió ni. Bití' za'a idigu'a le ribequi dxi, pero za'a idigu'a le gun ga ila'rúaj choplö bönachi.

³⁵ Za'a ni, ate' guna' ga ila'dá'baga' bönachi

xúzguequi, ate' yugu' nigula ila'dá'baga'nu ca' xiná'agacanu. Lësca' caní, yugu' nigula zxoá' lídxigacanu ila'dá'baga'nu xto' zxi'ininu. ³⁶ Caní gaca, la' di'a dzasö quegaca bönachi ulu'saca' zi' luzě'eguequi.

³⁷ 'Nu nadxí'irö xuz xině'e ca nadxí'i neda', biti' naca bachi nu na' ta' neda', ate' nu nadxí'irö bi'i bönni' que o bi'i nigula que ca nadxí'i neda', biti' naca bachi nu na' ta' neda'. ³⁸ Nu biti' si' lu nē'e gaca ca tu bönni' sōjtě'ē lē'e yaga cruz, en ta' neda', biti' naca bachi guequi quia' neda'. ³⁹ Nu ru'í ladxi' gun chi'i yöl-la' na'bán que, uniti le, pero nu uniti yöl-la' na'bán que tu' da' neda', ulá nu na'.

Yugu' le ubi'ë Dios queëru'

(Mr. 9:41)

⁴⁰ Gunně' ca' Jesús:

—Nu gun libí'ili' bal, neda' ca' gun bal, ate' nu na' gun neda' bal, gun bal ca' Dios Xuz nasöl-lě'ë neda'.

⁴¹ Nu gun bal tu bönni' ru'ë didza' uláz queë' Dios tu' ru'ë didza' uláz queë' Dios, huadeli' nu na' lu nē'ë Dios la' leze na' idéli'nē' bönni' ru'ë didza' uláz queë' Dios. Lësca' caní, nu gun bal tu bönni' tsahui' tu' náquië' bönni' tsahui', huadeli' nu na' lu nē'ë Dios la' leze na' idéli'nē' bönni' tsahui'. ⁴² Núti'tës nu unödzej queë' tu bönni' do' ni tu zxibíndo' os nisa tu' náquië' bönni' usëda quia' neda', le nácatë rea' libí'ili', biti' uniti nu na' le ral-la' si' lu nē'ë Dios.

11

Ta'dxině' bönni' nasöl-lě'ë Juan ga zoë' Jesús

(Lc. 7:18-35)

¹ Cate' Jesús budxi buzéajni'iné' yugu' bönni' usëda queë', buzë'ë ni', sa'yéajë' röjsëdinë' bönachi, en röjenë' libán yugu' lu ládzagaca bönachi na'.

² Juan, bönni' buquilé' bönachi nisa, ni' yu'ë lidxi guíë, ate' biyönnë' ca nácagaca le runë' Jesús. Ní'irö Juan na' gusöl-lë'ë chopë' bönni' dá'gaquië' lë', ate' bila'dxinë' ga na' zoë' Jesús. ³ Chopë' ni gula'nábinë' Jesús, të' Lë':

—¿Nacu' Li' Cristo, Bönni' na' ral-la' idxinë' yödzölió ni, o ral-la' cöztu' dza idxinë' ia'túë' bönni'?

⁴ Bubi'ë didza' Jesús, rë' légaquië':

—Guli'tséaj tsöjtíxjöi'ili'-né' Juan lë ni riyönili', en rilé'eli'. ⁵ Guli'tsöjödxe' ca raca, tu'lé'enë' bönni' guchul-la guiöj lógaquië', ate' tu'zë'ë bönni' biti' guca ila'dë'. Nuhuöácagaquië' bönni' gü'iguequinë' huë' nudzu' ruzödi, ate' ta'yönnë' bönni' gula'cödzuë'. Nnita' nabángaquië' bönni' gulátië', ate' raca libán que didza' dxi'a lógaca bönachi yechi'. ⁶ Bica' ba nu bönni' biti' gáquië' chopa ládxë'ë, biti' ubéaj ládxë'ë neda'.

⁷ Cate' yugu' bönni' na' dá'gaquië' Juan bulu'zë'ë söjhuöjgaquië', ní'irö gusí lahuë' Jesús ru'ilenë' bönachi nacua' ni' didza' ca naca queë' Juan na'. Rë' légaquië':

—¿Bizxi gú'unili' ilé'eli' cate' ni' guyéajli' lu lataj cá'asö? ¿Naru' gú'unili' ilé'eli'-né' tu bönni' náquië' ca tu gui ruzecaj bö' recja le? ⁸ Channö cabí, ¿bizxi gú'unili' ilé'eli'? ¿Naru' gú'unili' ilé'eli'-né' tu bönni' nácuë' lari' dxí'ado'? Nöz quézili' bönni' nácugaquië' lari' dxí'ado' nacu'ë lidxigaquië' bönni' ta'nná bë'ë. ⁹ Channö cabí, ¿bizxi gú'unili' ilé'eli'? ¿Naru' gú'unili' ilé'eli'-né' tu bönni' ru'ë didza' uláz

queë' Dios? Ca' naca, réquida'. Rea' libí'ili', bilé'eli'-
në' tu bönni' nácatërë' lo ca ia'zica'rë' bönni' gulu'ë
didza' uláz queë' Dios. ¹⁰ Caní naca, tu' náquië'
Juan bönni' na' ru'í didza' le nazúaj lu guichi lá'ayi
ca naca queë', le rnna:

Buyú, risöl-la'a bönni' gubáz quia', inöruë' ca Li'.
Lë' upë'ë nõza ga tödu'.

¹¹ Le nácatë rea' libí'ili'. Idútë yödzülió ni, cuntú
nu zoa nácaró lo ca Juan, bönni' ni' buquilé' bönachi
nisa, pero nu naca cuídi'do'os ga rinná bë' Nu na'
zoa yehua' yubá nácatëro lo ca Juan na'.

¹² 'Cate' ni' gusí lahuë' buquilé' Juan bönachi
nisa, ga ridxintë na'a dza, bayudxi túngaca bönachi
para ta'yaza ga rinná bë'ë Bönni' na' zoë' yehua'
yubá, ate' nupa tunsö bayudxi ta'deli' le. ¹³ Ga
bidxintë dza na' blë'ë Juan, le rinná bë' xibá queë'
Moisés, en le bulu'zúajë' lu guichi yúgu'të bönni'
gulu'ë didza' uláz queë' Dios gulu'í didza' ca rinná
bë'ë Bönni' na' zoë' yehua' yubá. ¹⁴ Channö ré'ënili'
si' lu ná'ali' lë ni, ral-la' inözili' Juan na' náquië'
Elías, bönni' ni' bë'ë didza' uláz queë' Dios, bönni'
na' Dios gunnë' ral-la' ilá' lahuë' leyúbölö dza ni
zóaru' na'a. ¹⁵ Nu zoa nagui, en riyöni ral-la' uzë
nagui.

¹⁶ ¿Bizxi ubéqui'tseda' ca nácgaca bönachi nacúa'
dza ni zóaru' na'a? Nácgacquië' ca yugu' bí'ido'
ta'bö'öbi' lu yë'ëyi. Zidzaj tu'lídzabi' luzá'agacabi',
¹⁷ ta'nnabi': "Rucódxitu' queëli' gui. ¿Bizx que biti'
ruyá'ali'? Rul-la yéchi'tu' queëli'. ¿Bizx que biti'
ribödxi yéchi'li'?" ¹⁸ Caní nácali', tu' bidë' Juan, ate'
tu' cabí gü'í gudahuë' ca ráguli' libí'ili', gunnëli'
queë', gunnali': "Tu' xihui' dzágui lë'." ¹⁹ Ní'irö

bidxina' neda', Bönni' Guljē' Bönachi, ate' re'aj rahua', ate' rnnēli' quia', rnnali': "Náquiē' bönni' huágulē'ē, en bönni' re'jē'. Náquiē' luzá'agaquiē' bönni' uquízxaj, en ia'zica'rō huen dul-la'." Yöl-la' réajni'i queē' Dios naca bē' ni'a que le tun nupa ta'zì' lu nē'eguequi le.

*Le gaca que nu biti' run ca rnna xtídzē'ē Dios
(Lc. 10:13-15)*

²⁰ Ní'irō gusí lahuē' Jesús ruzenē' bach bönachi naca' yugu' yödzö gapa ni' benē' zian yöl-la' huáca, tu' cabí tu'bí'ini ládxi'guequi. ²¹ Gudxē' léguequi:

—Bica' bayechi' libí'ili', bönachi Corazín. Bica' bayechi' libí'ili', bönachi Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca bena' ga zóali', dza ní'telö ulu'bí'i ládxi'gaca bönachi yödzö Tiro, en yödzö Sidón na', en ilácugaca lari' tēbi, en ulu'dxía dö ícjaguequi, le ulu'luí'i tu'bí'i ládxi'gaca bönachi na'. ²² Na'a, neda' rea' libí'ili', cate' idxín dza ichúguiē' Dios quégaca bönachi, quí'i sáca'röli' libí'ili' ca ila'guí'i ila'zaca' bönachi yödzö Tiro, en yödzö Sidón, nupa na' busunítiē' Dios.

²³ Libí'ili', bönachi Capernaum, guca queēli' ca bidxíntēli' ga nu riyaza yehua' yubá. Huótjali' lu guí' gabila. La'tu' gulaca yugu' yöl-la' huáca bena' ga zóali' lu yödzö Sodoma, ulu'gá'ana bönachi yödzö ni' ga ridxintē na'a dza. ²⁴ Na'a, neda' rea' libí'ili', cate' idxín dza ichúguiē' Dios quégaca bönachi, quí'i sáca'röli' libí'ili' ca ila'guí'i ila'zaca' bönachi Sodoma na'.

*Rnnē' Jesús: "Guli'dá ga zoa', uzí' ládxi'li'"
(Lc. 10:21-22)*

²⁵ Dza na' bē'ē didza' Jesús, rnnē':

—Xuza', nacu' Xani yehua' yubá, en Xani luyú ni. Rigu'a Li' yöl-la' ba, tu' bucáchu'u lë ni, para cabí ila'lé'enë' bönni' ta'yéajni'ide'enë' le, pero buluí'inu' nupa nátagaca ca yugu' bí'ido' le. ²⁶ Ca' gaca, Xuza', tu' caní guyaza ládxi'u Li'. ²⁷ Yúgu'të nudödë' Xuza' lu na'a. Cuntu nu nunbë' neda', Zxí'inë' Dios, pero tuzë' Dios Xuz, en cuntu nu nunbë' Dios Xuz, pero tuza' neda', Zxí'inë' Dios, enca' nupa na' ré'ënda' uluí'ida' léguequi Dios Xuz. ²⁸ Guli'dá ga zoa' yúgu'tëli' røjéqui'li' tu' rúntica'sili' dxin que yöl-la' yudo', en nuá'ali' yua' zi'i quégaca xibá que, ate' neda' guna' ga uzí ládxi'li'. ²⁹ Lu yöl-la' nöxaj ladxi' queëli' guli'gún xichina', gácali' ca bëdxi ta'z'í'iba' yugu' quégacaba'. Guli'sëda lu na'a neda', tu' naca' nöxaj ladxi', en do' ladxi', ate' idzöli yöl-la' ruzí' ladxi' queëli', le cuéqui dxi ládxi'li'. ³⁰ Yugu' na' ugu'a libí'ili', le naca le inná bé'eda' libí'ili', biti' naca böniga, ate' yua' ugu'a libí'ili' le naca le rusédida', dzá'do'os naca.

12

Ta'lecjë' do bönni' usëda queë' Jesús dza lá'ayi
(Mr. 2:23-28; Lc. 6:1-5)

¹ Dza ni', le naca dza lá'ayi quégaquië' bönni' judío, gudödë' Jesús gapa dë yöla zxoa' xtila, ate' ta'dunë' bönni' usëda queë', en gusí lógaquië' ta'lecjë' do ga dxía zxoa' xtila, en tahuë' zxoa' xtila na'. ² Cate' bila'lé'enë' bönni' yudo' fariseo lë ni, të Jesús:

—Buyútsöca', tunë' bönni' usëda quiu' le cabí ralla' gunru' dza lá'ayi.

³ Ní'irö Jesús gudxë' légaquië':

—¿Naru' cabí nulábanili' lu guichi lá'ayi bi benë David cate' gudunë', ate' gula'dún ca' nupa gula'cuá'len lë'? ⁴ Guyu'ë lu yu'u queë' Dios, en gudahuë' yugu' yöta xtila nagú'ugaquië' lu bucugu lá'ayi, le cabíral-la' gahuë' lë', en bití' ral-la' ilahuë' bönni' gula'cuá'lenë' lë', pero légacsë' bixúz dë lataj ilahuë' le. ⁵ ¿Naru' cabí nulábanili' le rinná bë' xibá queë' Moisés ca tunë' bixúz yugu' dza lá'ayi? Tunë' dxin lö'a yudo' yugu' dza lá'ayi, en bití' ta'báguë'ë xíguia'. ⁶ Na'a, neda' rea' libí'ili', zoa' neda' ni, en naca' bönni' nácarë' lo ca yudo'. ⁷ Bití' réajni'ili' lë na' nazúaj lu guichi lá'ayi, le rnna: "Rë'ënda' huéchi' ládxi'li' luzá'ali', en calëga gútigacali'-ba' böa' bédxido' ruzégui'gacali'-ba' lu bucugu lá'ayi quia'." La'tu' réajni'ili' lë ni, bití' ichúguli' quégaca nupa bití' nabága'gaca xíguia'. ⁸ Ca' naca, tu' naca' neda', Bönni' Guljë' Bönachi, Xani dza lá'ayi.

Jesús ruúnë' tu bönni' narequi' në'ë
(Mr. 3:1-6; Lc. 6:6-11)

⁹ Ní'irö buzë'ë Jesús ni', ate' guyu'ë lu yu'u ga tu'dubë' bönni' judío, en tu'sedë' queë' Dios. ¹⁰ Lu yu'u na' zoë' tu bönni' narequi' në'ë, ate' tu' të'ënnë' bönni' judío unná bë' ila'dzölinë' bi ulu'zégui'ë Jesús didza', que lë ni na' gula'nábinë' Lë', ta'nnë':

—¿Naru' dë lataj unru' nu re'e cate' naca dza lá'ayi?

¹¹ Bubi'ë didza' Jesús, rë' légaquië':

—Nu bönni' nútsë'ë ládjali', channö zóaba' tuba' bö'cu' zxila' queë', en channö ibíxiba' lu yeru cate' naca dza lá'ayi, ¿naru' cabí tsöjxönë'-ba', en tsöjléajë'-ba'? ¹² Nazáca'tërë' tu bönni' ca tuba'

bö'cu' zxila'. Que læ ni na', dë lataj gunru' le naca dxi'a quégaca bönachi cate' naca dza lá'ayi.

¹³ Ní'irö Jesús gudxë' bönni' huë' na':

—Bulí no'ö.

Cate' bulí nē'ë, la' böácatë dxi'a ca naca ia'tsölá'a nē'ë.

¹⁴ Ní'irö bulu'rúajë' bönni' yudo' fariseo na', ate' gulún xtídza'gaquië' para gaca ilútië' Jesús.

Le gunné' tu bönni' bë'ë didza' uláz queë' Dios ca ral-la' gaca queë' Jesús

¹⁵ Cate' réquibe'enë' Jesús læ ni, buzë'ë ni', ate' sōjácalen bönachi zían Lë'. Jesús bunë' yúgu'të nupa te'e ladaj bönachi na', ¹⁶ en gunná bé'enë' léguequi biti' usiyönguequi bönachi Nu náquië'. ¹⁷ Caní gunné', para gaca læ na' gunné' Isaías, bönni' bë'ë didza' uláz queë' Dios, gunné':

¹⁸ Bulí'yútsöca', Bönni' ni náquië' Huen Dxin quia', na' guró caza' neda' Lë'.

Nadxí'ida' Lë', en raza ládxa'a Lë'.

Ichiza' Lë' Bö' Lá'ayi.

Lë' usiyönnë' yúgu'të bönachi ca guna', uchi'a usöröa' quéguequi.

¹⁹ Cuntu nu tíl-lalenë' didza', en biti' ulidzë' zidzaj. Cuntu nu yöni chi'ë ga naca zí'tu'.

²⁰ Tu guído' zoa bö biti' quitsjë' le, ate' guí' chizóa ulu, biti' usúluë' le, cate' uzóarë' le naca tsahui' queë'.

²¹ Yúgu'të bönachi ilún löza Lë'.

Ta'nnë' bönni' judío unná bë': "Dzaga Jesús tu xihui"

(Mr. 3:19-30; Lc. 11:14-23; 12:10)

22 Ní'irö dujuá'gaquië' tu bönni' ga zoë' Jesús, nachul-la lahuë', en bití' raca gu'ë didza', tu' yu'u bö' xihui' lë', ate' Jesús bunë' bönni' na'. Caní guca, rilé'enë', en ru'ë didza' bönni' na' guchul-la lahuë', en bití' guca gu'ë didza'. 23 Que lë ni na' bulu'bani yúgu'të bönachi nacué' ni', ta'nná:

—¿Naru' nácatsë' bönni' ni Zxí'ini Xi'sóë' David, Bönni' na' ral-la' guídë'?

24 Cate' bila'yönnë' bönni' yudo' fariseo lë ni, ta'zá' ládxe'ë, ta'nnë': Bönni' ni rubéajë' yugu' bö' xihui' tu' dzaga Beelzebú tu' xihui', xángaca bö' xihui', Lë'.

25 Réquibe'enë' Jesús lë na' ta'zá' ládxi'gaquië', ate' rë' légaquië':

—Gátitës ga ta'nná bë' bönachi, channö bönachi ni' ila'rúaj choplö, en ila'díl-lalen luzë'eguequi, initi yöl-la' unná bë' quéeguequi. Lësca' caní, channö ila'rúaj choplö bönachi nacué' tu yödzö o tu yu'u, en ila'dil-la, bití' gaca ila'día' bönachi nacué' yödzö na' o yu'u na'. 26 Lësca' caní, channö ubéaj Satanás tu' xihui' la' luzë'esö, ate' yugu' bö' xihui' na' ila'díl-lalen la' léguequisö, ¿naru' idía' yöl-la' unná bë' que tu' xihui'? 27 Rnnali' quia' rubéaja' yugu' bö' xihui' tu' dzaga Beelzebú tu' xihui' neda'. Channö runa' caní, ¿nuzxi dzaga nupa dá'gaca libí'ili' cate' tu'béaj yugu' bö' xihui'? Que lë ni na' le túngaca caz naca bë' nachíxili'. 28 Na'a, channö neda' rubéaja' yugu' bö' xihui' tu' zóalen yöl-la' huáca queë' Dios Bö' Lá'ayi neda', le nácate' chibidxín le rinná bë'ë Dios ga zóali'.

29 '¿Naru' huácatsö nu bönni' tsu'ë lidxë' bönni' nal-la, en cuéajë' yöl-la' tsahui' dzö'ö lidxë' channö

cabí gúguë'ë bönni' nal-la na' zí'alö? Ní'irö gaca tsu'ë, en ulatjë' lidxë' bönni' nal-la na'.

³⁰ 'Nu biti' run neda' tsözxön, ridá'baga' neda', en nu biti' rutubi tsözxön len neda', rusilasi nu na'.

³¹ 'Que lë ni na' rea' libí'ili', ca naca yúgu'të dul-la' tun bönachi, en yugu' didza' xihui' ta'nná, uniti lahuë' Dios léguequi, pero nu bönni' innë zi'ë queë' Dios Bö' Lá'ayi, biti' ca' uniti lahuë' Dios lë'.

³² Lësca' caní, nu bönni' innë' quia' neda', Bönni' Guljë' Bönachi, Dios uniti lahuë' lë', pero nu bönni' innë' queë' Dios Bö' Lá'ayi, biti' ca' uniti lahuë' Dios lë'. Biti' uniti lahuë' lë' dza ni zóaru' na'a, en biti' uniti lahuë' lë' dza si' za'.

Le runru' naca bë' le nácaru'
(Mt. 7:15-20; Lc. 6:43-45)

³³ Gunnë' ca' Jesús:

—Channö naca dxi'a tu yaga, cuía le naca dxi'a, pero channö naca cá'asö yaga na', cuía ca' le naca cá'asö. Caní naca, le ribía tu yaga naca bë' yaga na'. ³⁴ Libí'ili' nácali' di'a dza quégacaba' bëla sínia'. ¿Nacxi gaca güi'ili' dxi'a didza', channö cabí nácali' dxi'a? Ca naca le ta'zá' láchxi'gaca bönachi, lësca' caní tu'í' didza'. ³⁵ Tu bönni' tsahui' ru'ë didza' tsahui' tu' yu'u le naca tsahui' icja láchxi'da'ahuë', pero tu bönni' huiá' dö' ru'ë didza' biti' naca tsahui' tu' yu'u le cabí naca tsahui' icja láchxi'da'ahuë'. ³⁶ Que lë ni na' rea' libí'ili', cate' idxín dza ichúguië' Dios quégaca bönachi, uchi'a usöröë' tu tu bönni' ca naca yúgu'të didza' gula'nnazë' ca'. ³⁷ Ca naca didza' ru'u, uchi'a usöröë' li', ate' uruju' tsahui' o ibágu'u xíguia' ni'a que didza' na' bë'u.

*Ta'nábinë' Jesús gunë' le gaca bë' nu náquië'
(Mr. 8:12; Lc. 11:29-32)*

³⁸ Ní'irö bulu'bi'ë didza' yugu' bönni' yudo' fariseo, en yugu' bönni' yudo' tu'sédinë', en tē Jesús:

—Bönni' Usedi, ré'ënitú' ilé'etu' tu le gunu' le gaca bë' dē lu no'o yöl-la' unná bë'.

³⁹ Bubi'ë didza' Jesús, en rē' légaquië':

—Yugu' bönni' tuá' dö' ni, bití' zoa idú ládxi'do'gaquië', ta'nábinë' neda' guna' tu le gaca bë' nu naca'. Bití' bi le gaca bë' ila'lé'enë', pero le naca bë'sö na' ca guca queë' Jonás, bönni' bë'ë didza' uláz queë' Dios. ⁴⁰ Ca na' guca queë' Jonás na', bugá'anë' lé'ëba' tu böla zxön idú tsonna dza tsonna yëla, lësca' caní gaca quia' neda', Bönni' Guljē' Bönachi, tsonna dza tsonna yëla ugá'ana' zxañ yu. ⁴¹ Ila'yasë' bönni' gula'cu'ë yödzo Nínive dza ichúguië' Dios quégaca bönachi cate' uchi'a usöröë' bönachi nacua' dza ni zóaru' na'a, ate' le gulunë' usubaga' bönachi ni xíguia' tu' bulu'bí'i ládxi'gaquië' bönni' Nínive na' cate' ni' busiyönnë' Jonás légaquië' xtídzë'ë Dios, ate' na'a zoa' ni neda', en nácatëra' lo ca Jonás na'. ⁴² Lësca' caní, nigula ni' gunná bé'enu yödzo dē saca' ga ridödi gubidza beo' ziaga chásanu dza ichúguië' Dios quégaca bönachi cate' uchi'a usöröë' bönachi nacua' dza ni zóaru' na'a, ate' le bennu usubaga' légaquië' xíguia', tu' birúajnu nigula na' ga nácatëro' zitu' para yöñinu didza' réajni'i bë'ë Salomón, ate' na'a zoa' ni neda', en nácatëra' lo ca Salomón na'.

*Cate' rudxín tu bö' xihui' xilataj
(Lc. 11:24-26)*

⁴³ Gunnë' ca' Jesús:

—Cate' rirúaj tu bö' xihui' yu'u bönni', ridá gapa nabadxi, riguilaj ga uzí ladxi'. Channö cabí idzöli ga na' uzí ladxi', ⁴⁴ ní'irö inná: “Huöja' xilatja' ga ni' birúaja'.” Cate' udxín ga ni' birúaj, tsöjxaca' bönni' na', náquië' ca tu yu'u nadachi', en nalúaj, en chinabá'a para nu tsöjsóa ni'. ⁴⁵ Ní'irö tseaj, tsöjzxi' ia'gadxi bö' xihui' nácagacatërö xihui' ca le, ate' ila'yaza yúgu'të, en ila'cuá' icja ládxi'da'ahuë' bönni' na', ate' ga údxi huayáli'tërö ca gaca queë' bönni' na' ca guca queë' zí'alö. Lësca' caní gaca quégaca bönachi tuá' dö' ni.

Xinë'ë Jesús, en yugu' bönni' böchë'ë
(Mr. 3:31-35; Lc. 8:19-21)

⁴⁶ Cate' ni' ruí'ilenë' Jesús bönachi didza' ni, xinë'ë, en yugu' bönni' böchë'ë bila'dxinë' ni'. Gula'cu'ë ló'alö, en gulë'ëniaguequinë' ilu'í'ilenë' Jesús didza'. ⁴⁷ Ní'irö tu bönni' busiyönnë' Jesús, en rë' Lë':

—Buyútsöca', nacu'ë xinó'o, en yugu' bönni' böchu'u ló'alö, en tē'ënnë' ilu'í'ilenë' Li' didza'.

⁴⁸ Bubi'ë didza' Jesús, en rë' bönni' na' busiyönnë' Lë' caní, rnnë':

—¿Nözili' nuzxi caz xiná'a, en nupxi caz bönni' böcha'a?

⁴⁹ Ní'irö bulí nē'ë, en bulu'e yugu' bönni' usëda queë', en rnnë':

—Buli'yútsöca', bönni' ni nácagaquië' ca xiná' caza', en yugu' böchi' caza'. ⁵⁰ Núti'tës nu run ca rë'ëni quëzinë' Xuza' zoë' yehua' yubá, nu ni naca bi'i böchi' caza', en bi'i zan caza', en xiná' caza'.

13

*Rucúdzu'ë didza' Jesús ca naca queë' tu bönni' guz
(Mr. 4:1-9; Lc. 8:4-8)*

¹ La' dza ní'isö birúajë' Jesús niu' yu'u, ate' yöjchö'ë ra' nísado'. ² Tu' bila'dxín bönachi zían ga zoë' Jesús, gurenë' tu lë'e bárcodo', en gurö'ë ní', ate' bönachi zían na' gula'cuá' luyú bidxi ra' nísado' na'. ³ Ní'irö Jesús bé'lenë' légaquië' didza', zían le busédinë' légaquië'. Bucúdzu'ë didza', rnnë':

—Buli'yútsöca', birúajë' tu bönni' guz, söjësië' xisedo'. ⁴ Tsanni ní' söjësië', bal-la xisedo' na' gulasi ra' nöza, ate' bila'dxinba' biguínido', en gulé'ajba' xisedo' na'. ⁵ Gulasi ia'zíca'rö xisedo' na' luyú ga rö'ö guiöj, ga na' rö'ö láti'sö yu, ate' la' gula'lentë, tu' cabí rö'öda' yu ní'. ⁶ Ní'irö cate' budzá'a gubidza, lë na' bësië' la' gula'cuáditë, en gula'bidxi, tu' cabí dë ga ilún luí. ⁷ Gula'lén ia'zíca'rö xisedo' na' ga bulu'lén lubá yötsi', ate' gula'zxön lubá yötsi' na', en bila'röli lë na' bësië', en gulún ditaj le. ⁸ Gulasi ia'zíca'rö xisedo' na' ga naca luyú bëbu, ate' bulu'nödzaj. Bal-la lë na' bësië' bulu'nödzaj ia'tú gayuá'tërö ca'. Ia'zíca'rö bulu'nödzaj ia'tsónnalalaj ca', ate' ia'zíca'rö bulu'nödzaj ia'chí uruá' ca'. ⁹ Nu zoa nagui, en riyöni, ral-la' uzë nagui.

*Le t'ëni ilún le bucúdzu'ë Jesús didza'
(Mr. 4:10-12; Lc. 8:9-10)*

¹⁰ Ní'irö bila'dxinë' bönni' usëda queë' Jesús ga zoë', en gula'nábinë' Lë', ta'nnë':

—¿Bizx que ru'ilenu' bönachi didza' yugu' le rucúdzu'u didza'?

¹¹ Bubi'ë didza' Jesús, en rë' légaquië':

—Dios ru'ë libí'ili' lataj tséajni'ili' le nagachi' ca rinná bē'ë Lē' yehua' yubá, pero bōnachi ni bití' té'ëni ila'yéajni'í. ¹² Nu si' xtídzē'ë, Dios unōdzjē' que ia'lati', ate' gáta'da'arō que, pero nu bití' si' le, la's dui le dē que udúa. ¹³ Que lē ni na' ru'ílēna' légaquiē' didza' yugu' le rucúdzu'a didza', tu' tu'yúē' pero bití' ta'lé'enē'. Ta'yōnnē' pero bití' tu'zē nágagaquiē', en bití' ta'yéajni'inē'. ¹⁴ Caní raca quégaquiē' para gaca ca na' gunnē' Isaías, bōnni' bē'ë didza' uláz queē' Dios, gunnē':
Le nácatē yōnili' pero bití' tséajni'ili'.
Uyuli' iná'ali' pero bití' ilé'eli'.

¹⁵ Caní raca tu' nazidi ládxi'do'gaca bōnni' ni,
en bití' bi riyaza icja nágagaquiē'.
Nadzudi' guiōj lógaquiē',
para cabí ila'lé'enē' len guiōj lógaquiē' na'.
Bití' ulu'zē nágagaquiē',
en bití' ulu'zéajni'í ládxi'gaquiē',
en bití' ulu'huōáquiē' quia' neda'
para gaca una' légaquiē'.

¹⁶ 'Na'a, bica' ba libí'ili', tu' rilé'e guiōj loli',
en riyōni nágali'. ¹⁷ Le nácatē rea' libí'ili', zían
bōnni' gulu'ë didza' uláz queē' Dios en yugu' bōnni'
tsahui' gulé'ënnē' ila'lé'enē' le rilé'eli' libí'ili' pero
bití' bila'lé'enē' le. Gulé'ënnē' ila'yōnnē' le riyōnili'
libí'ili' pero bití' bila'yōnnē' le.

Riguíxjö'ë Jesús le bucúdzu'ë didza'

(Mr. 4:13-20; Lc. 8:11-15)

¹⁸ Gunnē' ca' Jesús:

—Buli'zē nágali' ca naca le bucúdzu'a didza' que bōnni' guz. ¹⁹ Núti'tēs nu riyōni didza' ca rinná bē'ë Dios yehua' yubá, en bití' réajni'í le, raca que

didza' riyöni nu na' ca guca que xisedo' na' gulasi ra' nöza. La' za'të tu' xihui', en rugúa didza' na' guyú'u icja ládxi'da'ahuë' bönni' na'. ²⁰ Xisedo' na' gulasi luyú ga rö'ö guiöj rulu'í ca raca queë' bönni' riyönnë' didza' na', en la' ruzëtë náguië' lu yöl-la' rudzeja queë', ²¹ pero ca na' biti' ridía' xisedo' na' tu' cabí dë ga gun luí, lësca' caní raca queë' bönni' ni. Cate' idxín tu le usaca' zi' lë', ate' ila'bía ná gaca bönachi lë' tu' nazí' lu në'ë didza' na', la' gacatë chopa ládxe'ë. ²² Xisedo' na' gulasi ga na' bulu'lén lubá yötsi' rulu'í ca raca queë' bönni' na' riyönnë' didza' na', pero ru'í ládxe'ë yugu' le dë yödzölió ni, ate' nazí' yë'ë bönni' na', tu' ru'í ládxe'ë yugu' yöl-la' tsahui' que. Yugu' lë ni ta'röli didza' na', en tun ga biti' gun dxin lu icja ládxi'da'ahuë'. ²³ Xisedo' na' gulasi luyú bëbu rulu'í ca raca queë' bönni' riyönnë' didza' na', en réajni'inë' le, ate' run dxin didza' na' lu icja ládxi'da'ahuë'. Nácagaca bal-la bönachi ca xisedo' na' bulu'nödzej ia'tú gayuá'tërö ca'. Nácagaca ia'zícá'rö bönachi ca xisedo' na' bulu'nödzej ia'tsónnalalaj ca', ate' nácagaca ia'zícá'rö bönachi ca xisedo' na' bulu'nödzej ia'chí uruá' ca'.

Tu guíxi'do' cané le nalá' ca rilá' yöla zxoá' xtila

²⁴ Ia'tú le bucúdzü'ë didza' Jesús, ate' rë' légaquië':

—Ca gaca cate idxín ni le rinná bë'ë Dios yehua' yubá naca ca guca que xisedo' dxi'a le guzë' tu bönni' ga naca lu xiyúë'. ²⁵ Tsanni na' tasië' bönni' nacu'ë lidxë', bidxín tu nu biti' rilé'e xan yu'u na' dxi'a, ate' yöjözä lu xiyúë' xisedo' guíxi'do' cané le nalá' ca naca yöla zxoá' xtila, ate' böaj xilataj. ²⁶ Cate' gulén zxoá' xtila na', en gurö'ö do que, ga na' dxía xui'i, ní'irö gulaca bë' guíxi'do'

cané na'. ²⁷ Ní'irö bila'dxinë' bönni' huen dxin ga zoë' bönni' xan la' yëla na', en të' lë': "Xan, channö guzu' xisedo' dxi'a lu yu quiu', ¿nacxi guca gula'lén guíxi'do' cané na'?" ²⁸ Xan yu na' gudxë' légaquië', rnnë': "Tu bönni' biti' rilé'enë' neda' dxi'a benë' caní." Ní'irö gula'nábinë' huen dxin queë' lë', ta'nnë': "¿Ba rë'ënu' tséajtu' tsöjölajtu' guíxi'do' cané na'?" ²⁹ Xángaquië' rë' légaquië': "¡Biti' ca! Nadx ca' cate' iládzu'li' guíxi'do' cané na', iládzu'lentëli' ca' yöla xzoa' xtila. ³⁰ Gácarö dxi'a gü'ili' lataj ila'zxöngarö tsözxön cate' idxinrö dza tsöjtúbiru' le, ate' ní'irö guía' nupa ulu'tubi le: Buli'tubi zí'alö guíxi'do' cané na', en guli'guga' tsöjxili huéaj para uzégui'ru' le, ate' ní'irö utúbili' xzoa' xtila lu yu'u quia'."

*Rucúdzu'ë didza' Jesús ca naca que xisé mostaza
(Mr. 4:30-32; Lc. 13:18-19)*

³¹ Ia'tú le bucúdzu'ë didza' Jesús, ate' rë' légaquië':
—Ca gaca ga idxín le rinná bë'ë Dios yehua' yubá, gaca ca raca que tu xisé mostaza, le guzë' tu bönni' ga naca lu xiyüë'. ³² Le nácatë xisé mostaza na' nácatërö cuidi' ca yúgu'të xisedo' ia'zícá'rö, pero cate' chinadúz, rizzöntërö ca yúgu'të guixi' cuan, en rizzön ca naca tu yaga, ate' ta'dxinba' biguínido', en tunba' xicá'agacaba' lu ni'a në'e.

*Rucúdzu'ë didza' Jesús que cúa zi que yöta xtila
(Lc. 13:20-21)*

³³ Ia'tú le bucúdzu'ë didza' Jesús, ate' rë' légaquië':
—Ca gaca ga idxín le rinná bë'ë Dios yehua' yubá gaca ca le run cúa zi que yöta xtila, le buchíxinu tu nigula len tsonna libixi yöjza xzoa' xtila, ate' guyazxa idútë cúa na'.

*Le rě'eni gun le rucúdzu'ë didza' Jesús
(Mr 4:33-34)*

³⁴ Yúgu'të lë ni bucúdzu'ë didza' Jesús, le bé'lenë bönachi nacuá' ni' didza', en bití' bi didza' bé'lenë légaquië' le cabí bucúdzu'ë didza'. ³⁵ Caní benë para gaca lë na' buzúajë' lu guichi tu bönni' bë'ë didza' uláz queë' Dios, gunné':
Gu'a didza' yugu' le ucúdzu'a didza'.
Innía' yugu' le nagachi' cate' ni' gusí lo si' guta' yödzölió.

Rigúxjö'ë Jesús le bucúdzu'ë didza' que guíxi'do' cané

³⁶ Ní'irö buzenë' Jesús bönachi nacuá' ni' didza', en gusöl-lë'ë légaquië', ate' guyu'ë yu'u. Ní'irö bila' dxiné' bönni' usëda queë' ga zoë', en tē' Lë':
—Gudíxjöi'i netu' le rě'eni inná lë na' bucúdzu'u didza' que guíxi'do' cané le nalá' ca naca yöla xzoa' xtila.

³⁷ Bubi'ë didza' Jesús, ate' rë' légaquië':
—Bönni' razë' xisedo' dxi'a naca' neda', Bönni' Guljë' Bönachi. ³⁸ La' yëla na' naca yödzölió ni, ate' xisedo' dxi'a na' tu'luí'i ca nácagaca nupa nabábagaca ga rinná bë'ë Dios. Guíxi'do' cané na' le nalá' ca naca yöla xzoa' xtila tu'luí'i ca nácagaca nupa néquiquequi que tu' xihui'. ³⁹ Nu na' bití' rilé'e dxi'a xan la' yëla na', en yöjözä guíxi'do' cané na', tu' xihui' caz naca. Dza ulu'tubë' na' ruluí'i ca gaca dza údxi que yödzölió ni, ate' nupa na' tu'tubi nácagaca gubáz lá'ayi queë' Dios. ⁴⁰ Ca na' guca, bulu'tubë' guíxi'do' cané na', en bulu'zégui'ë le lu guí', lësca' caní gaca cate' údxi que yödzölió ni. ⁴¹ Neda', Bönni' Guljë' Bönachi, isöl-la'gaca'-në' gubáz lá'ayi quia', ate' ulu'béajë' ga rinná bë'ë Dios

yúgu'tè nupa tun ga tun dul-la' luzě'eguequi, enca' nupa tuá' dö'. ⁴² Yugu' gubáz lá'ayi na' ila'gu'ě bönni' tuá' dö' na' lu guí' gabila. Ni' ila'bödxě', en ulu'tíl-la láyi'gaquiě'. ⁴³ Ní'irö ila'yěpi yösa bení' bönachi tsahui', en ilácagaquiě' ca gubidza ga ni' rinná bě'ě Dios yehua' yubá. Nu zoa nagui, en riyöni ral-la' uzě nagui.

Rucúdzu'ě didza' Jesús que tu yöl-la' tsahui' nagachi'

⁴⁴ Lěsca' caní bucúdzu'ě didza' Jesús, rnně':

—Le rinná bě'ě Dios yehua' yubá naca ca tu yöl-la' tsahui' nagachi' tu la' yěla. Cate' bidzölině' tu bönni' le, bucáchě'ě le leyúbölö ga na' bigachi', ate' lu yöl-la' rudzeja queě' guyijě', yöjěti'ě yúgu'tè le dē queě' ate' gú'uě' la' yěla na' para gata' yöl-la' tsahui' na' queě'.

Rucúdzu'ě didza' Jesús que tu bugá le nazáca'da'

⁴⁵ Gunně' ca' Jesús:

—Ca ral-la' sě lądxi'li' le rinná bě'ě Dios yehua' yubá naca ca beně' tu bönni' rá'uě', en ruúti'ě, en riguiljě' bugá nazáca'gaca. ⁴⁶ Cate' bidzölině' tu bugá le nazáca'da', guyijě', yöjěti'ě yúgu'tè le dē queě', ate' gú'uě' bugá na'.

Rucúdzu'ě didza' Jesús que tu yöxaj böla

⁴⁷ Lěsca' caní gunně' Jesús:

—Ca gaca ga ridxín le rinná bě'ě Dios yehua' yubá, gaca ca run tu yöxaj böla le ta'chiljě' bönni' lu nísado', le röjxí' zían böla izá'a. ⁴⁸ Cate' chibidzá' yöxaj na', bulu'béajě' le luyú bidxi ra' nísado' na', ate' gula'bö'ě ni', en gula'gu'ě-ba' yugu' böla dxi'a tu lu ga'böra, pero gula'ru'uně'-ba' yugu' böla

cá'asö. ⁴⁹ Lësca' caní gaca cate' údxi que yödzülió ni. Ila'rúajë' gubáz lá'ayi queë' Dios, ate' ulu'béajë' quez yugu' bönachi tsahui', ate' ulu'cuítië' légaquië' ladaj bönachi tuá' dö'.

⁵⁰ 'Ní'irö ila'gu'ë bönachi tuá' dö' na' lu guí gabila. Ni' ila'bödxë', en ulu'tíl-la láyë'ë.

Yöl-la' tsahui' le naca gula, en le naca cubi

⁵¹ Ní'irö Jesús gunábinë' yugu' bönni' uséda queë', rnnë':

—¿Ba réajni'ili' yúgu'të lë ni?

Bulu'bi'ë didza', të' Lë':

—Ön, Xan.

⁵² Jesús gudxë' légaquië':

—Cate' tu bönni' yudo' usedi chinazí' lu në'ë le rinná bë'ë Dios yehua' yubá, náquië' ca tu bönni' xan yu'u, rubéajë' ladaj yöl-la' tsahui' queë' le naca cubi, en le naca gula, le nácagaca tsahui' le ruzi'ë xibé.

Le benë' Jesús lu yödzö Nazaret

(Mr. 6:1-6; Lc. 4:16-30)

⁵³ Cate' budxi bucúdzü'ë Jesús yugu' didza' ni, buzë'ë ni'. ⁵⁴ Cate' budxinë' ladzë', busédinë' bönachi nacua' lu yu'u ga tu'dubë' bönni' judío, en tu'sedë' queë' Dios, ate' bulu'bábinë', ta'nnë':

—¿Gazxi caz guzëdë' bönni' ni yöl-la' réajni'i ni? ¿Nacxi caz naca, runë' yugu' yöl-la' huáca ni?

⁵⁵ Náquië' bönni' ni zxi'inë' bönni' gubëdxi yaga, ate' xinë'ë lënu María. Náquië' böchi'gaquië' Jacobo, en José, en Simón, en Judas. ⁵⁶ Lësca' nigula zanë' nacua'lennu rë'u ni. ¿Gazxi caz guzëdë' yúgu'të lë ni?

⁵⁷ Que lë ni na' gulaca chopa lãdxi'gaquië', ate' bulu'cá'anë' Lë'. Ní'irö Jesús gudxë' légaquië':

—Yúgu'të bönachi tun bal tu bönni' ru'ë didza' uláz queë' Dios, pero bönachi uládz queë', en bönachi nacúa' lidxë' biti' tun lë' bal.

⁵⁸ Que lë ni na' biti' benë' Jesús zían yöl-la' huáca ni', tu' cabí ta'yéajlë'ë Lë'.

14

Ca bëtgaquie' Juan, bönni' buquile' bönachi nisa
(Mr. 6:14-29; Lc. 9:7-9)

¹ Lu dza ni', biyönnë' Herodes, bönni' rinná bë'ë luyú Galilea, ca nácgaca yugu' yöl-la' huáca runë' Jesús. ² Herodes na' gudxë' yugu' ni'a në'ë, rnnë':

—Bönni' na' Juan, bönni' buquile' bönachi nisa. Chibubanë' lu yöl-la' guti. Que lë ni na' dë lu në'ë yöl-la' huáca zxon na'.

³ Caní gunné' Herodes tu' gusöl-lë'ë lë cazë' bönni' gula'zönë' Juan, en gulúgui'ë lë' du guié, ate' gula'gu'ë lë' lidxi guié tu' gú'uninu Herodías ilunë' caní. Herodías na' gúcanu nigula queë' Felipe, böchë'ë Herodes na'. ⁴ Caní benë' Herodes, tu' gudxë' Juan na' lë': "Biti' ral-la' sóalenu'-nu."

⁵ Que lë ni na' gú'unnë' Herodes gútië' Juan, pero gúdxinë' ila'dá'baga' bönachi lu yödzo ni' lë', tu' téquiguequi bönachi náquië' Juan na' tu bönni' ru'ë didza' uláz queë' Dios. ⁶ Ní'irö cate' guca laní que dza guyé'enë' iz Herodes, birúajbi' bi'i nigula queënu Herodías na', en buyá'abi' lógaca nupa nacúa' laní na', ate' guyaza lãdxë'ë Herodes le benbi'. ⁷ Guzxí' lu në'ë Herodes, en benë' tsutsu xtídzë'ë unödzejë' queëbi' bíti'tës bi inábibi' lë'. ⁸ Tu' chibusédinu-bi' zí'alö xiná'abi', gúdxibi' lë':

—Benna quia' na'a icjē' Juan, bönni' buquile' bönachi nisa. Gulú'u le tu lu zxiga' zxön.

⁹ Ní'irö bu'innē' Herodes, pero tu' chibenē' tsutsu xtídzē'ë, en tu' bila'yöni nupa te'aj tágulen lē', que lē ni na' gunná bé'enē' nu tsöjñodzaj icjē' Juan na' queēbi'. ¹⁰ Caní guca, gusöl-lē'ë nu tsöjrixí yenē' Juan ga ni' yu'ë lidxi guié. ¹¹ Bönni' na' nasöl-lē'ë bu'ë icjē' Juan na', zxoá lu zxiga' zxön, ate' bunödzjē' le queēbi' bi'i nigula na', ate' lēbi' buá'abi' le queēnu xiná'abi'.

¹² Ní'irö bila'dxinē' bönni' gula'dē'ë Juan na', ate' bulu'ú'ë lē', en bulu'cáché'ë lē'. Gudödi ni', yöjtíxjöi'iguequinē' Jesús ca gulaca lē ni.

*Jesús rugahuē' zíanrö ca chi-un gayuá' bönachi
(Mr. 6:30-44; Lc. 9:10-17; Jn. 6:1-14)*

¹³ Cate' réquibe'enē' Jesús lē ni, buzē'ë ni', ate' gurenē' tu lē'e bárcodo', en sa'yéajē' la' queēzē' tu lataj cá'asö. Cate' bila'yöni bönachi zéajē' ni', bila'rúaj yugu' yödzö ni', en yöjaca ga ni' idxinē' Jesús, ta'zē'e ní'aguequi. ¹⁴ Cate' burúajē' Jesús lē'e barco, bilé'enē' nacuá' bönachi zían ni', ate' buéchi' ládxē'ë léguequi, en bunē' nupa te'e, nútsa'gaca ládjaguequi. ¹⁵ Cate' chiridzö' dza na', bila'dxinē' yugu' bönni' usēda queē Jesús ga zoē', en tē' Lē':

—Chiridzö' na'a, ate' cá'asö naca lataj ni. Busöl-la' bönachi ni para tsöjaca gapa dē yödzödo' para gá'ugaca bi ilagu.

¹⁶ Ní'irö Jesús gudxē' légaquiē':

—Biti' run bayudxi tsöjáquiē'. Buli'nödzaj libí'ili' le ilahuē'.

¹⁷ Ní'irö tē' Lē':

—Gáyu'sö yöta xtila dë, en chópasöba' böla dëba' queëtu' ni.

¹⁸ Jesús rë' légaquië':

—Buli'dödi le lu na'a.

¹⁹ Ní'irö Jesús gunná bé'enë' bönachi na' ila'bö' ga yu'u daca'. Gudödi na' gudélé'ë gayu' yöta xtila na', en chópaba' böla na', ate' guchisa lahuë', ruyúë' zaca' yehua' yubá. Gudxë' Dios: "Xclenu'." Ní'irö buzzuxjë' yöta xtila na', en budödë' le lu ná'agaquië' bönni' usëda queë', ate' légaquië' gula'guisië' le lógaca bönachi zían na'. ²⁰ Gulahuë' yúgu'tëgaquië', en bulu'huöljanë'. Ní'irö bulu'tubë' yugu' bizxaj nagá'anagaca, en bulu'lié' chinnu ga'böra. ²¹ Bönni' ni' gulahuë' guláquië' idú chi-un gáyu'ë, pero cuntú nu bulaba yugu' nigula, en bí'ido'.

Jesús rizë'e ni'ë lu nísado'

(Mr. 6:45-52; Jn. 6:16-21)

²² Ní'irö la' bentë' Jesús ga gula'benë' bönni' usëda queë' lë'e bárcodo', en tsöjáquië', ila'nöruë' lahuë' Lë', para ila'dödë' ia'tsölá'a nísado' ni', tsanni na' uzenë' Lë' bönachi nacua' ni' didza'. ²³ Cate' chibusöl-lë'ë Jesús bönachi na', gurenë' tu lu guíado' ga ni' yöjsóë' tuzë'. Ni' bulidzë' Dios. Cate' chigul-la, tuzë' zoë' ni'. ²⁴ Bárcodo' ga na' nacué' bönni' usëda queë' ridödi gatsaj láchui'lö nísado' na', ate' riyasa bárcodo' na' tu' riyasa ridxía nísado' na', ate' ruzaga' bö' recja barco na'. ²⁵ Gudödi guluhuëla, gubígui'ë Jesús gala' ga na' nacué', rizë'e ni'ë lu nísado'. ²⁶ Cate' yugu' bönni' usëda queë' bila'lé'enë' Lë', rizë'e ni'ë lu nísado', gula'bö'dë'ë böniga tu' tádxinë'. Gula'bö'dxi'ë, ta'nnë':

—Tu' ridasö na'.

²⁷ Ní'irö Jesús la' bulidztë' légaquië', rnnë':

—Buli'zxöni ládxi'li'. Neda' ni. Biti' gádxili'.

²⁸ Ní'irö bubí'ë didza' Pedro, rë' Jesús:

—Xan, channö nacu' Li', gunná be'e neda' guída' ga na' zu' lu nisa.

²⁹ Jesús gudxë' lë':

—Gudá.

Ní'irö bötjë' Pedro lë'e bárcodo' na', en guzë'e ni'ë lu nísado', sa'yéajë' ga na' zoë' Jesús. ³⁰ Ní'irö cate' bilé'enë' Pedro ca bö' na' recja rutá nisa, gúdxinë'. Ní'irö gusí lahuë' rötjë' lu nisa, ate' gurödxí'ë. Bulidzë' Jesús, rnnë':

—Xan, busólá neda'.

³¹ Jesús la' bulitë në'ë. Buguélë'ë lë', en rë' lë':

—Látí'sö réajlë'u neda'. ¿Bizx que guca chopa ládxi'u?

³² Cate' bulu'benë' lë'e bárcodo' na', gurö'ö dxi bö' na' recja. ³³ Ní'irö bönni' nacu'ë lë'e bárcodo' na' gula'yéaj ládxi'gaquië' Jesús, ta'nnë':

—Le nácatë, Zxí'inë' Dios nacu'.

Jesús ruúnë' yugu' bönni' huë' nacu'ë yödzö Genesaret

(Mr. 6:53-56)

³⁴ Cate' chigula'dödë' ia'tsölá'a nísado' na', la' bila'dxintë' lu xiyú yödzö Genesaret. ³⁵ Cate' bulu'únbë'ë bönni' yödzö ni' Jesús, gula'sól-lë'ë didza' idútë luyú ni', ate' dujuá'gaquië' yúgu'të nupa te'e ga na' zoë' Jesús. ³⁶ Guláta'yuë' lahuë' Jesús gu'ë légaquië' lataj ila'gansë' ruí'i lari' nácuë', ate' la' bulu'huöácatë yúgu'të nupa na' bila'gán lari' na'.

15

Le tun ga biti' nácaru' tsahui' lahuë' Dios (Mr. 7:1-23)

¹ Ní'irö yugu' bönni' yudo' fariseo, en bönni' yudo' tu'sédinë', narúajgaquië' Jerusalén, bila'dxinë' ga zoë' Jesús, ate' të' Lë':

² —¿Bizx que tunë' bönni' usëda quiu' le ridödi bë' ca naca le nulaga loru' runru' ca gulunë' xuz xtó'oru'? Biti' ta'guíbi në'ë ca naca que yudo' cate' si' ilahuë'.

³ Bubi'ë didza' Jesús, en gunábinë' légaquië', rnnë':

—¿Bizx que libí'ili' ca' rucá'anali' cá'asö xibá queë' Dios para gunli' le nulaga loli' runli'? ⁴ Caní raca, tu' gunná bé'enë' Dios libí'ili', gunné': "Ben bal xuz xino'o", en gunné' ca': "Nu innë' zi' que xuz xinë'e, tsaz gati nu na'." ⁵ Pero libí'ili' rn-nali': "Channö nu guié xuz xinë'e: Biti' bi gaca gunna' quiu' tu' chiguzxí' lu na'a gunna' yúgu'të queë' Dios, ⁶ bíti'rö bi run bayudxi gun nu na' que xuz xinë'e." Caní runli', rucá'anali' cá'asö le gunná bë'ë Dios, para gunli' le nulaga loli' runli'.

⁷ Libí'ili', bönni' rulu'isö tsahui' cuinli', idú ca nácali' gudíxjö'ë Isaías, bönni' bë'ë didza' uláz queë' Dios, gunné':

⁸ Bönni' ni, len rú'agacsë' tunë' neda' bal, en calëga idú ládxi'gaquië'.

⁹ Nítisö naca le ta'yéaj ládxi'gaquië' neda', tu' tu'sédinë' yugu' le gula'nná bë' bönachi.

¹⁰ Ní'irö bulidzë' Jesús bönachi nacué' ni', en rë' léguequi:

—Buli'zë' nágali' le guía' libí'ili', en guli'tséajni'i.

¹¹ Calëga le riyaza ru'ë nu bönni' run ga biti' náquië'

tsahui' lahuë' Dios, pero le rirúaj ru'ë, lë ni run ga bití' náquië' tsahui' lahuë' Dios.

¹² Ní'irö yugu' bönni' usëda queë' Jesús gula'bígui'ë ga zoë', en të' Lë':

—¿Naru' nöztsenu' gula'lenë' yugu' bönni' yudo' fariseo cate' bila'yönnë' didza' ni bë'u?

¹³ Ní'irö bubi'ë didza' Jesús, en rë' légaquië':

—Yúgu'të le nadúz, le cabí guzë' Xuza' zoë' yehua' yubá, huadúl jagaca idú luí. ¹⁴ Buli' cá'ana légaquië'. Chinachúl-la lógaquië', en ta' chë'ë nupa nachul-la lógaca. Channö tu bönni' lo chul-la ichë'ë ia'tué' bönni' lo chul-la, iropë' ila'bixë' tu lu yeru.

¹⁵ Ní'irö bubi'ë didza' Pedro, en rë' Jesús:

—Buzéajni'i netu' lë ni rucúdz'u didza'.

¹⁶ Jesús rë' légaquië':

—¿Naru' cabí réajni'itseli' ca' libí'ili'? ¹⁷ ¿Naru' cabí réajni'itseli' riyaza lë'ëru' yúgu'të le riyaza ruá'aru', ate' rurúaj lë'ëru'? ¹⁸ Na'a, le rirúaj rúa'ali', lu icja ládxi'do'oli' za', ate' lë ni run ga bití' nácali' tsahui' lahuë' Dios. ¹⁹ Caní raca, tu' ta'lén lu icja ládxi'do'oli' yugu' le rizá' ládxi'li' le ruá' dö', le ilún ga gútili' bönachi, en le ilún ga quítsjali' xibá que yöl-la' nutsaga na', en le ruá' dö' runli', en yugu' le rizë ládxi'li' cuanli', en yugu' le rinnëli' que luzá'ali' le cabí nácate, en yugu' le rinnë xíhuili'. ²⁰ Yugu' le caní tun ga bití' náquië' tu bönni' tsahui' lahuë' Dios, pero channö cabí nayari në'ë ca naca que yudo' cate' bi gahuë', bití' gun ga bití' náquië' tsahui' lahuë' Dios.

*Tu nigula izá'a réajlë'ënu Jesús
(Mr. 7:24-30)*

21 Ní'irö buzë'ë Jesús ni', en guyéajë' lu xiyú yödzö Tiro, en yödzö Sidón. 22 Tu nigula nabábanu luyú Canaán birúajnu yödzö ni', ate' bë'ënu zidzaj didza', rënu Jesús:

—Xan, zxí'ini xi'sóë' David, buéchi' ladxi' neda'. Bi'i nigúlado' quia' riguí'i rizáca'da'abi' tu' yu'u bö' xihui' lëbi'.

23 Biti' bi didza' bubi'ë Jesús. Ní'irö gula'bígui'ë bönni' usëda queë' ga zoë', ate' gulë' Lë', ta'nnë':

—Busöl-la'-nu, tu' zá'anu cúdzuru' ribödxianu.

24 Ní'irö bubi'ë didza' Jesús, ate' rë'ë-nu:

—Dios nasöl-lë'ë neda' gácalena' bönachi Israel, nupa náca'gaca ca bö'cu' zxíla'do' nanítigacaba'.

25 Ní'irö gubíga'nu nigula na' ga zoë' Jesús, en guyéaj ládxi'nu Lë', ate' rënu Lë':

—Xan, gúcalen neda'.

26 Bubi'ë didza' Jesús, rnnë':

—Biti' naca dxi'a ugúaru' yöta quégacabi' bí'ido', en chú'unaru' le lógacaba' bö'cu'do'.

27 Ní'irö nigula na' rënu Jesús, rnnanu:

—Ön, Xan, pero táguba' bö'cu'do' na' le bizxaj tu'huóxaj ga tagu xángacaba'.

28 Ní'irö bubi'ë didza' Jesús, rnnë':

—Nigúlado'. Idú naca ca réajlë'u neda'. Gaca quiu' ca rë'ënnu'.

La' ní'isö böácatëbi' bi'i nigúlado' queënu.

Jesús ruínë' zían nupa te'e

29 Ní'irö buzë'ë Jesús ni', en gudödë' ga naca ra' nísado' que Galilea. Gurenë' tu lu guí'ado', ate' gurö'ë ni'. 30 Bönachi zían dujuá'gaquië' nupa bití' guca ila'zá', en nupa nachul-la guiöj lógaca, en nupa bití' guca ila'nnë', en nupa narugu

ni'a ně'eguequi, en ia'zica'rö zían nupa te'e, ate' gula'guíxaj léguequi xini'ë Jesús, ate' Lë' bunë léguequi. ³¹ Bulu'bani bönachi ni' ca naca le benë Jesús, tu' bila'lé'e tu'nnë nupa biti' guca ila'nnë, ate' nuhuöácagaca nupa gurugu ni'a ně'eguequi, ate' tu'zá' nupa biti' guca ila'zá', ate' tu'lé'e nupa guchul-la lógaca. Que lë ni na' gula'gu'ë yöl-la' ba Dios quégaca bönachi Israel.

*Jesús rugahuë' zíanrö ca choá' gayuá' bönachi
(Mr. 8:1-10)*

³² Ní'irö Jesús bulidzë' yugu' bönni' usëda queë', en rë' légaquië':

—Ruhuechi' ládxa'a bönachi zían ni, tu' chiguca tsonna dza zá'lenguequi neda', en biti' bi dë le ilagu. Biti' rë'ënda' usöl-la'gaca-në' tsöjhuöájgaquië' lídxigaquië' ta'dunsë' ca', nadxi ca' udú ládxi'gaquië' la' nöza.

³³ Ní'irö yugu' bönni' usëda queë' të' Lë', ta'nnë':

—¿Gazxi caz idzölitu' yöta xtila zían lu lataj cá'asö ni, le ugágutu' bönachi zían ni?

³⁴ Gunábinë' Jesús légaquië', rnnë':

—¿Bal-laxi yöta xtila dë queëli'?

Bulu'bi'ë didza', ta'nnë':

—Gadxi, ate' nabábasöba' böla cuidi' dëba' queëtu' ni.

³⁵ Ní'irö Jesús gunná bé'enë' bönachi zían na' ila'bö' lu yu. ³⁶ Gudélë'ë gadxi yöta xtila na', en yugu' böla na', ate' gudxë' Dios: "Xclenu'." Ní'irö buzzuzxjë' iroptë na', en bunödzejë' quégaquië' bönni' usëda queë', ate' légaquië' gula'guísië' le lógaca bönachi zían na'. ³⁷ Gulahuë' yúgu'të', en bulu'huöljanë'. Gudödi ni' bulu'tubë' le bizxaj

nagá'anagaca, ate' bulu'lié' gadxi ga'böra. ³⁸ Yugu' bönni' na' gulahuë' nácagaquië' choá' gáyu'ë, pero cuntu nu bulaba yugu' nigula, en bí'ido'. ³⁹ Ní'irö busöl-lë'ë Jesús bönachi na' tsöjhuöajgaquië' lídxigaquië', ate' gurenë' lë'e bárcodo' ni', en sa'yéajë' lu xiyú yödzo Magdala.

16

Ta'nábinë' Jesús gunë' tu le gaca bë' nuzxi náquië'
(Mr. 8:11-13; Lc. 12:54-56)

¹ Ní'irö yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'zí' bë'ë Lë', ate' gula'nábinë' Lë' gunë' tu le gaca bë' ga za' yöl-la' unná bë' queë'. ² Bubi'ë didza' Jesús, en rë' légaquië':

—Cate' ridzó', rnnali' caní: “Gun dxi'a cuxó, tu rö'ö böaj xiná lúzxiba.” ³ Cate' naca zílado', rnnali' caní: “Biti' gun dxi'a na'a dza tu' rö'ö böaj xiná, en ruchul-la lúzxiba.” Libí'ili', bönni' ruluí'isö tsahui' cuinli'. Raca innë' ya'ali' naca gun lúzxiba, pero bití' gaca tséajni'ili' le tu'sedi le taca dza ni zóaru' na'a. ⁴ Yugu' bönachi tuá' dö' ni, en bití' zoa idú ládxi' gaca ta'nábini neda' guna' tu le gaca bë' Nu naca', pero bití' bi le gaca bë' ila'lé'enë'. Ila'lé'esinë' lë na' guca bë' ca guca queë' Jonás, bönni' bë'ë didza' uláz queë' Dios.

Ní'irö Jesús bucá'anë' légaquië', söhuöjë'.

Le tu'sédinë' bönni' yudo' naca ca cúa zi que yöta xtila
(Mr. 8:14-21)

⁵ Cate' bila'dxinë' ia'tsölá'a nísado' ni', guléquibe'enë' bönni' usëda queë' Jesús gulál-la

ládxi'gaquië' ilu'ë le ilahuë'. ⁶ Ní'irö Jesús gudxë légaquië':

—Buli'yútsöca'. Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

⁷ Ní'irö la' légacasë' gulún xtídza'gaquië' bönni' usëda queë', ta'nnë':

—Rnnë' caní tu' cabí nuá'aru' yöta xtila.

⁸ Réquibe'enë' Jesús lë ni, ate' rë' légaquië':

—¿Bixx que run xtídza'li' la' lib'isili' tu' cabí nuá'ali' yöta xtila? Látido'os réajlë'ëli' neda'.

⁹ ¿Naru' cabí réajni'itseli', en biti' röjnétseli' ca guca quégaca gayu' yöta xtila ni', lë na' gulahuë' chi-un gáyu'ë bönni', ate' tsca xö ga'böra butúbili'? ¹⁰ ¿Naru' cabí röjnétseli' ca' ca guca quégaca gadxi yöta xtila ni', lë na' gulahuë' choá' gáyu'ë bönni', ate' tsca xö ga'böra butúbili'? ¹¹ ¿Naru' cabí réajni'ili'? Biti' bë'a didza' que yöta xtila cate' gudxa' lib'ili' gun chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

¹² Ní'irö gula'yéajni'inë' biti' gudxë' Jesús légaquië' ilún chi'i cuíngaquië' que cúa zi que yöta xtila, pero ral-la' ilún chi'i cuíngaquië' que le tu'sédinë' yugu' bönni' yudo' fariseo, en yugu' bönni' yudo' saduceo.

Pedro rnnë' Jesús náquië' Cristo

(Mr. 8:27-30; Lc. 9:18-21)

¹³ Cate' bidxinë' Jesús lu xiyú yödzö Cesarea, ga na' rinná bë'ë Filipino, gunábinë' yugu' bönni' usëda queë', rnnë':

—¿Bizxi ta'nná bönachi nu naca' neda', Bönni' Guljē' Bönachi?

¹⁴ Bulu'bi'ë didza', ta'nnē':

—Bal-lē' ta'nnē': “Juan nacu', bönni' ni' buquile' bönachi nisa.” Ia'zica'rē' ta'nnē': “Elías nacu', bönni' ni' bē'ë didza' uláz queē' Dios dza ni'te.” Ia'zica'rē' ta'nnē': “Jeremías nacu', o ia'tué' bönni' bē'ë didza' uláz queē' Dios.”

¹⁵ Ní'irö Jesús gudxē' légaquiē':

—Naru' libí'ili', ¿nuzxi rnnali' naca' neda'?

¹⁶ Bubi'ë didza' Simón Pedro, en rē' Lē':

—Li' nacu' Cristo, Zxí'inē' Dios ban.

¹⁷ Bubi'ë didza' Jesús, rē' lē':

—Bica' xibó' li', Simón, zxí'inē' Jonás, tu' cabí buluí'inē' nu bönni' li' lē' ni. Xuza' zoē' yehua' yubá buluí'inē' li' lē' ni. ¹⁸ Neda' rea' li', li' nacu' Pedro, ate' lu guiōj ni ucuá'a nupa ulu'dubi quia', ate' yöl-la' unná bē' que tu' xihui' bití' sequi' uzaga' xinōzgaquiē'. ¹⁹ Gunna' quiu' yugu' zxí'ini guíē' que lataj ga rinná bē' Nu zoa yehua' yubá. Le inná bē'u luyú ni, chigunná bē' ca' Nu na' zoa yehua' yubá, ate' le gu'u lataj gaca luyú ni, chibé' lataj gaca lē' na' Nu na' zoa yehua' yubá ni'.

²⁰ Ní'irö Jesús gunná bé'enē' yugu' bönni' usēda queē' cuntú nu ilē'ë náquiē' Lē' Cristo.

Jesús rigu'xjö'ë ca si' ilútiē' Lē'

(Mr. 8:31-9:1; Lc. 9:22-27)

²¹ La' dza ní'isö gusí lahuē' Jesús rigu'xjöi'inē' yugu' bönni' usēda queē' run bayudxi tsejē' Jerusalén, ga ni' yugu' bixúz unná bē' en bönni' gula tu'zéajni'inē', en bönni' yudo' tu'sedinē' ulu'saca' zí'ë Lē', ate' ní'irö ilútiē' Lē', pero cate' gaca tsonna dza ubanē' lu yöl-la' guti. ²² Ní'irö

Pedro guchë'ë Jesús quez, en gusí lahuë' ridil-lë' Lë' didza', rnnë':

—Xan, bití' gu'ë Dios lataj. Bití' ca' gaca quiu' ca rno'.

²³ Ní'irö buécjë' Jesús, en rë' Pedro:

—Gucuita ga zoa'. Runu' ca run Satanás, tu' xihui'. Runu' ga gaca chopa ládxa'a tu' cabí naca le rizá' ládXu'u li' ca rizá' ládXë'ë Dios, pero ca ta'za'sö ládxi'gaca bönachi.

²⁴ Ní'irö Jesús gudxë' yugu' bönni' usëda queë', rnnë':

—Channö zoë' tu bönni' rë'enë' të'e neda', ral-la' uzöë' tsölá'alö yugu' le rë'ëni quëzinë', en gáquië' ca tu bönni' sa'yéajë' zeajtë'ë lë'e yaga cruz, ate' ní'irö gaca të'e neda'. ²⁵ Nu bönni' guë'ënnë' gun chi'ë yöl-la' na'bán queë', unítië' le, pero bönni' unítië' yöl-la' na'bán queë' tu' dë'ë neda', gata' yöl-la' na'bán idú queë'. ²⁶ ¿Naru' uzi'tsë' xibé tu bönni' channö utubë' yúgu'të le dë yödZölió ni pero unítië' yöl-la' na'bán idú queë'? Bití' bi gaca unödZjë' tu bönni' para gata' yöl-la' na'bán idú queë'. ²⁷ Caní rnnía', tu huöda' neda', Bönni' Guljë' Bönachi, en idzaga yöl-la' unná bë' queë' Xuza' Dios neda', ate' idzágagaquië' gubáz lá'ayi quia' neda'. Ní'irö ubi'a que queë' bönachi tsca naca le núngaca. ²⁸ Le nácatë rea' libí'ili: "Bití' ca' ilátigaca bal-la nupa nacuá' ni cate' ila'lé'erö idinná bë'a neda', Bönni' Guljë' Bönachi."

17

*Ridzá' ca nalá' lahuë' Jesús
(Mr. 9:2-13; Lc. 9:28-36)*

¹ Gudödi xopa dza, Jesús gudélë'ë Pedro len Jacobo, en Juan, böchë'ë Jacobo na', en guchë'ë légaquië', ate' yöjáquië' quez tu lu guí'a sibi. ² Ni' bidzá' ca nalá' lahuë' Jesús lógaquië'. Guyëpi yösa bení' lahuë' Jesús ca ruzení' gubidza, ate' lari' nácuë' böáca chiguíchido'os ca bení'. ³ Ní'irö bila'lé'enë' bönni' usëda queë' buluí'i lógaquië' Moisés, en Elías, ate' tuí'ilenë' Jesús didza'. ⁴ Ní'irö Pedro rë' Jesús:

—Xan, naca dxi'a zóaru' ni. Channö rë'ënu', guna' ni tsonna yu'u lága'do', tu quiu', ia'tú queë' Moisés, en ia'tú queë' Elías.

⁵ Tsanni ni' ru'ë Pedro didza' ni, la' gurö'ötë tu böaj bení' le guzxóa légaquië', ate' lu böaj na' biyön chi'i nu rnna:

—Bönni' ni Zxí'ini caza'. Nadxí'ida'-në', en raza ládxa'a Lë'. Buli'zë nágali' didza' gu'ë.

⁶ Cate' bila'yönnë' bönni' usëda queë' chi'i na', gula'dzö'ë gusurú'alö, en guladxi bila'dzöbinë'.

⁷ Ní'irö gubígui'ë Jesús ga na' nacué', ate' gudanë' légaquië', rnnë':

—Guli'chasa. Biti' gádxili'.

⁸ Cate' gula'chisa lógaquië', en bulu'yüë', cúnturö nu bila'lé'enë', pero tuzë' Jesús.

⁹ Cate' ni' tu'dínnië' lu guí'a na', Jesús gunná bé'enë' légaquië', rnnë':

—Cuntu nu guiéli' ca guca lë ni bilé'eli' cate' ubanra' lu yöl-la' guti neda', Bönni' Guljë' Bönachi.

¹⁰ Ní'irö yugu' bönni' usëda queë' gula'nábinë' Lë', ta'nnë':

—¿Bixx que ta'nnë' bönni' yudo' usëdi run bayudxi uluí'i lahuë' Elías zí'alö ca uluí'i lahuë' Cristo?

11 Bubi'ë didza' Jesús, rë légaquië':

—Le nácatë uluí'i lo cazë' zí'alö Elías, en ucá'anë tsahui' yúgu'të. 12 Neda' rea' libí'ili': "Chibu-luí'i lahuë' Elías na', pero biti' bulu'únbë'ë lë', ate' yúgu'të ca rnnasö quégaquië' gulunë' queë'." Lësca' caní ilunë' quia' neda', Bönni' Guljë' Bönachi, ulu'saca' zi'ë neda'.

13 Ní'irö gula'yéajni'inë' bönni' usëda queë', bë'lenë' Jesús légaquië' didza' ca guca queë' Juan, bönni' na' buquilë' bönachi nisa.

Ruúnë'-bi' Jesús tubi' bi'i bönni' ré'ebi' xjote'
(Mr. 9:14-29; Lc. 9:37-43)

14 Cate' bila'dxinë' ga na' nacua' bönachi zián, gubígui'ë tu bönni' ga zoë' Jesús, ate' buzóa zxibë' lahuë' Lë', 15 en rë' Lë':

—Xan, buéchi' ladxi'-bi' bi'i bönni'do' quia', tu ré'ebi' xjote', en rigu'í rizáca'da'abi', ate' zián luzuí ridzö'öbi' lu guí' o lu nisa. 16 Chidiguá'a-bi' lógaquië' bönni' usëda quiu' pero biti' guca ulu'únë'-bi'.

17 Bubi'ë didza' Jesús, rnnë':

—Libí'ili', bönachi cabí réajlë'ëli', en biti' nácali' tsahui'. ¿Gáca'xte caz ral-la' sóalena' libí'ili' para tséajlë'ëli' neda'? ¿Gáca'xte caz ral-la' guá' ilena' queé'li'? Guli'diguá'-bi' quia' ni.

18 Ní'irö Jesús buzenë' le bach bö' xihui' na' yu'u lëbi', ate' la' burúajtë lëbi', ate' la' ná'asö böácatëbi' bi'i bönni'do' na'.

19 Ní'irö, yugu' bönni' usëda queë' Jesús gula'biguë'ë quez ga zoë', ate' gula'nábinë' Lë', ta'nnë':

—¿Bizx que na' biti' guca ubéajtu' netu' bö' xihui' na'?

20 Jesús rë' légaquië':

—Biti' guzxéqui'li' tu' cabí réajlë'ëli' Dios idú ládxi'li'. Le nácatë rea' libí'ili', sal-la' cuídí'sö naca yöl-la' réajlë' queëli' Dios, nácatë ca tu xisedo' mostaza, huáca guiéli' guí'ado' ni: “Gucuíta ni, en yöjsóa ní'ilö”, ate' la' icuítatë guí'ado' na'. Biti' bi zoa le cabí gaca gunli' channö réajlë'ëli' Dios idú ládxi'li'. ²¹ Tu bö' xihui' caní gácasö ubéajli' channö ulídzali'-në' Dios, en gunli' gubasa.

Riguíxjö'ë Jesús leyúbölö ca si' ilútië' Lë'
(Mr. 9:30-32; Lc. 9:43-45)

²² Tsanni ni' ta'dë' luyú Galilea, Jesús gudxë' yugu' bönni' usëda queë', rnnë':

—Zoa nu udödi neda', Bönni' Guljë' Bönachi, lu ná'agaca bönachi. ²³ Ilútië' neda', pero cate' gaca tsonna dza Dios usubanë' neda'.

Ní'irö bulu'hui'innë' bönni' usëda queë'.

Jesús riguíxaj lazë' que yudo'

²⁴ Cate' bulu'dxinë' Jesús, en yugu' bönni' usëda queë' lu yödzö Capernaum, bila'dxinë' yugu' bönni' tu'quixjë' bönachi lázagaca que yudo' ga zoë' Pedro, ate' të' lë':

—¿Naru' cabí quixaj lazë' que yudo' bönni' rusédinë' libí'ili'?

²⁵ Bubi'ë didza' Pedro, rnnë':

—Ön, huaguixjë'.

Cate' buázië' Pedro lu yu'u, Jesús la' bulidztë' lë', en rë' lë':

—¿Nacxi rusaca' quiu', Simón? Bönni' ta'nná bë'ë luyú ni, ¿nupxi tu'quixjë' le riguíxaj laz, en laxzaj que yu? ¿Naru' tu'quixjë' bönachi uládz quégaquië' o bönachi izá'a?

²⁶ Bubi'ë didza' Pedro, rë' Lë':

—Bönachi izá'a tu'quixjë'.

Ní'irö Jesús rë' lë':

—Que lë ni na', bití' run bayudxi quíxaj laza' que yudo' tu' naca' Zxí'inë' Dios ca na' bití' bi ta'guíxaj nupa náca gaca bönachi uládz queë' bönni' na' ruquíxjë'. ²⁷ Na'a, para cuntú nu gun leru', guyéaj ra' nísado', yöjzalaj lu nisa le rizöninu'-ba' böla, ate' böla cueju'-ba' zí'alö, guxzí'i-ba'. Cate' isalju' ruá'aba', ni' idzölinu' tu dumí lásido'. Guxzí'i le, ate' gudíxaj laza', en lazu'.

18

¿Núzxilö gaca lo?

(Mr. 9:33-37; Lc. 9:46-48)

¹ La' dza ní'isö bila'dxinë' bönni' usëda queë' Jesús ga zoë', ate' gula'nábinë' Lë', ta'nnë':

—¿Núzxilë' bönni' ni gáquië' lo ga rinná bë'ë Dios yehua' yubá?

² Bulidzë'-bi' Jesús tubi' bi'i bönni'do', ate' buzöë'-bi' gatsaj láhui'lö ga na' nacu'ë. ³ Ní'irö rë' légaquië':

—Le nácatë rea' libí'ili', channö cabí huöácali' ca zeaj nácabí' bí'ido', bití' ca' tsú'uli' ga ni' rinná bë'ë Dios yehua' yubá. ⁴ Que lë ni na', núti'tës nu gaca nöxaj ladxi', en huöáca ca nácabí' bí'ido' ni, nu ni gaca lo ga ni' rinná bë'ë Dios yehua' yubá. ⁵ Núti'tës nu gun bal tubi' bí'ido' caní tu' néquibi' quia', neda' caz gun bal.

Le tun ga nu gun dul-la'

(Mr. 9:42-48; Lc. 17:1-2)

⁶ Gunnë' ca' Jesús:

—Nu gun ga gunbi' dul-la' tubi' bí'ido' caní réajlë'ëbi' quia', gácarö dxi'a queë' bönni' na' la'tu'

ugalë'ë guiöj riyëtuni yaga yenë', ate' tsöjsuladzu' cuinë' lu nísado'. ⁷ Bica' bayechi' bönachi yödzülió ni tun ga gun dul-la' luzé'eguequi. Nacuá'tica'sö le tun ga nu gun dul-la', pero bica' bayechi' nu run ga nu gun dul-la'.

⁸ Que lë ni na', channö gun no'o o ni'u ga gunu' dul-la', guchugu le, en gurú'una le. Gácarö dxi'a quiu' tsöjtsáziu' ga su' ibanu' biti' rizó'o o narugu ni'a no'o, en calëga nacuá' chopa no'o, en chopa ni'u ate' tsöjtsáziu' lu guí' gabila le catu caz ulu. ⁹ Channö gun guiöj lo' ga gunu' dul-la', guléaj le, en gurú'una le. Gácarö dxi'a quiu' tsöjtsáziu' ga su' ibanu', zoa tuz guiöj lo', en calëga nacuá' chopa guiöj lo', ate' tsöjtsáziu' lu guí' gabila.

Jesús rucúdzü'ë didza' que tu bö'cu' zxila' nanítiba'

(Lc. 15:3-7)

¹⁰ Gunnë' ca' Jesús:

—Guli'gún chi'i cuinli' para cabí uzóali'-bi' tsölá'alö tubi' bí'ido' caní. Neda' rea' libí'ili', gubáz lá'ayi tapa chi'ë légacabi' nacuá'tica'së' lahuë' Xuza' zoë' yehua' yubá. ¹¹ Bida' ni neda', Bönni' Guljë' Bönachi, para usölä' nu ni naniti.

¹² ¿Nacxi rusáca'li' queëli'? Tu bönni', nacuá'aba' tu gayuá' bö'cu' zxila' queë', channö nítiba' tuba', ¿naru' cabí ucá'anë'-ba' tápalalaj yu' chënnaba' na', ate' tsejë' gapa naca lu guí'a, para tsöjtiljë'-ba' bö'cu' zxíla'do' na' nanítiba'? ¹³ Channö udzölinë'-ba', le nácatë rea' libí'ili', udzëjarönë' ni'a queëba' bö'cu' zxíla'do' na' ca gunë' quégacaba' ia'tápalalaj yu' chënnaba' ni' biti' gula'nítiba'. ¹⁴ Lëasca' caní,

Xúziru' Dios, zoë' yehua' yubá, biti' rě'eně' nítibi' tubi' bí'ido' caní.

Ca ral-la' uniti loru' böchi' luzá'aru'
(Lc. 17:3)

¹⁵ Gunně' ca' Jesús:

—Channö böchi' luzó'o guá' dö' quiu', guyéajtsöca', en yöjca'analeně' tsahui' la' libí'isili'. Channö uzé náguiě' li', chibuguélu'u böchi' luzó'o.

¹⁶ Channö cabí uzé náguiě' xtídzu'u, guchě'ě ia'túě' o ia'chopě' bönni' para urúaj li xtídzu'u lógaquiě' chopa tsonnē' bönni', nupa gaca ilún ba nalí que xtídza'li'. ¹⁷ Channö cabí uzé náguiě' xtídza'gaquiě', gudxi ca' bönachi tu'dubi tu'sédi queě' Dios, en channö cabí uzé náguiě' xtídza'gaca bönachi na', ní'irö bönni' na' gáquiě' quiu' ca tu bönni' biti' réajlě'ě Dios, en ca tu bönni' ruquízxjě' uláz que yödzö zi'tu'.

¹⁸ 'Le nácatě rea' libí'ili', yúgu'tě le inná bě'ěli' lu yödzölió ni, naca le chigunná bě'ě Dios yehua' yubá, ate' yúgu'tě le güí'ili' lataj lu yödzölió ni, naca le chibě'ě lataj Dios yehua' yubá.

¹⁹ 'Lěsca' caní rea' libí'ili', channö chópasili' gun tuz xtídza'li' lu yödzölió ni ca naca tu le inábili'-ně' Dios, guně' Xuz caza' Dios, zoë' yehua' yubá, lě na' rinábili'-ně'. ²⁰ Ga nacué' chopa tsonna nupa ni nudúbigaca quia' neda', zoa caza' neda' gatsaj láhui'lö ga na' nacué'.

²¹ Ní'irö gubígui'ě Pedro ga zoë' Jesús, en gunábině' Lě, rnně':

—Xan, ¿bál-laxitě luzuí ral-la' uniti lahua' böchi' luzá'a, nu na' ruá' dö' quia'? ¿Naru' gadxi luzuí?

²² Jesús rě' lě':

—Neda' rea' li', calégasö gadxi luzuí, pero idú tsónnalalaj yu' chi cuía le naca gadxi luzuí.

Jesús rucúdzu'ë didza' que tu bönni' huen dxin biti' buniti lahuë' luzë'ë

²³ Gunnë' ca' Jesús:

—Ia'stú, ca gun Nu na' rinná bē' yehua' yubá naca ca benē' tu bönni' rinná bē'ë. Gú'unnē' ucá'analenē' tsahui' yugu' bönni' huen dxin queē'. ²⁴ Cate' gusí lahuë' rucá'analenē' légaquiē' tsahui', dujuá'gaquiē' ga zoē' tu bönni' ral-lē'ë queē' zían gayuá' dumí. ²⁵ Tu' cabí guca quizzjē', gunná bē'ë xanē' idó'ogaquiē' lē', en nigula queē', en yugu' bi'i queē', en yúgu'tē le dē queē', ate' ní'irö gazxaj le ral-lē'ë queē' xanē' na'. ²⁶ Ní'irö bönni' huen dxin na' buzóa zxibē' lahuë' xanē', en gunábinē' lē', rnnē': "Xan, ben zxon ládxu'u neda'. Huaguizxaj caza' li' idutē." ²⁷ Ní'irö xanē' na' buéchi' ládxē'ë bönni' huen dxin queē' na', en buniti lahuë' lē' lē na' ral-lē'ë queē', ate' busanē' lē'. ²⁸ Cate' burúajē' bönni' huen dxin na', la' yöjtságatē' tu bönni' rúnlenē' lē' tsözxön dxin, ate' bönni' na' ral-lē'ë queē' láti'do'os dumí. Ní'irö guzxönē' lē', en guzxínnajē' yenē', ate' rē' lē': "Gudíxjatē lē na' ral-lu'u quia'." ²⁹ Ní'irö luzë'ë na' buzóa zxibē' lahuë', en gunaba yechë'ë lahuë', rnnē': "Ben zxon ládxu'u neda'. Huaguizxaj caza' li' idutē." ³⁰ Biti' gú'unnē' bönni' huen dxin na', ate' yöjlu'ë lē' lidxi guié dza quíxjarē' lē na' ral-lē'ë queē'. ³¹ Cate' bila'lé'enē' lē ni ia'zícá'rē' huen dxin, bulu'hu'ínide'enē' ni'a queē', ate' yöjtíxjöi'iguequinē' xángaquiē' yúgu'tē lē na' guca. ³² Ní'irö xángaquiē' bulidzē' bönni' huen dxin na', ate' rē' lē': "Li', huen dxin cat-sahui'. Yúgu'tē dumí na' gúl-lu'u quia' buniti

lahua' li'. Busúlua' lë na' gúl-lu'u quia' tu' gun-aba yechu'u lahua'. ³³ ¿Naru' cabí ral-la' huéchi' ládXu'u ca' luzó'o ca na' bena' neda', buéchi' ládxa'a li'?" ³⁴ Ní'irö guléde'enë' xané', en budödë' lë' lu ná'agaca nupa ulu'saca' zi' lë' dza quízxjarë' idútë le ral-lë'ë queë'.

³⁵ Ní'irö rnnë' Jesús:

—Lësca' caní gunë' Xuza' zoë' yehua' yubá queë'li' channö cabí uniti loli' idú ládxi'li' yugu' böchi' luzá'ali'.

19

Nupa tu'lá'a yöl-la' nutsaga na'

(Mr. 10:1-12; Lc. 16:18)

¹ Cate' budxi bë'ë Jesús yugu' didza' ni, buzë'ë luyú Galilea, ate' bidxinë' luyú Judea le dë ia'tsölá'a yegu Jordán saca' ga rilén gubidza.

² Bönachi zían sójácalen Jesús, ate' bunë' léguequi ni'.

³ Ní'irö bila'dxinë' bal-lë' bönni' yudo' fariseo ga zoë' Jesús para ila'z'í' bë'ë Lë', ate' gula'nábinë' Lë', ta'nnë':

—¿Naru' dë lataj bönni' nutsaga në'ë usanë' nigula queë' tu' nözi bíti'tës bi raca?

⁴ Bubi'ë didza' Jesús, rë' légaquië':

—¿Naru' cabí nulábanili' le nazúaj lu guichi lá'ayi ca benë' Dios bönachi cate' si' benë' yödzölió? Bönni', en nigula benë' légaquië'. ⁵ Caní gunné' Dios: “Que lë ni na', ral-la' usanë' tu bönni' xuz xinë'ë, ate' tsaz tsöjsóalenë'-nu nigula queë', ate' iropë' na' ulu'huóáquië' tuz bönachi.” ⁶ Caní naca,

bíti'rö nácagaquië' chopë' pero tuz bönachi chin-
 uhuóáquië'. Que lë ni na', bití' ral-la' ulu'lë'ë bönni'
 nupa na' benë' Dios tuz.

⁷ Ní'irö bönni' yudo' na' gula'nábinë' Jesús,
 ta'nnë':

—¿Bizx que na' gunná bé'enë' Moisés légaquië'
 le ruí'i lataj nu bönni' unödzjë' tu guichi queënu
 nigula queë' le rnna nulá'a yöl-la' nutsaga na', ate'
 usanë'-nu nigula queë' na'?

⁸ Jesús rë' légaquië':

—Caní benë' Moisés tu' nazidi icja ládxi'do'oli'.
 Bennë' libí'ili' lataj usanli'-nu nigula queëli', pero
 cate' gusí lo guta' gurö'ö yödzölió, bití' guca caní.

⁹ Neda' rea' libí'ili', channö tu bönni' usanë'-nu
 nigula queë', en bití' gudálenmu bönni' yúbölö, ate'
 utsaga ná'alënë'-nu nigula yúbölö, gunë' dul-la' le
 riguitsaj xibá que yöl-la' nutsaga na'. Lë'sca' caní,
 channö nu bönni' utsaga ná'alënë'-nu nigula na',
 nusanë'-nu bönni' queënu, gunë' dul-la' le riguitsaj
 xibá que yöl-la' nutsaga na'.

¹⁰ Ní'irö yugu' bönni' usëda queë' Jesús gulë' Lë',
 ta'nnë':

—Channö caní naca queë' tu bönni' zóalënë'-nu
 nigula queë', gácarö dxí'a queë' la'tu' cabí utsaga
 caz në'ë, ugá'anë' tuzë'.

¹¹ Bubi'ë didza' Jesús, rë' légaquië':

—Bití' gaca ila'zí' lu ná'agaca yúgu'të bönachi
 didza' ni, pero núpasö na' Dios ruzéajni'inë'
 léguequi. ¹² Nacu'ë bönni' bití' tu'tsaga

ná'alengaquië' nigula tu' cabí nácagaquië' idú
 bönni' biguiú', tu' gulaljë' ca', ate' ia'zica'rë' bönni'
 bití' tu'tsaga ná'alengaquië' nigula tu' bulu'zaga'
 bönachi xinözgaquië', ate' ia'zica'rë' bönni' bití'

tu'tsaga ná'alengaquië' nigula para gaca ilunë' xichinë' Dios, Nu rinná bē' yehua' yubá. Nu sequi' si' lu nē'e didza' ni ral-la' si' lu nē'e le.

Jesús rulidza tsáhuë'ë-bi' yugu' bí'ido'
(Mr. 10:13-16; Lc. 18:15-17)

¹³ Ní'irö yugu' xuz xiná'agacabi' bí'ido' dujuá'agaquië'-bi' ga zoë' Jesús para ixóa nē'ë léga'cabi', en ulidzë' Dios ni'a quégacabi', ate' bönni' usëda queë' bulu'zágui'ë xinözgaquië'. ¹⁴ Ní'irö Jesús rë' légaquië', rnnë':

—Guli'güi'-bi' yugu' bí'ido' lataj ila'dxinbi' ga zoa', en biti' uzága'li' xinözgacabi', tu' ila'zì' lataj nupa nácagaca ca yugu' bí'ido' caní ga ni' rinná bē'ë Dios yehua' yubá.

¹⁵ Jesús guxóa nē'ë léga'cabi', ate' ní'irö buzë'ë ni'.

Tu bönni' unná bē' cuidi' dë'yöl-la' tsahui' queë'
(Mr. 10:17-31; Lc. 18:18-30)

¹⁶ Tu bönni' ni zoë' iz cuidi' queë' buduyüë' Jesús, en rë' Lë':

—Bönni' Usedi idú tsahui'. ¿Bizxi le naca tsahui' ral-la' guna' para gata' yöl-la' na'bán idú quia'?

¹⁷ Bubi'ë didza' Jesús, rë' lë':

—¿Naru' nöztsenu' lë na' rnno' quia', rnno' naca' idú tsahui'? Cuntu nu bönni' náquië' idú tsahui'. Tuzë' Dios náquië' idú tsahui'. Channö rë'ënu' gata' yöl-la' na'bán idú quiu', ben ca rinná bē' xibá queë' Dios.

¹⁸ Ní'irö bönni' na' rë' Jesús, rnnë':

—¿Bí'xilö xibá na'?

Jesús rë' lë':

—Xibá na' gunná bē'ë Moisés:

Biti' gútiu' bönachi.

Biti' gunu' dul-la' le riguitsaj xibá que yöl-la' nut-saga na'.

Biti' cuanu'.

Biti' innío' que böchi' luzó'o le cabí nácate.

¹⁹ Ben bal xuz xinó'o.

Bidxí'i böchi' luzó'o ca nadxí'i cuinu'.

²⁰ Bönni' na' ni zoë' iz cuidi' queë' gudxë' Jesús, rnnë':

—Yúgu'të læ ni runa' ga gudela' naca' bí'ido'.
¿Naru' zoa ia'tú le ral-la' guna'?

²¹ Jesús rë' læ':

—Channö rë'ënu' gacu' tsahui', guyéaj, yøjëti' le dë quiu', ate' dumí na' si'u, bunödzej quégaca bönachi yechi'. Caní gata' yöl-la' tsahui' quiu' ni' yehua' yubá. Ní'irö gudá, gudá' neda'.

²² Cate' bönni' na' ni zoë' iz cuidi' queë' biyönnë' didza' ni, söhuøjë' ruhuí'innë' tu' dëda' yöl-la' tsahui' queë'.

²³ Ní'irö Jesús gudxë' yugu' bönni' usëda queë', rnnë':

—Le nácatë rea' libí'ili', böniga naca tsázië' nu bönni' dë yöl-la' tsahui' queë' ga rinná bë'ë Dios yehua' yubá. ²⁴ Ia'stú rea' libí'ili', nácarö böniga tsázië' tu bönni' dë yöl-la' tsahui' queë' ga ni' rinná bë'ë Dios ca tödiba' böa' lu nagui yötsi'.

²⁵ Cate' bila'yönnë' yugu' bönni' usëda queë' didza' ni, bulu'bánnë, ta'nnë':

—¿Nuzxi caz gaca ulá, channö?

²⁶ Jesús buyúë' légaquië', en rë' légaquië':

—Biti' gaca ilún bönachi læ ni, pero Dios huáca gunë' yúgu'të.

²⁷ Ní'irö bubí'ë didza' Pedro, en rë' Jesús:

—Buyútsöca', netu' chibucá'anatu' yúgu'të, en zá'entu' Li'. ¿Bíxirö gata' queëtu'?

²⁸ Jesús rë' légaquië':

—Le nácatë rea' libí'ili', dza ni' cate' ucubi yödzölió, ate' cö'a inná bë'a neda', Bönni' Guljë' Bönachi, ga ni' gácatëra' lo, lësca' libí'ili' zá'lenli' neda' na'a, cö'öli' chinnu lataj ga inná bë'ëli', en uchi'a usöröli' quégaca idxinnu cö'të yödzö quégaca zxí'ini xi'söë' Israel. ²⁹ Nu bönni' rucá'anë' lidxë', o yugu' böchë'ë, o yugu' zanë', o xuzë', o xinë'ë, o nigula queë', o yugu' zxí'inë', o yugu' xiyúë', para gunë' xichina', bönni' ni si'ë ia'tú gáyua'tërö ca' queë', en gata' ca' yöl-la' na'bán idú queë'. ³⁰ Zián nupa náca'gaca lo na'a, ulu'gá'ana cá'asö, ate' nupa nagá'anagaca cá'asö na'a, hualácagaca lo.

20

Rucúdzu'ë didza' Jesús ca tunë' bönni' huen dxin

¹ Gunnë' ca' Jesús:

—Ca gun Bönni' na' rinná bë'ë yehua' yubá naca ca benë' tu bönni' xan yu'u. Birúajë' zílado', yöjdiljë' yugu' bönni' ilunë' dxin ga naca lu xiyúë' ga na' nadúzgaca lubá uva. ² Cate' chibugá'analenë' tsahui' yugu' bönni' huen dxin na', quizxjë' légaquië' tu dumí lazxaj que tu dza, gusöl-lë'ë légaquië' ilunë' dxin ga naca lu xiyúë'. ³ Cate' burúajë' idú xsila, bilé'enë' ia'zícá'rë' bönni' nacuá'asë' ca' ga naca lu yë'ëyi. ⁴ Rë' légaquië': “Guli'tséaj ca' libí'ili' ga naca lu xiyúa', ate' quizxja' libí'ili' le naca tsahui'.” La' yöjácátë' ca' légaquië'. ⁵ Burúajë' bönni' xan yu'u na' leyúbölö idú huagubidza, enca' idú xihuö udzö', en la'

tuz ca benë', gusöl-lë'ë yugu' bönni' yöjxáquië' lu xiyüë'. ⁶ Burúajë' ca' cate' ni' zoa ia'láti'do'os gubidza, en yöjxáquië' ia'zica'rë' bönni' nacuá'asë' ca' ni', ate' rë' légaquië': "¿Bizx que zóatsali' ni cá'asö idú dza, biti' bi dxin runli'?" ⁷ Yugu' bönni' na' tē' lē', ta'nnē': "Cuntu nu benna xichintu'." Ní'irö rē' légaquië': "Guli'tséaj ca' libí'ili' ga naca lu xiyúa', ate' quixxja' libí'ili' le naca tsahui'." ⁸ Cate' chizóa gal-la, bönni' xan yu na' rē' bönni' yu'u lu nē'ë yugu' huen dxin na', rnnē': "Bulidza yugu' bönni' huen dxin na', ate' gu'u lázxjagaquië'. Quizxju' zí'alö yugu' bönni' na' bila'dxinē' yöjsetë. Udxí na' quixxju' yugu' bönni' na' bila'dxinē' zí'atëlö." ⁹ Ní'irö bila'dxinē' bönni' yöjéngaquië' dxin cate' ni' zoa ia'láti'do'os gubidza, en gula'zi'ë tu tuhuéajë' dumí lazxaj que tu dza. ¹⁰ Cate' bila'dxinē' bönni' yöjéngaquië' dxin zí'atëlö, guléquinë' huazí'gaquië' ia'lati', pero lësca' gula'zi'ë tu tuhuéajë' dumí lazxaj que tu dza. ¹¹ Cate' gula'zi'ë le, gula'nnédë'ë queë' bönni' xan yu'u na', ¹² ta'nnē': "Yugu' bönni' ni bila'dxinē' ga yöjsetë, tu chí'isö gulunë' dxin, en tuz ca gudízxjatso' légaquië' ca netu', ate' netu' ni bentu' dxin idú dza, en gúguida'atu' gubidza." ¹³ Bubi'ë didza' xan yu na', en rē' tuë': "Böcha'a, biti' bi runa' quiu' le cabí naca tsahui'. ¿Naru' cabí bugá'ana tsáhui'ru' si'u tu dumí lazxaj que tu dza? ¹⁴ Guzxí' lazxju', en böaj lidxu'. Neda' rē'ënda' quixxja' bönni' ni yöjenë' dxin ga yöjsetë la' leze ca na' riguixxja' li'. ¹⁵ ¿Naru' cabí dë lu na'a guna' ca rē'ënda' len le nequi quia'? ¿Naru' ruzxé'etsenu'në' luzó'o tu' rúnnada'a queë'?" ¹⁶ Caní naca, bal-lë' bönni', tu'cá'ana bönachi légaquië' cá'asö,

ilácagaquië' lo, ate' ia'zíca'rë' bönni', nácagaquië' lo na'a, ulu'gá'anë' cá'asö. Zián nupa nulidza', pero nabábasö nupa narögaca.

Riguíxjö'ë Jesús leyúbölö ca si' ilútië' Lë'

(Mr. 10:32-34; Lc. 18:31-34)

¹⁷ Cate' ni' yu'ë Jesús nöza, sa'yéajë' Jerusalén, guchë'ë quez idxínnutë' bönni' usëda queë', en rë légaquië':

¹⁸ —Buli'yútsöca', ribenru' zéajru' Jerusalén, ate' ni' soa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usëdi, ate' ila'chúguië' quia' gátia'.

¹⁹ Ulu'dödë' neda' lu ná'agaquië' bönni' zítu' para ulu'titjë' neda'. Ila'guinë' neda', en ulu'dë'ë neda' lë'e yaga cruz, pero cate' gaca tsonna dza, Dios usubanë' neda' lu yöl-la' guti.

Le gunábanu xiná'agaquië' Jacobo, en Juan

(Mr. 10:35-45)

²⁰ Ní'irö bidxinnu xiná'agaquië' Jacobo, en Juan, yugu' zxí'inë' Zebedeo, ga zoë' Jesús, dzágagaquië'-nu chopë' ni, ate' buzóa zxíbinu lahuë' Jesús, en gunábinu Lë' tu le uzá' ládxe'ë queënu. ²¹ Jesús gunábinë'-nu, rnnë':

—¿Bizxi rë'ënu'?

Rënu Lë':

—Gunná bë' cõ'öbi' tubi' zxí'ina' ni cuita lë'u ibëla, en ia'tubi' cõ'öbi' cuita lë'u yögöla ga ni' inná bë'u.

²² Bubi'ë didza' Jesús, rë' légaquië':

—Biti' nözili' le rinábali'. ¿Naru' huáca guá' ilenli' le qui'i saca' neda', en idílali' nisa ca idila' neda' nisa, gátia'?

Të' Lë':

—Huácatu'.

²³ Ní'irö Jesús rë' légaquië':

—Le nácatë le ral-la' qui'i saca'a neda', gaca ca' queëli', en le ral-la' idila' neda' nisa, gátia', idílali' ca' nisa libí'ili', pero que cõ'öli' cuita lë'a ibëla o cuita lë'a yögöla, biti' dë lu na'a nu gu'a que, pero gata' quégaca nupa ni' chinupë'ë Xuza' quéguequi.

²⁴ Cate' ia'chíë' bönni' usëda queë' Jesús bila'yönnë' lë ni, gula'lenë'. ²⁵ Ní'irö Jesús bulidzë' légaquië', rnnë':

—Nözquézili' ca tunë' yugu' bönni' ta'nná bé'enë' bönachi izá'a, ridödité bë' ta'nná bé'enë' légaquië', ate' nupa ni' nácagacarö lo ta'nná be'e la' luzé'eguequisö. ²⁶ Biti' gaca caní queëli'. Núti'tëslöli' libí'ili' nu rë'ëni gaca zxön ga zóali', nu ni ral-la' gun dxin que ia'zica'röli'. ²⁷ Lësca' caní, núti'tëslöli' libí'ili' nu gué'ëni gaca lo, ral-la' gaca ca tu bönni' nadó'o que ia'zica'röli'. ²⁸ Lësca' neda', Bönni' Guljë' Bönachi, bida' ni, calëga para nu gun xichina', pero para guna' xichíngaca bönachi, en udöda' yöl-la' na'bán quia', le quízxjada' ni'a quégaca bönachi zián para ulu'lágaca.

Ruúnë' Jesús chopë' bönni' nachul-la lógaquië'

(Mr. 10:46-52; Lc. 18:35-43)

²⁹ Cate' ni' tu'rúajë' yödzö Jericó, bönachi zián sójácalen Jesús. ³⁰ Nacu'ë chopë' bönni' nachul-la lógaquië' ni', rõ'gaquië' ra' nöza. Cate' bila'yönnë' ridödë' Jesús ni', gulu'ë zidzaj didza', ta'nnë':

—Xan, zxí'ini xi'sóë' David, buéchi' ladxi' netu'.

³¹ Bönachi zián nacuá' ni' gulë' légaquië' ila'cu'ë dxisö, pero zidzajrö gulu'ë didza', ta'nnë':

—Xan, zxí'ini xi'sóë' David, buéchi' ladxi' netu'.

³² Ní'irö guzë' ribözë' Jesús, en bulidzë' légaquië', ate' gunábinë' légaquië', rnnë':

—¿Bizxi ré'ënili' guna' queëli'?

³³ Të' Jesús:

—Xan, ré'ënitú' gunu' ga huöálaj guiöj lotu'.

³⁴ Ní'irö Jesús buéchi' ládxë'ë légaquië', ate' gudanë' guiöj lógaquië'. La' böáljatëgaca guiöj lógaquië', ate' yöjácalenë' Jesús.

21

*Ridxinë' Jesús yödzö Jerusalén len yöl-la' ba zxön
(Mr. 11:1-11; Lc. 19:28-40; Jn. 12:12-19)*

¹ Cate' bila'dxíngalë' yödzö Jerusalén, en ní' nacu'ë ga dë yödzö Betfagé ga na' zoa Guí'a Yaga Olivo, ní'irö gusöl-lë'ë Jesús chopë' bönni' usëda queë', ² ate' ré' légaquië':

—Guli'tséajtsöca' yödzödo' ní' ca dödilö ga ní' zóaru', ate' la' tsöjxáca'tëli'-ba' tuba' burro guná' nága'ba', ate' dzaga lëba' tuba' burro biguiú'do'. Guli'tsöjsedxi-ba', en ichë'ëli'-ba' quia' ní'. ³ Channö nu bi guië libí'ili', guli'guië nu na': "Xanru' riquinnë'-ba'." Ní'irö isöl-lë'ë légacaba' quia'.

⁴ Caní guca para gaca lë na' buzúajë' lu guichi bönni' bë'ë didza' uláz queë' Dios, gunné':

⁵ Guli'guië nupa nacuá' yödzö Sión,

Buli'yútsöca', zë'ë Bönni' inná bé'enë' libí'ili'.

Lu yöl-la' nöxaj ladxi' queë' dxíë'-ba' tuba' burro.

Dxië' cúdezu'ba' búrrodo' nácaba' zxi'iniba' böa' ruá'aba' yua'.

⁶ Ní'irö bönni' usëda queë' yöjáquië' ní', ate' gulunë' ca na' gunná bé'enë' Jesús légaquië'.

⁷ Gula'ché'ë-ba' burro guná' na', en burro

biguiú'do' na', ate' bulu'dxíë' cúdzu'gacaba' yugu' lari' guitsa' quégaquië', ate' gudxíë' Jesús lahui' lari' na'. ⁸ Nacuá' ca' bönachi zían ni', ate' gula'chilaj yugu' lari' ta'xóa cúdzu'guequi la' nöza. Ia'zíca'rë' bulu'chibë' zin le bulu'zxóë' ga naca la' nöza. ⁹ Gulu'i zidzaj didza' bönachi na' nanörugaca, en nupa na' sójácalen Jesús, ta'nná:

—¡Yöl-la' ba Lë', zxi'ini xi'sóë' David! ¡Bica' ba nu ni za' ni'a que Lë' Xanru'! ¡Yöl-la' ba Dios!

¹⁰ Cate' guyázië' Jesús yödzö Jerusalén, bulu'dzatsa yúgu'të bönachi lu yödzö na', ate' zían nupa gulë luzë'eguequi, ta'nná:

—¿Nuzxi caz bönni' ni?

¹¹ Ia'bal-la bönachi ni' ta'nná:

—Nu ni Jesús, bönni' ru'ë didza' uláz queë' Dios, ate' naca ladzë' Nazaret luyú Galilea.

Jesús rulatjë' lö'a yudo'

(Mr. 11:15-19; Lc. 19:45-48; Jn. 2:13-22)

¹² Cate' guyázië' Jesús lö'a yudo' queë' Dios, bulágui'ë ní'ilö yúgu'të nupa tuti' to'o ga naca lö'a yudo' na'. Burixë' ca' yugu' blaga quégaquië' bönni' tu'tsé'ë dumí yödzö zi'tu', en yugu' le ta'bö'i nupa tuti' gu'dödo'. ¹³ Rë' légaquië':

—Nazúaj lu guichi lá'ayi le rnna: “Lidxa' si'i le, yu'u ga nu ulidza Dios”, pero libí'ili' chinunli' lataj ni ca naca yu'u lídxigaca gubán.

¹⁴ Cate' ni' zoë' Jesús chila yudo', bal-lë' bönni' nachul-la lógaquië', en bönni' biti' raca ila'zë'ë bila'dxinë' ga na' zoë', ate' Lë' bunë' légaquië'.

¹⁵ Gula'lenë' yugu' bixúz unná bë', en bönni' yudo' tu'sédinë' cate' bila'lé'enë' yugu' yöl-la' huáca ni

runë' Jesús, en bila'yönnë' tu'íbi' bí'ido' zidzaj didza' ga naca chila yudo', ta'nnabi':

—¡Bica' ba Lë', zxi'ini xi'sóë' David!

¹⁶ Ní'irö tē' Jesús:

—¿Naru' cabí riyönnu' ca ta'nnabi' bi'i ni?

Bubi'ë didza' Jesús, rnnë':

—Ön, riyönda'. ¿Naru' catu caz nulábanili' le nazúaj lu guichi lá'ayi caní caz ral-la' gaca? Caní rnna: "Li' benu' ga yugu' bi'i cuidi', en yugu' bí'ido' ni' tádxí'bi' gulúl-labi' yöl-la' ba le naca idú."

¹⁷ Ní'irö Jesús bucá'anë' légaquië', ate' burúajë' Jerusalén. Guyijë' yödzö Betania ga ni' bugá'anë' idú yëla.

Jesús rulidza zi'ë yaga higo

(Mr. 11:12-14, 20-26)

¹⁸ Cate' za' rení', ate' ni' söhuöjë' Jesús Jerusalén, ridunë'. ¹⁹ Bilé'enë' tu yaga higo rö' gal-la' cuite nöza, ate' gubígui'ë ga na' rö', pero biti' bi bidzölinë' lu yaga na'. Xilágui'sö dxía. Ní'irö Jesús gudxë' le:

—Biti'rö cuía le ribía quiu'.

La' gubídxitë yaga higo na'. ²⁰ Cate' bila'lé'enë' bönni' usëda queë' lë ni, bulu'bánninë', ate' gula'nánninë' Jesús, ta'nnë':

—¿Nacxi caz guca, gubídxitë yaga ni?

²¹ Bubi'ë didza' Jesús, rë' légaquië':

—Le nácatë rea' libí'ili', channö tséajlë'ëli' Dios, en biti' gaca chopa ládxi'li', calégasö huáca gunli' ca na' bena' que yaga ni, pero channö guiéli' guí'a ni: Gucuíta, en yöjsóa lu nísado', gaca ca na' innali'. ²² Lësca' caní, yúgu'të le inábali' cate' ulídzali'në' Dios, channö huayéjlë'ëli' gunnë' Dios queëli', huazí'ili' lë na' inábali'.

*Yöl-la' unná bē' dē lu nē'ē Jesús
(Mr. 11:27-33; Lc. 20:1-8)*

²³ Ní'irö guyáziē' Jesús chila yudo', ate' tsanni ni' rusédinē' bönachi nacuá' ni', bila'dxinē' yugu' bixúz unná bē' len bönni' gula tu'zéajni'inē' ga zoē', ate' gula'nábinē' Jesús, ta'nnē':

—¿Bizxi yöl-la' unná bē' dē lu no'o, runtso' yugu' lē ni? ¿Nuzxi budödi lu no'o yöl-la' unná bē' ni?

²⁴ Bubi'ē didza' Jesús, rē' légaquiē':

—Lēscá' neda' inábatsöqui'da' libí'ili' tu didza'. Channö quíxjöi'ili' neda' ca naca, neda' ca' guía' libí'ili' bizxi yöl-la' unná bē' dē lu na'a runa' caní.

²⁵ ¿Nuzxi caz gusöl-la' Juan para buquilē' bönachi nisa? ¿Naru' Dios gusöl-lē'ē lē', o gula'söl-lē'ē yugu' bönni' lē'?

Ní'irö gula'sí lógaquiē' bönni' yudo' na' ta'nnē' la' légacasē':

—Channö innaru': Dios gusöl-lē'ē lē', la' guiētē' rē'u: “¿Bizx que biti' guyéajlē'ēli' lē'?” ²⁶ Na'a, channö innaru': Gula'söl-lē'ē yugu' bönni' lē', rádxiru' le ilún bönachi lu yödzö tu' ta'yéajlē'ē yúgu'tē' Juan na' bē'ē didza' uláz queē' Dios.

²⁷ Que lē ni na' bulu'bi'ē didza', tē' Jesús:

—Biti' nöztu'.

Jesús rē' légaquiē':

—Neda' ca', biti' guía' libí'ili' bizxi yöl-la' unná bē' dē lu na'a runa' lē ni.

Rucúdzu'ē didza' Jesús ca gulunbi' chópabi' zxi'inē' tu bönni'

²⁸ Ní'irö Jesús gudxē' yugu' bönni' yudo' na':

—¿Nacxi rusáca'li' queēli'? Guzöé' tu bönni' nacuá'abi' chópabi' bi'i bönni' queē', ate' yöjödxe'-bi' tubi' bi'i queē' na', gunnē': “Zxi'ina', guyéaj

na'a tsöjenu' dxin ga naca luyú quia' ga rō'gaca lubá uva." ²⁹ Bubi'ibi' didza' bi'i na', gúdxibi'-nē': "Biti' rē'ēnda' tseja'." Gudödi ni' bubí'i ládxi'bi', ate' yōjenbi' dxin. ³⁰ Ní'irö bönni' na' yōjōdxē'-bi' ia'tubi' bi'i queē' na', en la' tuz ca gunnē', ate' bubí'ibi' didza' bi'i ni, gúdxibi'-nē': "Huaca, Dad. Uyéaja'." Biti' guyéajbi' bi'i ni. ³¹ ¿Núzxilöbi' bi'i chopa ni benbi' le guyaza ládxi'ē xúzibi'?

Bulu'bi'ē didza', tē' Jesús:

—Bi'i zí'alö na'.

Ní'irö Jesús rē' légaquiē':

—Le nácatē rea' libí'ili', ila'nōruē' bönni' uquíxaj tuá' dö', en yugu' nigula udá dzaga ca libí'ili', ate' ila'yáziē' ga ni' rinná bē'ē Dios. ³² Caní gaca, tu' bidē' Juan, bönni' buquilé' bönachi nisa, ga zóali', en busédinē' libí'ili' le naca tsahui' ca ral-la' gunli', ate' libí'ili' bití' guyéajlē'ēli' lē', pero yugu' bönni' uquíxaj, en yugu' nigula udá dzaga gula'yéajlē'ē lē'. Sal-la' bilé'eli' lē' ni, bití' bubí'i ládxi'li' para tséajlē'ēli' lē'.

Rucúdzu'ē didza' Jesús ca béngaquiē' bönni' huen dxin bití' nácaquiē' tsahui'

(Mr. 12:1-12; Lc. 20:9-19)

³³ Gunnē' ca' Jesús:

—Buli'zē' nágali' ia'tú le ucúdzu'a didza'. Guzöē' tu bönni' xan yu'u, ate' bönni' ni budē'ē yugu' lubá uva luyú queē'. Guléquiē' lē'aj que, en guchō'ōnē' tu lerui guiōj ga isíē' xisi uva na'. Benē' ca' tu yu'u xitsá' ga gaca nu uyú idútē luyú queē'. Ní'irö budödē' luyú na' lu ná'agaquiē' bönni' huen dxin, para ila'zi'ē' quégaquiē' gatsaj huéaj, ate' sa'yéajē' yōdzö zi'tu'.

34 'Cate' chibidxín dza ulu'chibë' yugu' lubá uva na', gusöl-lë'ë bönni' xan luyú na' bal-lë' ni'a në'ë ga na' nacu'ë bönni' huen dxin ni' para ulu'zi'ë lu ná'agaquië' uláz queë'. 35 Ní'irö gula'zönë' bönni' huen dxin na' yugu' ni'a në'ë na'. Gulunë' huë' tuë', en ia'tué' bëtigaquië' lë', en ia'tué' bulu'ladxë' lë' guiöj. 36 Leyúbölö bönni' xan luyú na' gusöl-lë'ë ca' ia'zícá'rë' ni'a në'ë, ate' guláquië' zióntërë' ca nupa na' gusöl-lë'ë zí'alö, ate' la' tuz ca gulunë' bönni' huen dxin ni' quégaquië'.

37 'Ga yöjsete, gusöl-lë'ë ca' zxí'inë' ga na' nacu'ë. Guzá' ládxë'ë, rnnë': Hualunë' bal bi'i quia'. 38 Cate' yugu' bönni' huen dxin na' bila'lé'enë'-bi' zxí'inë', la' gula'nnatë' la' légacasë': "Bi'i ni guequi queëbi' luyú ni. Guli'dá, gútiru'-bi', ate' le ral-la' guequi queëbi' guequi queëru'." 39 Ní'irö gula'zönë'-bi', ate' bulu'béajë'-bi' ní'ilö luyú ga na' rő'gaca lubá uva, ate' bëtigaquië'-bi' ni'.

40 Ní'irö Jesús gunábinë' légaquië', gunnë':

—Cate' udxinë' bönni' xan luyú na', ¿nacxi gunë' quégaquië' bönni' huen dxin ni'?

41 Bulu'bi'ë didza' bönni' yudo' na', të' Jesús:

—Usunítië' bönni' tuá' dö' na', ate' luyú queë' na' udödë' lu ná'agaquië' ia'zícá'rë' bönni' huen dxin, bönni' ilu'ë lë' uláz queë' cate' idxín dza ulu'chibë' le.

42 Ní'irö Jesús gudxë' légaquië':

—¿Naru' catu caz nulábanili' lë na' nazúaj lu guichi lá'ayi ca naca lë ni? Caní rna: Guiöj na' gula'ru'unë' bönni' tu'cu'ë zö'ö, la' guiöj ná'asö chinaca guiöj len zö'ö. Lë cazë' Xanru' benë' ga naca caní, ate' naca tu le run ga rubániru'.

⁴³ 'Que lë ni na' rea' libí'ili', xilátjali' ga na' rinná bē'ë Dios idúa queëli', en gata' quégaca bönachi ilún ca ral-la' gun nu nadelí' lataj ni'. ⁴⁴ Nu tsöjchegu' lu guiöj ni, la' cuinsi quitsaj, ate' channö guiöj ni tseajbaga' bönni' na', uzxuzxaj lë'.

⁴⁵ Cate' yugu' bixúz unná bē', en yugu' bönni' yudo' fariseo bila'yönnē' lë na' bucúdzu'ë didza' Jesús, téquibe'enē' bē'ë Jesús didza' ca naca quégaquiē'. ⁴⁶ Gula'zóa gula'bö'ë ila'zönē' Jesús, pero guládxinē' bi ilún bönachi zían nacuá' ni' tu' ta'yéajlë' náquiē' Jesús bönni' ru'ë didza' uláz queë' Dios.

22

Rucúdzu'ë didza' Jesús ca naca que laní que yöl-la' rutsaga na'

¹ Jesús bē'lenē' légaquiē' didza' leyúbölö, ate' bucúdzu'ë didza', rnnē':

² —Ca gaca quégaca nupa ila'yaza ga rinná bē'ë Dios yehua' yubá naca ca guca quégaca nupa bulidzē' tu bönni' rinná bē'ë cate' benē' laní que dza utsaga ná'abi' bi'i bönni' queë'. ³ Gusöl-lë'ë ni'a nē'ë tsöjxi'gaquiē' yugu' bönni' chinulidzē' para guídagaquiē' laní queëbi', pero biti' gulē'ënē' guídagaquiē'. ⁴ Ní'irö gusöl-lë'ë ia'zícá'rē' ni'a nē'ë, en gudxē' légaquiē': "Guli'tsöjödixitsöca' nupa na' chinulidza', na' guiéli' légaquiē': Buli'yútsöca', chinupá'a la' huagu. Chibétia'-ba' yugu' xpëdxa', en yugu' böa' bëdxi renni' quia'. Yúgu'të chinupá'a. Guli'dá, sóaru' laní queëbi' bi'i bönni' quia' utsaga ná'abi'." ⁵ Yugu' bönni' na' yöjlídzagaquiē' biti' gulunē' légaquiē' bal, ate' yöjáquiē' que queégaquiē'. Tuë yöjenē' dxin, en ia'tué' guyijē' tsöjö'u tsöjéti'ë.

⁶ Ia'zíca'rë' gula'zönë' yugu' ni'a në'ë na', ate' gulu'ë dö' quégaquië', en bëtgaquië' légaquië'. ⁷ Cate' bönni' na' rinná bē'ë biyönnë' lë ni, gulénë', en gusöl-lë'ë yugu' bönni' queë' rójáquië' gudil-la, ate' bëtigaquië' yugu' bönni' hueti bönachi na', en bulu'quélé'ë gu' ládzagaquië'. ⁸ Ní'irö bönni' na' rinná bē'ë gudxë' yugu' ni'a në'ë, gunné': "Le nácatë chinupá'a que laní na', pero yugu' bönni' bulidza' bití guláquië' lesaca' guídagaquië' laní quia'." ⁹ Guli'tséajtsöca' gapa naca la' nöza, en buli'lidza yúgu'të nupa tsöjxáca'li' ni' para guídagaca laní queëbi' bi'i bönni' quia' utsaga ná'abi'." ¹⁰ Ní'irö bila'rúajë' ni'a në'ë na', sójáquië' gapa naca la' nöza, ate' bulu'tubë' yúgu'të nupa yöjxáca'gaquië', yugu' bönni' dxi'a, en yugu' bönni' tuá' dö', ate' ga na' raca laní bilíró bönachi.

¹¹ Cate' guyázië' bönni' na' rinná bē'ë para uyúë' nupa ni' nudúbigaca, bilé'enë' tu bönni' bití' nacué' lari' tsahui' le bunödzejë' quégaquië' bönni' nacué' laní na'. ¹² Ní'irö gudxë' bönni' na': "Bönni'do', ¿zóatso' ni, en bití' nacu' lari' tsahui' bunödza' quégaca nupa nacuá' laní?" Bönni' na' busayaj ru'ë. ¹³ Ní'irö bönni' na' rinná bē'ë gudxë' nupa na' tun xichinë', gunné': "Guli'guga' ni'a në'ë bönni' ni. Guli'tsöjchú'un-në' ní'ilö ga na' rö'ö chul-la. Ní' cödxë', en utíl-la láyë'ë, lu yöl-la' ruhu'íni queë'."

¹⁴ Ní'irö Jesús gudxë' légaquië':

—Zian nupa nulidza', pero nabábasö nupa ila'rögaca.

*Jesús ru'ë didza' ca naca le riguízxaj lázaru'
(Mr. 12:13-17; Lc. 20:20-26)*

15 Ní'irö yugu' bönni' yudo' fariseo na' bulu'zë'ë ni', ate' gulún xtídza'gaquië' ilunë' ga bi innë' Jesús para gaca ulu'zéguië' Lë' didza'. 16 Para ilunë' caní, gula'sól-lë'ë bal-lë' bönni' dá'gaquië' légaquië', len bönni' dá'gaquië' Herodes, ga zoë' Jesús, nupa na' gulë Jesús:

—Bönni' Usedi, nöztu' Li' ru'u didza' cátëze naca, en naca idútë li ca rusédinu' ca naca queë' Dios, en biti' ruí'i ládXu'u le ta'nná quiu' bönachi, tu' cabí ruchi'a rusöröu' bönachi ca naca le ta'nnasö bönachi na'. 17 Gudíxjö'i netu'. ¿Nacxi runi li? ¿Naru' run bayudxi, o biti' run bayudxi quizxaj laztu' queë' César, bönni' yödzo zi'tu' na' rinná bé'enë' rë'u?

18 Réquibe'enë' Jesús té'ënnë' ulu'béajë' Lë' didza', ate' gudxë' légaquië':

—Libi'ili', bönni' rulu'isö tsahui' cuinli', ¿bizx que ruí'ili' didza' le ruzóa neda' ra' guí'a?

19 Buli'luí'i neda' dumí le riguíxaj lázali'.

Ní'irö bulu'luí'inë' Lë' tu dumí que yödzo Roma.

20 Jesús gunábinë' légaquië', rnnë':

—¿Nuzxi lahui da' ni, en nuzxi le nazúaj lë'e dumí ni?

21 Të' Lë':

—Queë' César na'.

Ní'irö Jesús gudxë' légaquië':

—Guli'guíxjë' César le nequi queë' César, ate' Dios le nequi queë' Dios.

22 Cate' bila'yönnë' lë ni, bulu'bánninë' ca naca didza' tsahui' bubí'ë Jesús, ate' bulu'cá'anë' Lë', söhuöajtëgaquië'.

*Ta'nabi yúdxinë' Jesús ca ulu'bán nupa chinátigaca
(Mr. 12:18-27; Lc. 20:27-40)*

²³ La' dza ná'asö yugu' bönni' yudo' saduceo, bönni' na' ta'nné' bití' ulu'bán nupa chinátigaca, bila'dxiné' ga zoë' Jesús, ate' gula'nábiné' Lë',
²⁴ ta'nné':

—Bönni' Usedi, Moisés gunné': "Channö gátíë' tu bönni' zóanu nigula queë', en cuntu nu bi'i zóabi' queë', ní'irö bi'i böchë'ë bönni' na' ral-la' utsaga ná'alénbi'-nu nigula uzëbi queë', para cabí initi di'a dza queë' bönni' böchi'bi' na'." ²⁵ Gula'cuá'abi' gadxi bi'i bönni' ga zóatu', naca böchi'gacabi'. Bi'i zí'alö na' butsaga ná'alénbi'-nu nigula, ate' gútitébi'. Tu' cuntu nu bi'i queëbi' zóabi', bi'i buropi na' butsaga ná'alénbi'-nu nigula uzëbi queëbi' bi'i böchi'bi' na'. ²⁶ Lësca' caní guca queëbi' bi'i buropi na', enca' queëbi' bi'i bunni, en la' tuz ca guca quégacabi' ígádxitébi', gulátibi' yúgu'tébi'.
²⁷ Ga búdxité gútinu ca' nigula na'. ²⁸ Cate' idxín dza ulu'bán nupa chinátigaca, ¿núzxilögacabi' bi'i gadxi ni' guéquinu nigula na' queëbi', tu' bulu'tsaga ná'alénbi'-nu yúgu'tébi' nigula na'?

²⁹ Ní'irö bubi'ë didza' Jesús, ate' rë' légaquië':

—Nachíxili' libí'ili' tu' cabí réajni'ili' le nazúaj lu guichi lá'ayi, en tu' cabí núnbë'ëli' yöl-la' huáca queë' Dios. ³⁰ Cate' idxín dza ulu'bán nupa chinátigaca, bíti'rö gaca yöl-la' rizóalen nigula, en bití' ulu'tsaga ná'agaquië', pero gácagaquië' ca nácagaquië' gubáz lá'ayi queë' Dios nacué' yehua' yubá. ³¹ Ca na' ral-la' ulu'bán nupa chinátigaca, ¿naru' cabí nulábanili' lë na' gudxi cazë' Dios libí'ili'? ³² Caní gunné': "Neda' naca' Dios queë' Abraham, en Dios queë' Isaac, en Dios queë' Jacob." Dios na' bití' náquië' Dios quégaca nupa

nátigaca tsaz, pero náquië' Dios quégaquië' bönni' ni nabángaquië' sal-la' gulátië'.

³³ Cate' bila'yöni bönachi nacuá' ni' didza' ni, bulu'bani ca naca læ na' rusédinë' Jesús léguequi.

Xibá queë' Dios le naca lo

(Mr. 12:28-34)

³⁴ Cate' guléquibe'enë' bönni' yudo' fariseo ca benë' Jesús, busayjë' ruá'agaquië' bönni' yudo' saduceo, ní'irö bulu'dubë' yúgu'të'. ³⁵ Tuë' bönni' nútsë'ë ládjagaquië', en nazëdë' xibá queë' Moisés, gú'unnë' si' bë'ë Jesús. ³⁶ Que læ ni na' gunábinë' Jesús, rnnë':

—Bönni' Usedi, ¿bízxilö xibá queë' Dios naca lo?

³⁷ Jesús rë' læ':

—Idxí'inu' Xanu' Dios idú ládXu'u, en idú icja ládxi'do'o, enca' len idú yöl-la' réajni'i quiu'. ³⁸ Xibá ni naca lo, en nazáca'tërö. ³⁹ Xibá na' naca buropi, la' ca nácatë, en caní rnna: "Idxí'inu' böchi' luzó'o ca nadxí'i cuinu'." ⁴⁰ Chopa xibá ni nácgaca ga röjölz yúgu'të le rinná bë' xibá queë' Dios, en yúgu'të le bulu'sédinë' bönni' gulu'ë didza' uláz queë' Dios.

¿Nuzxi zxi'ini náquië' Cristo?

(Mr. 12:35-37; Lc. 20:41-44)

⁴¹ Tsanni ni' nacu'ë tsözxön bönni' yudo' fariseo na', Jesús gunábinë' légaquië', ⁴² rnnë':

—¿Nacxi rusáca'li' queëli' queë' Bönni' na' læ Cristo? ¿Nuzxi zxi'ini náquië'?

Bulu'bi'ë didza', ta'nnë':

—Zxi'ini xi'sóë' David náquië'.

⁴³ Ní'irö Jesús rë' légaquië':

—¿Bizx que na' lë cazë' David bulidzë' Lë',
gunné': "Xana"?' Caní gunné' cate' ni' bë'ë didza'
uláz queë' Dios Bö' Lá'ayi, gunné':

⁴⁴ Xanru' Dios gudxë' Xana':

"Gurö'ö cuita lë'a ibëla,
cate' gunra' ga ulu'zechu zxi'bigaca Lo' nupa tequi
Li' zi'."

⁴⁵ Channö David na' gunné' queë' náquië' Xanë',
¿nacxi caz naca, rnnali' náquië' zxi'ini xi'sóë' David
na'?

⁴⁶ Cuntu nu guca ubí'i didza', ate' ga gusí lo dza
na', cúnturö nu burugui bi inábini Lë'.

23

Jesús ruzégui'ë yugu' bönni' yudo' didza'

(Mr. 12:38-40; Lc. 11:37-54; 20:45-47)

¹ Ní'irö Jesús bë'lenë' bönachi nacua' ni' len yugu'
bönni' usëdi queë' didza'. ² Rë' légaquië':

—Yugu' bönni' yudo' fariseo, en yugu' bönni'
yudo' usedi nuhuöázagaquië' xilatjë' Moisés, en
tu'sédinë' bönachi. ³ Que lë ni na', guli'gún yúgu'të
le ilë' libí'ili', pero biti' gunli' libí'ili' ca na' tunë'
légaquië', tu' tu le ta'nnë', en ia'tú le tunë'. ⁴ Le
ta'nná bé'enë' bönachi naca ca tu yua' zi'i le cabí
sequi' nu guá', ate' tu'gu'ë le ya'zxi'cagaca bönachi,
pero légaquië' biti' té'ënnë' ulu'tenë' le, calëga len
tuze xibón ná'agaquië'. ⁵ Yúgu'të le tunë', tunë'
para ila'lé'e bönachi légaquië', tu' tunë' zxon le
túgui'ë yen ná'agaquië', en ra' xigágaquië' ga na'
nuzúajgaquië' tu le nazúaj lu guichi lá'ayi, en
tu'tunnë' luzxi lari' nácugaquië'. ⁶ Té'ënnë' ila'bö'ë
ga naca lataj lo ga na' tu'dubë' tahuë', enca' ga na'
naca lataj lo lu yu'u ga tu'dubë' tu'sëdë' queë' Dios.

7 Lësca' caní, té'ënnë' ulu'gapa bönachi légaquië' didza' ba zxön gapa naca lógaca bönachi, en té'ënnë' ilë bönachi légaquië': "Padiux, bönni' usedi."

8 'Pero libí'ili', bití' ral-la' gunlí' ga nu guíë libí'ili': Bönni' Usedi, tu' zoa tuz Nu naca Bönni' Usedi queëli', neda', Cristo, ate' yúgu'tëli' nácali' böchi'li' tuli' ia'tuli'. 9 Cuntu nu guiëli' luyú ni, bití' innali': Xuz, tu' zoa tuz Nu naca Xúzili', zoë' yehua' yubá. 10 Bití' gunlí' ga nu guíë libí'ili': Xan, tu' zoa tuz Nu naca Xanli', neda', Cristo. 11 Nu nutsa' ládjali' nu run xichinli' ia'zica'röli', nu ni na' gácarö lo ga zóali'. 12 Channö nu uzóa cuini lataj lo, cá'asö ugá'ana nu na', pero nu naca nöxaj ladxi', gaca lo.

13 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruzága'li' nöza sójácalen bönachi para ila'dxín ga ni' rinná bë'ë Dios yehua' yubá. La' libí'isili' bití' sequi' tsú'uli', en bití' ruí'ili' lataj ila'yú'u nupa té'ëni ila'yú'u.

14 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Rugúali' yugu' lídxigacanu nigula uzëbido', en para ulu'isö tsahui' cuinli', xidzé rulídzali'-në' Dios. Que lë ni na', zítërö irugu queëli' quí'i sáca'li'.

15 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ridödili' idú lu nísado', en idú yödzölió ni para gunlí' ga tseaj ládxë'ë tu bönni' Dios tsözxön len libí'ili', en cate' chiguzxéqui'li'-në', runli' ga nabága'rë' xíguia' ca libí'ili', ate' tsöjtsu'ë lu guí' gabila.

16 'Bica' bayechi' libí'ili'. Nachul-la loli', ate' rě'ënili' ulu'í'ili' nōza bōnachi. Caní naca queēli' tu' rnnali': "Channō bi rizi' lu nē'ē tu bōnni' ni'a que yudo', biti' run bayudxi, pero channō runē' le ni'a que oro dzō'ō yudo', bayudxi gun." 17 Libí'ili', bōnni' lo chul-la, en tu' caréajni'i. ¿Bízxilō nácarō lo? ¿Naru' oro na', o yudo' le run lá'ayi oro na'? 18 Lēšca' caní rnnali': "Channō nu bōnni' gunē' le ni'a que bucugu lá'ayi, biti' gun bayudxi, pero channō gunē' le ni'a que gun zxoa lahui, bayudxi gun." 19 Libí'ili', nazídili', en nachul-la loli'. ¿Bízxilō nácarō lo? ¿Naru' gun zxoa láhuisō, o bucugu lá'ayi na' run lá'ayi gun na'? 20 Que lē ni na', channō nu bōnni' runē' le ni'a que bucugu lá'ayi, runē' le ni'a que le, enca' ni'a que yúgu'tē le zxóagaca láhuisō. 21 Lēšca' caní, channō nu bōnni' runē' le ni'a que yudo', runē' le ni'a que le, enca' ni'a queē' Dios, nun cazē' xilatjē' ni'. 22 Lēšca' caní, channō nu bōnni' runē' le ni'a que yehua' yubá, runē' le ni'a que lataj ga rō'ē rinná bē'ē Dios, enca' ni'a que Lē cazē' Dios rō'ē ni'.

23 'Bica' bayechi' libí'ili', bōnni' yudo' usedi, enca' libí'ili', bōnni' yudo' fariseo, bōnni' rulu'ísō tsahui' cuinli'. Caní naca queēli' tu' riguízxjali' que yudo' tu cō' huéaj tu' chí cō' le rizi'ili' que xōhuéaj, en que guixi' anís, en que comino la' huagu, pero rucá'anali' le nácarō lo le rinná bē' xibá queē' Dios, tu' cabí runli' le naca tsahui', en biti' ruhuéchi' lādxi'li' luzá'ali', en biti' réajlē'ēli'-nē' Dios. Yugu' lē ni run bayudxi gunli', en lēs biti' ucá'anali' ia'zica'rō lē na' runli', le riguízxjali' que yudo'. 24 Libí'ili', nachul-la loli', en rě'ënili' ulu'í'ili' nōza bōnachi. Ca na' runli' naca ca rudōdili' bōdzádzado'

le ré'jali', rubéajgacali'-ba' bö'iyudo', pero ré'jali'-ba' böa' ta'bíë'-ba' bönni'.

25 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'isö tsahui' cuinli'. Nácali' ca zxíga'do' ré'jali', en yö'öna ráhuili'. Riguíbili' le nuá' cuita lë'e, pero lu icja ládxi'do'oli' nalí yugu' le ribanli', en yugu' le ruá' dö' runli'.

26 Libí'ili', bönni' yudo' fariseo lo chul-la. Zí'alö guli'quibi le nuá' lu zxíga'do', en lu yö'öna, lë na' sa'yéaj gácali' tsahui' lu icja ládxi'do'oli', para gácali' ca' tsahui' cuita lë'ëli'.

27 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'isö tsahui' cuinli'. Caní naca queéli' tu' nácali' ca yugu' yeru ba quégaca nupa chinátigaca, le nácagaca chiguíchido'os cuita lë'e, en le nácatë lachi nalá'gaca, pero nalígaca dxita quégaca nupa chinátigaca, enca' yúgu'të le siguti. 28 Lësca' caní nácali' libí'ili'. Le nácatë láhuisö ruluí'i cuinli' tsahui' lógaca bönachi, pero lu icja ládxi'do'oli' nalili' yugu' le ruluí'isö tsahui' cuini, en le ruá' dö' runli'.

29 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'isö tsahui' cuinli'. Ruchísali' biquitaj que ba gapa nagáchi'gaquië' bönni' gulu'ë didza' uláz queë' Dios, en ruí'ili' biquitaj gapa nagáchi'gaca bönachi tsahui'. 30 Lësca' caní rnnali': "La'tu' zóatu' dza ni'te cate' gula'cu'ë xuz xtó'otu', biti' guntu' légaquië' tsözxön cate' gulútië' yugu' bönni' gulu'ë didza' uláz queë' Dios." 31 Tu' rnnali' caní, la' libí'isili' runli' ba nalí nácali' zxí'ini xi'sóagaca nupa ni' bétigaca yugu' bönni' gulu'ë didza' uláz queë'

Dios. ³² Caní naca, rusubaga' cuinli' xíguia' na' gula'báguië' xuz xtó'oli'.

³³ 'Libí'ili' na', nácali' ca yugu' bëla sínia', en di'a dza quégacaba' bëla sínia'. ¿Nacxi caz uláli' lu le usaca' zi' libí'ili' lu guí' gabila? ³⁴ Que lë ni na', neda' isöl-la'a queéli' yugu' bönni' ilu'ë didza' uláz queë' Dios, enca' yugu' bönni' ta'yéajni'inë', en yugu' bönni' usedi. Yugu' bönni' ni, bal-lë gútíli'-në', en ia'zíca'rë' udá'ali' lë'e yaga cruz, en ia'zíca'rë' quinli' gapa naca lu yu'u ga rudúbili' rusédali' queë' Dios, ate' ulágali' légaquië' tu ia'tú yödzö. ³⁵ Caní gaca, ibága'li' libí'ili' xíguia' que idútë rön quégaquië' bönni' tsahui' le gulalaj luyú, ga gudela' nu bëti Abel, bönni' tsahui', ga ridxintë nupa bëtigaca Zacarías, zxí'inë' Berequías, bönni' na' bëtili'-në' gatsaj láhui'lö ga dë yudo', en ga dë bucugu lá'ayi ga na' tu'zégui'ë' böa' bëdxido' lahuë' Dios. ³⁶ Le nácatë rea' libí'ili', yúgu'të lë ni ila'baga' bönachi nacuá' dza ni zóaru' na'a.

*Jesús ribödxë' ni'a que yödzö Jerusalén
(Lc. 13:34-35)*

³⁷ Lësca' caní gunnë' Jesús:

—Jerusalén, Jerusalén, libí'ili' na' rútigacali'-në' bönni' tu'ë didza' uláz queë' Dios, en ruládxigacali' guiöj nupa nasöl-lë'ë Dios. Zián luzuí gú'unida' utuba' libí'ili' quia', ca runba' yöjede, rutúbiba' bórado' queëba' zxañ xíliba', pero biti' gú'unili'. ³⁸ Buli'yútsöca', cá'asö ugá'ana yu'u lídxili'. ³⁹ Caní gaca, tu' rea' libí'ili', na'a isí lo biti' ulé'eli' neda' cate' innárolí': “Lá'ayi náquië' Bönni' na' zë'ë uláz queë' Xanru'.”

24

Rigúxjö'ë Jesús ca si' ulu'quínnajë' yudo'

(Mr. 13:1-2; Lc. 21:5-6)

¹ Birúajë' Jesús chila yudo', en tsanni ni' rizë'ë ni', gula'bígui'ë bönni' usëda queë' ga na' zoë', ate' bulu'luí'inë' Lë' ca náacagaca zö'ö nagú'ugaca lë'a yudo'. ² Bubi'ë didza' Jesús, ate' rë' légaquië':

—¿Rilé'etseli' yúgu'të lë ni? Le nácatë rea' libí'ili', bití' ca' ugá'ana guiöj nabaga' luzë'e ni, le cabí iguínnaj.

Le ilaca bë' chizóa idxín dza údxi que yödzülió

(Mr. 13:3-23; Lc. 21:7-24; 17:22-24)

³ Cate' ni' rö'ë Jesús ga naca lu Guí'a Yaga Olivo, bila'dxinë' bönni' usëda queë' ga na' zoë' queëzë', en të' Lë':

—Gudíxjöi' netu', ¿bátaxi ilaca lë ni, en bizxi gaca bë' dza huödu', en dza údxi que yödzülió ni?

⁴ Ní'irö bubi'ë didza' Jesús, ate' rë' légaquië':

—Buli'yú para cabí nu si' ye'e libí'ili', ⁵ tu' zá'gaquië' zían bönni' légaquië' ca lea' neda'. Ila'nnë' náacagaquië' Cristo, en ila'zí' yé'enë' bönachi zían. ⁶ Huayönili' raca gudil-la, en le ruí'i didza' que gudil-la, pero bití' cö'öli' böniga, tu' ral-la' ilaca yúgu'të lë ni, pero cabí ridxini dza údxi cate' ilácarö lë ni. ⁷ Til-la tu yödzü len ia'tú yödzü, ate' tu ga nu rinná bë' len ia'tú ga nu rinná bë'. Ilatsaj yödzühuë' zxön, en gaca gubín, ate' zían lataj tödi budó' zxu'. ⁸ Yúgu'të lë ni náacagaca le isí lógaca yugu' le ila'guí'i ila'zaca' bönachi.

⁹ Ní'irö ulu'dödi bönachi libí'ili' lu na' nu usaca' zi' libí'ili'. Yúgu'të bönachi ulu'dí'i libí'ili' tu' dá'ali' neda', en ilútië' bál-lali' libí'ili'. ¹⁰ Cate' gaca caní,

gaca chopa ládxi'gaca zían bönachi, en ulu'cá'ana neda', ate' udödi tu ia'tú luzé'e, en tu ia'tú udí'i luzé'e. ¹¹ Ní'irö ulu'luí'i lógaquië' zían bönni' ta'zí' yé'ë. Ulu'luí'i cuíngaquië' ca yugu' bönni' tu'ë didza' uláz queë' Dios, en ila'zí' yé'enë' bönachi zían. ¹² Iluá'ada' dö' bönachi, ate' que lë ni na' bíti'rö ila'dxí'i böchi' luzé'eguequi. ¹³ Nu guequi tsaz queë' Dios ga idxintë dza údxi, nu ni ulá. ¹⁴ Idú yödzölió gaca libán que didza' dxí'a ca rinná bē'ë Dios para gaca ba nalí que lógaca yúgu'të bönachi izá'a, ate' ní'irö idxín dza údxi.

¹⁵⁻¹⁶ 'Nu ulaba lë ni ral-la' uzéajni'i ladxi'. Gunnë' Daniel, bönni' bē'ë didza' uláz queë' Dios, gunnë': "Tsaza le rudí'inë' Dios lataj lá'ayi queë' Dios, lë na' rusuniti." Cate' ilé'eli' gaca caní, ní'irö nuli' zóali' luyú Judea ral-la' tsöjzxúnajli' saca' guí'ado'. ¹⁷ Nu dxía ícjo'olö biti' gal-la' huötaj tsöjzxí' bi dë que lu yu'u, pero ral-la' izxúnajtë. ¹⁸ Nu zoa la' guixi', biti' gal-la' huöaj tsöjzxí' lari' que. ¹⁹ Bica' bayechi' yugu' nigula si' ulu'zóanu bí'ido' quégacanu, enca' nigula ni' tu'gádxí'nu-bi' bí'ido' quégacanu cate' idxín dza ni'. ²⁰ Buli'lidzë' Dios inábili'-në' cabí idxín dza ni' izxúnajli' cate' raca beo' ziaga o cate' naca dza lá'ayi, ²¹ tu' ila'guí'i ila'záca'tërö bönachi dza ni' ca gula'guí'i gula'záca' bönachi dza ni'te cate' si' guta' guró'ö yödzölió, ga ridxintë na'a dza, en calëga dza zá'gaca biti' ila'guí'i ila'záca' caní. ²² Cate' idxín dza ni', channö Dios biti' cuéqui lahuë' quégaquië', cuntu nu ulá, pero cuéqui lahuë' quégaquië' dza ni', en gácalenë' nupa guró cazë' Lë'. ²³ Ní'irö biti' tséajlë'ëli' channö nu idxín queëli', en guíë libí'ili': "Buli'yútsöca', ni zoë' Cristo", o inná: "Ni' zoë'." ²⁴ Ulu'luí'i lógaquië' zían bönni'

ta'zí yë'ë, en ila'nnë' nácagaquië' Cristo, o ila'nnë' tu'ë didza' uláz queë' Dios. Ilunë' le ilaca bë', en le ilún ga ulu'bani bönachi, ate' ila'zí yé'enë' nupa guró cazë' Dios channö huala'zéqui'në'.
²⁵ Buli'yútsöca', chigudxi caza' libí'ili' yúgu'të lë ni zí'atëlö ca si' ilaca. ²⁶ Que lë ni na', bití' irúajli' channö ila'dxín queëli' nupa ilë libí'ili': "Buli'yútsöca', ni' zoë' Cristo lu lataj cá'asö." Lësca' caní, bití' tséajlë'ëli' channö ila'nná: "Buli'yútsöca', lu yu'u zoë'." ²⁷ Ca na' raca cate' rëpi yösa ga rilén gubidza, en ruzení' ga ribía gubidza, lësca' caní gaca cate' huöda' neda', Bönni' Guljë' Bönachi.
²⁸ Ilácatë caní, ca na' ta'nná bönachi: "Gátí'tës ga dë tu le nati, ni' ulu'dubi cázaba' bíchulab."

Ca gaca cate' huödë' Bönni' Guljë' Bönachi
(Mr. 13:24-37; Lc. 21:25-33; 17:26-30, 34-36)

²⁹ Gunnë' ca' Jesús:

—Tödi yugu' dza ni' cate' ila'guí'i ila'zaca' bönachi caní, ichul-la gubidza, ate' beo' bití' gunna bení' que. Ila'guínnajba' böljaj lúzxiba, ate' ila'zxízi le nalá'gaca naca tsutsu lúzxiba. ³⁰ Ní'irö ilá' lahui lúzxiba le gaca bë' huöda' neda', Bönni' Guljë' Bönachi, ate' ila'bödxi yechi' yúgu'të bönachi yödzölió ni, cate' ila'lé'e neda', Bönni' Guljë' Bönachi, suzá'a lu böaj lúzxiba, dë lu na'a yöl-la' unná bë', en yöl-la' huáca zxön. ³¹ Ní'irö isöl-la'gaca'-në' gubáz lá'ayi quia'. Ulu'cödxë' zidzaj lúzuba' böa' guixi', ate' ulu'tubë' nupa naböa' quia', nacuá' idapa la'atë yödzölió, en yúgu'të lataj zxan lúzxiba.

³² 'Buli'zéajni'i ládxi'li' le rusedi libí'ili' le raca que yaga higo. Cate' ta'lén ni'a në'e yúludo',

en chirubía xilagui' yúludo', inözili' chizóa idxín cusubá. ³³ Lësca' caní, cate' ilé'eli' taca yúgu'të læ ni, inözili' chizóa idxín dza údxi na', en chiridzaga lahui. ³⁴ Le nácatë rea' libí'ili', yúgu'të læ ni ilaca zí'atëlö ca ilátigaca bönachi nacuá' dza ni'. ³⁵ Huadödi quégaca lúzxiba, en luyú ni, pero yugu' xtídza'a bití' ila'dödi cá'asö.

³⁶ 'Cate' idxín dza ni' cuntú nu nözi. Bití' nözguequinë' gubáz lá'ayi queë' Dios nacué' yehua' yubá, en bití' nözda' neda', Zxí'inë' Dios, pero tuzë' Dios Xuz nözinë'.

³⁷ 'Ca na' guca dza cate' ni' zoë' Noé, lësca' caní gaca cate' huöda' neda', Bönni' Guljë' Bönachi. ³⁸ Yugu' dza ni' zí'atëlö ca si' idxín nisa guió'j le busuniti yödzölió, gulë'aj gulahuë', bulu'tsaga ná'agaquië', en bulu'dödë' zxi'inigaquië' lu yöl-la' rutsaga na' ga bidxintë dza guyázië' Noé læ'e barco zxön ni' benë', ³⁹ en bití' gulé'quibe'enë' cate' bidxintë nisa guió'j le busuniti yödzölió, ate' gula'nítië' yúgu'të'. Lësca' caní gaca cate' si' huöda' neda', Bönni' Guljë' Bönachi, cuntú nu gué'quibe'e. ⁴⁰ Dza huöda' ila'cu'ë chopë' bönni' la' guixi'. Tuë' uchë'a-në' quia', ate' ia'túë' ucá'ana'-në'. ⁴¹ Ila'cuá'anú chópanu nigula nacuá'anú huëtu. Tunu uchë'a-nú quia', ate' ia'tunu ucá'ana'-nu.

⁴² 'Buli'subán ládxi'li' tu' cabí nözili' bizxi dza huöda' neda', Xanli'. ⁴³ Na'a, guli'tséajni'i læ ni. La'tu' nözinë' xan yu'u bizxi dza guidë' gubán, huanë'ë yëla, en bití' gu'ë lataj nu quidaj zö'ö para cuan le dzö'ö lidxë'. ⁴⁴ Que læ ni na', buli'subán ládxi'li' ca' libí'ili', tu' huöda' neda', Bönni' Guljë' Bönachi, tu dza bití' nuzóa icjali'.

Bönni' huen dxin tsahui', en bönni' huen dxin biti' náquië' tsahui'

(Lc. 12:41-48)

⁴⁵ Gunnë' ca' Jesús:

—¿Nuzxi caz bönni' huen dxin náquië' tsahui', en réajni'inë', bönni' huen dxin na', xanë' cu'ë lu në'ë bönachi nacua' lidxë' para gu'ë le ilágugaca cate' idxín dza? ⁴⁶ Bica' ba bönni' huen dxin na' náquië' tsahui', bönni' na', cate' udxinë' xanë', uduxáquië' lë' caní runë' le nudödë' xanë' lu në'ë. ⁴⁷ Le nácatë rea' libí'ili', yúgu'të le dë queë' xanë', udödë' lu në'ë bönni' huen dxin na' runë' caní. ⁴⁸ Channö huóáquië' bönni' huen dxin queë' huiá' dö', en sa' ladxë'ë, innë': “Huadzenë' xana', en biti' huódatië'”, ⁴⁹ en channö isí lahuë' gundë' zi' bönni' túnlenë' lë' tsözxön dxin, en isí lahuë' ca' gu'aj gágulenë' nupa ta'zudxi, ⁵⁰ ní'irö huödë' xanë' bönni' huen dxin na' tu dza cate' biti' zoë' ribözë', o tu yëla biti' réquinë'. ⁵¹ Ní'irö xanë' na' usaca' zí'dë'ë bönni' huen dxin na', en gunë' ga gaca queë' ca na' ral-la' gaca quégaca nupa tu'lu'isö tsahui' cuínguequi. Ní'irö cödxí yechë'ë, en gagu zxea láyë'ë.

25

Rucúdzü'ë didza' Jesús ca naca quégacabi' chibi' bi'i nigula ra'bando'

¹ Gunnë' ca' Jesús:

—Ca gaca quégaca nupa ila'yaza ga rinná bë'ë Dios yehua' yubá naca ca guca quégacabi' chibi' bi'i nigula ra'bando'. Gula'zí'ibi' le nuágaca guí quégacabi', ate' bila'rúajbi' tsöjtságagacabi' bönni' utsaga në'ë. ² Gáyu'bi' nácagacabi' bi'i

biti' ta'yéajni'ibi' ate' ia'gáyu'bi' nasína'gacabi'.
³ Yugu' bi'i nigula biti' ta'yéajni'ibi' na' gula'z'í'ibi'
 le nuá'gaca guí' quégacabi' pero biti' guluá'abi'
 ia'lati' za régui. ⁴ Yugu' bi'i sina' na' guluá'abi'
 za régui lu böga'do' quégacabi' len le nuá'gaca
 guí' quégacabi'. ⁵ Tu' gudzenë' bönni' utsaga në'ë,
 gudödi yëla lógacabi', en gulásitëbi'. ⁶ Cate' bidxín
 idú guluhuëla, biyön chi'i nu rinnë zidzaj, rnna:
 "¡Chizë'ë bönni' utsaga në'ë! ¡Guli'rúaj tsöjtságali-
 në'!" ⁷ Ní'irö gula'yásabi' yúgu'tëbi' bi'i nigula
 na', ate' bulu'pá'abi' le nuá'gaca guí' quégacabi'.
⁸ Gulu'í'ibi' didza' bi'i biti' ta'yéajni'ibi' na', en
 gulëbi' yugu' bi'i sina' na': "Guli'gunna queëtu'
 láti'do' za régui queëli' tu' tu'úlu le nuá'gaca
 guí' queëtu' ni." ⁹ Bulu'bí'ibi' didza' bi'i sina'
 na', gula'nnabi': "Biti' gaca, tu' cabí bi ugá'ana
 queëtu', en queëli'. Guli'tséajtsöca' ga ridó'o za
 régui, tsöj'ö'uli' queëli'." ¹⁰ Tsanni ni' söjácabi'
 söjxí'gacabi' le, bidxinë' bönni' utsaga në'ë.
 Yugu' bi'i na' nacuá'abi' sina', en ta'bözabi' lë'
 gula'yú'ulentëbi' lë' ga na' raca laní que utsaga
 na', ate' la' guyáyajtë yu'u. ¹¹ Gudödi ni' ia'z'íca'röbi'
 bi'i nigula ra'bando' na' bila'dxinbi' ni', ate'
 bulu'lídzabi'-në', en gula'nnabi': "Xan, Xan, gusalaj
 queëtu'." ¹² Lë' bubí'ë didza', rnnë': "Le nácatë rea'
 libí'ili', biti' nözda' gazxi libí'ili'."

¹³ Ní'irö Jesús gudxë' légaquië':

—Buli'subán ládxi'li', tu' cabí nözili' bizxi dza o
 bizxi yëla huöda' neda', Bönni' Guljë' Bönachi.

Rucúdzu'ë didza' Jesús ca naca que dumí zaca'

¹⁴ Gunnë' ca' Jesús:

—Ca gun Nu na' rinná bē' yehua' yubá naca ca benē' tu bönni', chizóa tsejē' zi'tu'. Bulidzē' yugu' bönni' huen dxin queē' en gulu'ë yugu' le dē queē' lu ná'agaquiē'.

¹⁵ 'Tuē' bönni' huen dxin na', gulu'ë gayu' dumí nazaca' lu nē'ë, ate' ia'tué' gulu'ë chopa dumí nazaca' lu nē'ë. Ia'tué' gulu'ë tu dumí nazaca' lu nē'ë. Tu tuē' gulu'ë lu nē'ë tsca huéaj le ila'zéqui'nē'. Ní'irö la' guzá'atē' ga naca zi'tu'.

¹⁶ Guyijē' bönni' huen dxin na' guzxi'ë gayu' dumí nazaca' na', en yöjtíjalenē' le ia'gayu' dumí nazaca'. ¹⁷ Lēasca' caní, bönni' na' guzxi'ë chopa dumí na', yöjtíjalenē' le ia'chopa ca'. ¹⁸ Bönni' na' guzxi'ë tu dumí guyijē', en yöjchö'önē' lu yu, ate' bucáchē'ë dumí queē' xanē' lu yu ni'.

¹⁹ 'Cate' chigudzé, budxinē' xángaquiē' bönni' huen dxin na', ate' bucá'analenē' légaquiē' tsahui'.

²⁰ Ga gusí lo bidxintē' bönni' na' guzxi'ë gayu' dumí nazaca' na', en sunu'ë ia'gayu' dumí ca', ate' rē' xanē': "Xan, gayu' dumí gulú'u lu na'a. Ni dē ia'gayu' dumí ca' yöjtíjalena' le." ²¹ Xanē' na' rē' lē': "Naca dxi'a. Nacu' huen dxin tsahui'. Tsáhui'do' benu' cate' ni dē lu no'o láti'do'os. Na'a yénni'tērö cu'a lu no'o. Guyaza ga zoa', udzéalenu' neda'."

²² Gudödi ni' bidxinē' ca' bönni' huen dxin na' guzxi'ë chopa dumí nazaca', ate' rnnē': "Xan, chopa dumí gulú'u lu na'a. Ni dē ia'chopa dumí ca' yöjtíjalena' le." ²³ Ní'irö xanē' na' rē' lē': "Naca dxi'a. Nacu' huen dxin tsahui'. Tsáhui'do' benu' cate' ni dē lu no'o láti'do'os. Na'a, yénni'tērö cu'a lu no'o. Guyaza ga zoa', udzéalenu' neda'."

²⁴ Ní'irö cate' bidxinē' bönni' huen dxin na' guzxi'ë tu dumí nazaca' na', rnnē': "Xan, nözda' nacu'

bönni' bizxaj, tu' rulapu' ga biti' guzu', en rutubu' ga biti' guchilju'. ²⁵ Que lë ni na' gúdxida' li', ate' guyija', yöjčácha'a dumí quiu' lu yu. Ni dë na'a le nequi quiu'." ²⁶ Ní'irö bubi'ë didza' xanë', en rë lë: "Nacu' huen dxin biti' naca tsahui', en xöhuëdi. Nöz quëzinu' rulapa' ga biti' guza', en rutuba' ga biti' guchilja'. ²⁷ Que lë ni na', gácarö dxi'a quiu' la'tu' bunödzju' dumí quia' lu ná'agaquië' bönni' ulu'gunë' le dxin, ila'guíljalënë' le ia'lati', para cate' huöda' neda', uzi'a le nequi quia' len icja ca'." ²⁸ Ní'irö xanë' na' gudxë' nupa nacuá' ni': "Guli'cúa dumí na' dë lu në'ë bönni' ni, en guli'cú'u le lu në'ë bönni' na' dë queë' chi dumí." ²⁹ Núti'tës nu rugún tsahui' dxin le dë queë', zoa nu unödzej queë' ia'lati', ate' gáta'da' queë', pero nu na' bití' rugún tsahui' dxin le dë lu në'e, la's dui le dë queë' idúa. ³⁰ Na'a, bönni' huen dxin biti' naca tsahui' ni, guli'tsöjchú'una-në' ní'ilö ga naca chul-la. Ni' cödxí yéché'ë, en gagu zxea láyë'ë.

Cristo uchi'a usöröë' quégaca bönachi

³¹ Gunnë' ca' Jesús:

—Cate' ni' huöda' neda', Bönni' Guljë' Bönachi, idinná bë'a, ate' dzágagaquië' neda' yúgu'të gubáz lá'ayi quia', ní'irö cö'a lataj tsahui' quia', ga na' uchi'a usöröa' quégaca bönachi. ³² Ulu'dubi dërö lahua' neda' bönachi yödzölió ni, ate' ucu'a léguequi tsölá'a huéaj ca runë' bönni' uyú bö'cu' zxila', rucu'ë-ba' tsölá'a huéajba' yugu' chivo, en yugu' bö'cu' zxila'. ³³ Yugu' bö'cu' zxila' na' ucu'ë-ba' cuita lë'ë ibëla, ate' yugu' chivo na' ucu'ë-ba' cuita lë'ë yögöla. ³⁴ Ní'irö, neda', bönni' unná bë', guía' nupa nacuá' cuita lë'a ibëla, innía': "Guli'dá

ga zoa', libí'ili' bubéajë' Xuza' libí'ili' quez queë'. Nequi queëli' lataj ga na' rinná bë'ë, lë na' bupë'ë queëli' dza ni'te cate' ni' benë' yödzölió. ³⁵ Caní nequi queëli' tu' guduna', ate' bénnali' le gudahua'. Gubidxa' nisa, ate' bénnali' le gu'a. Guca' ca tu bönni' ridá zi'tu', ate' gulú'uli' neda' lídxili'. ³⁶ Biyadzaj le gácua', ate' bugáculi' neda' le ráculi'. Güf'ida', ate' buduyúli' neda'. Guyu'a lidxi guié, ate' buduyúli' neda'." ³⁷ Ní'irö ulu'bi'ë didza' bönni' tsahui' na', ilë' neda': "Xan, ¿bátaxi bilé'etu' Li' gudunu', ate' bugágutu' Li'? ¿Bátaxi gubidxu', ate' bénnatu' le gu'u? ³⁸ ¿Bátaxi bilé'etu' Li' gudó' zi'tu', ate' gulú'utu' Li' lídxitu'? ¿Bátaxi biyadzaj le gacu', ate' bugácutu' Li' le rácutu'? ³⁹ ¿Bátaxi bilé'etu' Li' güi'inu', o guyú'u lidxi guié, ate' buduyútu' Li'?" ⁴⁰ Ubi'a didza' neda', bönni' unná bë', ate' guía' légaquië': "Le nácatë rea' libí'ili', tu' benli' caní queë' nu bönni' böcha'ado' ni, sal-la' náquië' bönni' cá'asö, quia' neda' caz benli' ca'."

⁴¹ Ní'irö guía' nupa nacua' cuita lë'a yögöla, innía': "Gulí'cuíta ga zoa', libí'ili' na' nabága'li' xíguia', tsöjtsázali' lu guí' na' biti' ulu, lë na' bupë'ë Dios ni'a que tu' xihui', en quéguequi gubáz dá'gaca le. ⁴² Caní gaca queëli' tu' guduna', ate' biti' bénnali' le gahua'. Gubidxa' nisa, ate' biti' bénnali' le guí'ja'. ⁴³ Guca' ca bönni' ridé' zi'tu', ate' biti' gulú'uli' neda' lídxili'. Biyadzaj le gácua', ate' biti' bugáculi' neda' le ráculi'. Güf'ida', enca' guyu'a lidxi guié, ate' biti' buduyúli' neda'." ⁴⁴ Ní'irö ila'nná ca' nupa na', ilë neda': "Xan, ¿bátaxi bilé'etu' Li' gudunu', o gubidxu', o gucu' ca bönni' ridé' zi'tu', o biyadzaj le gacu', o güi'inu', o guyú'u lidxi guié, ate' biti'

gúcalentu' Li'?" ⁴⁵ Ní'irö ubi'a didza' neda', bönni' unná bē', guía' légaquiē': "Le nácatē rea' libí'ili', tu' cabí'bi benli' que tu nu nutsa' ladaj nupa nacuá' ni, sal-la' naca cá'asö nu na', bití' bi benli' quia' neda'." ⁴⁶ Ní'irö bönachi tuá' dö' na' la' tsöjtsázagacatē ga ni' ila'guí'i ila'záca'tica'sö, pero bönachi tsahui' ni' gata' yöl-la' na'bán idú quéguequi.

26

Tun xtídza'gaquiē' bönni' yudo' ila'zönē' Jesús
(Mr. 14:1-2; Lc. 22:1-2; Jn. 11:45-53)

¹ Cate' budxi bē'ē Jesús yugu' didza' ni, gudxē yugu' bönni' usēda queē', ² rnnē':

—Nöz quézili' ia'chopa dza idxín Laní Pascua, ate' dza na' neda', Bönni' Guljē' Bönachi, ulu'dödē' neda' lu ná'agaca nupa ulu'dá' neda' lē'e yaga cruz.

³ Ní'irö bila'dxinē' yugu' bixúz unná bē' len yugu' bönni' yudo' usedi, en bönni' gula tu'zējni'inē' bönachi judío, ate' bulu'dubē' ga naca lö'a lidxi bixúz lo, lē' Caifás. ⁴ Ni' gulún xtídza'gaquiē' ila'zönē' Jesús, lu yöl-la' rizí' yē' quégaquiē', para ilútiē' Lē'. ⁵ Ta'nnē':

—Bití' gunru' lē' ni dza laní, para cabí' ila'dzatsa bönachi.

Tu nigula rigú'unu le rilá' zxixi icjē' Jesús
(Mr. 14:3-9; Jn. 12:1-8)

⁶ Cate' ni' zoē' Jesús lu yödzo Betania lu yu'u lidxē' Simón, bönni' na' güf'inē' huē' nudzu' ruzödi, ⁷ bidxinnu cúdzu'lē' Jesús tu nigula, nuá'anu tu böga'do' néquini guiöj nazaca', en yudzu tu le rilá' zxixi le nazáca'da', ate' gulú'unu le icjē' Jesús cate'

ni' rō'ë rahuë'. ⁸ Cate' bila'lé'enë' bönni' usëda queë' Jesús lë ni, gula'lenë', ta'nnë':

—¿Bizx que réqui ditaj lë ni? ⁹ Guca nu guti' lë ni, en si' dumí zían para gácalenru' yugu' bönachi yechi'.

¹⁰ Cate' biyönnë' Jesús lë ni, rë' légaquië':

—¿Bizx que rnnëli' queënu nigula ni? Tshahi' naca le bennu quia'. ¹¹ Yugu' bönachi yechi' ila'cuá'lentica'sö libí'ili', pero neda' biti' ugá'analentica'sa' libí'ili'. ¹² Le bennu nigula ni, gulú'unu neda' le rilá' zxixi ni, naca le rupá'anu neda' para dza igácha'a yeru ba. ¹³ Le nácatë rea' libí'ili', gátitës luyú yödzölió ga gaca libán que didza' dxi'a ni, lësca' ila'guixjö' bönachi le bennu nigula ni quia' para nu tsöjné lënu.

Rizí' lu nëë Judas udödë' Jesús lu ná'agaquië' bönni' unná bë'

(Mr. 14:10-11; Lc. 22:3-6)

¹⁴ Ní'irö guyijë' Judas Iscariote ga na' nacu'ë bixúz unná bë'. Náquië' bönni' dzáguië' chínnuë' na' dá'gaquië' Jesús, ¹⁵ ate' gudxë' légaquië':

—¿Bizxi gúnnali' quia' channö neda' udöda'-në' Jesús lu ná'ali'?

Bulu'gá'analenë' lë' tshahi' ilu'ë lë' chi uruá' dumí plata. ¹⁶ Ní'irö gusí lahuë' Judas na' risí ribö'ë udödë' Jesús lu ná'agaquië'.

Le ráguru' le rusá' ládxi'ru' ca gútië' Xanru'

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Cate' naca dza risí lo laní quégaquië' bönni' judío cate' tahuë' yöta xtila le cabí nazí'i cúa zi que,

gula'bígui'ë bönni' usëda queë' Jesús ga zoë', en tē Lē':

—¿Gazxi rē'ënu' tsöjpá'atu' queëru' para gáguru'-ba' bö'cu' zxíla'do' dzö' Laní Pascua?

¹⁸ Jesús rē' légaquië':

—Guli'tséajtsöca' yödzö ni' ga na' zoë' tu bönni', en guli'guië': “Bönni' rusédinë' netu' rnnë': Chizá' gala' dza quia'. Lu yu'u lidxu' gágulengaca'-në' bönni' usëda quia' bö'cu' zxíla'do' dzö' Laní Pascua.”

¹⁹ Ní'irö gulunë' bönni' usëda queë' ca na' gunná bé'enë' Jesús légaquië', ate' bulu'pé'ë le ilahuë' dzö' Laní Pascua.

²⁰ Cate' chigudzö' dza na', Jesús gurö'lenë' idxínnutë' bönni' usëda queë' tahuë'. ²¹ Tsanni ni' tahuë', Jesús rē' légaquië':

—Le nácatë rea' libí'ili', tu nu nutsa' ládjali' ni udödi neda'.

²² Ní'irö bulu'huí'ini ládxi'gaquië', en gula'nábinë' Jesús tu tuë', ta'nnë':

—Xan, ¿naru' neda'?

²³ Bubi'ë didza' Jesús, rnnë':

—Bönni' ni runë' në'ë tsözxön len na'a lu yö'öna, bönni' ni udödë' neda'. ²⁴ Le nácatë neda', Bönni' Guljë' Bönachi, uyija' ga gátia' ca na' nazúaj lu guichi lá'ayi ca ral-la' gaca quia', pero bica' bayechi' nu na' udödi neda' gátia'. Gácarö dxi'a queë' bönni' na' la' cabí guljë'.

²⁵ Ní'irö bubí'ë didza' Judas, bönni' na' udödë' Jesús, rnnë':

—Bönni' Usedi, ¿naru' neda'?

Jesús rē' lē':

—Ön, li' na'.

²⁶ Tsanni ni' tahuë', gudélë'ë Jesús yöta xtila, en gudxë' Dios: "Xclenu'." Ní'irö buzxuzxjë' le, en bunödzejë' quégaquië' bönni' usëda queë', rnnë':

—Guli'sí', guli'gagu. Lë ni le naca caza'. Ca bena' que yöta xtila ni ruluí'i ca gaca que le naca caza'.

²⁷ Gudélë'ë ca' tu zxíga'do', en gudxë' Dios: "Xclenu'." Ní'irö bunödzejë' ca' quégaquië', rnnë':

—Guli'gui'aj yúgu'tëli'. ²⁸ Lë ni ruluí'i ca naca xichöna' le run tsutsu didza' cubi rucá'ana tsahui'. Xichöna' na' ilalaj ni'a quégaca bönachi zían para gaca uniti lahuë' Dios yugu' dul-la' nabága'gaquië'.

²⁹ Rea' ca' libí'ili', bíti'rö guí'ja' xisi le ribía lubá uva ni cate' idxinrö dza ni' guí'jalena' libí'ili' tu le cubi ga ni' rinná bë'ë Xuza'.

Jesús rnnë' innë' Pedro biti' núnbë'ë Lë'

(Mr. 14:26-31; Lc. 22:31-34; Jn. 13:36-38)

³⁰ Cate' budxi gulúl-lë' yöl-la' ba queë' Dios, yöjáquië' lu Guí'a Yaga Olivo. ³¹ Ní'irö Jesús rë' légaquië':

—Yúgu'tëli' gaca chopa ládxi'li', en ucá'anali' neda' na'a dzö'ni, tu' nazúaj lu guichi lá'ayi ca gaca quia', le rnna: "Guna' ga gátië' Bönni' Uyú Bö'cu' Zxila', ate' ilásilasiba' bö'cu' zxila' na'." ³² Cate' ubana' lu yöl-la' guti, ní'irö tséaja' tsöjnörúa' loli' saca' luyú Galilea.

³³ Ní'irö bubí'ë didza' Pedro, en rë' Jesús:

—Sala' ilaca chopa ládxi'gaquië', en ulu'cá'anë' yúgu'të' Li', neda' biti' gaca chopa ládxa'a, biti' ucá'ana' Li'.

³⁴ Jesús gudxë' lë':

—Le nácatë rea' li', na'a dzö'ni, cate' si' cödxilöba' böra, li' innó' tsonna luzuí' biti' núnbë'u neda'.

35 Ní'irö Pedro gudxë' Jesús:

—Sal-la' gátilentea' Li', biti' ca' innía' biti' núnbë'a Li'.

Lësca' caní gula'nnë' yúgu'të bönni' usëda queë'.

Jesús rulidzë' Dios la' yëla Getsemaní

(Mr. 14:32-42; Lc. 22:39-46)

36 Ní'irö Jesús bidxínlenë' légaquië' la' yëla Getsemaní, ate' gudxë' yugu' bönni' usëda queë' na', rnnë':

—Guli'cõ'tsöca' ni tsanni tséaja' ia'lati' ní'ilö, tsöjlidza'-në' Dios.

37 Jesús guchë'ë Pedro len iropë' zxi'inë' Zebedeo, ate' gusi lahuë' ruhuí'innë', en risëbi lãdxë'ë.

38 Ní'irö Jesús gudxë' légaquië':

—Ruhuí'ini lãdxa'a, en huáti caza' lu yöl-la' risëbi ladxi'. Guli'gá'ana ni, en guli'ná' yëla tsözxön len neda'.

39 Gudödë' Jesús ia'látido' ní'ilö, ate' ni biyéchuë'. Busudxín lahuë' lu yu, en bulidzë' Dios, gunné':

—Xuza', channö huáca, ben ga biti' gun bayudxi qui'i saca'a lë ni, calëga ca rë'ënda' neda', pero ca rë'ënu' Li' gunu'.

40 Cate' budxinë' Jesús ga na' nacu'ë bönni' usëda queë', yöjxáquië' légaquië' tasië', ate' rë' Pedro:

—¿Naru' cabí gúcatsö iná'alenu' neda' tsözxön yëla tu chí'ido'? 41 Guli'ná' yëla, en buli'lidzë' Dios inábili'-në' gácalenë' libí'ili', para cabí gú'ili' Satanás tu' xihui' lataj si' bë' libí'ili' le xihui'. Bö'naca cázali' nasína'tica'sö, pero lu yöl-la' bönáchisö queëli' nacuídi'li'.

42 Ní'irö guyijë' Jesús le buropi luzuí, en bulidzë' Dios, rnnë':

—Xuz, channö cabí gaca gunu' ga biti' qui'i saca'a lë ni, ben ca raza lãdxu'u Li'.

⁴³ Cate' böajë', leyúbölö buduxaquië' légaquië' tasië' tu' nadódirö yëla guiöj lógaquië'. ⁴⁴ Ní'irö buca'anë' Jesús légaquië', ate' guyijë' leyúbölö, en bulidzë' Dios le bunni luzuí, ate' tuz ca gunnë' zí'alö rnnë'. ⁴⁵ Leyúbölö böajë' ga na' nacu'ë bönni' usëda queë', en rë' légaquië':

—¿Rásitsali' na'a, en ruzi'tsö lãdxi'li'? Buli'yútsöca', chibudzaga lo. Neda', Bönni' Guljë' Bönachi, chinadöda' lu ná'agaquië' bönni' dul-la'. ⁴⁶ ¡Guli'chasa, uyéajru! Buli'yútsöca', bönni' na' rudödë' neda' chibidxinë' ni.

Ta'chë'ë Jesús nadzunë'

(Mr. 14:43-50; Lc. 22:47-53; Jn. 18:2-11)

⁴⁷ Tsanni ni' ru'ë Jesús didza' ni, Judas, bönni' nabábalenë' idxínnutë' na', la' bidxintë' ni', ate' dzágagaquië' bönni' zían lë', nuá'agaquië' guíë tuchi', en yugu' yágado'. Yugu' bixúz unná bë', en bönni' gula tu'zëajni'inë' bönachi judío nasól-la'gaquië' légaquië'. ⁴⁸ Judas, bönni' na' rudödë' Jesús, chibulu'inë' légaquië' tu le gunë' le gaca bë' nu naca Jesús, gunnë':

—Bönni' na' utsaga lahua'-në', Lë' na' Jesús. Guli'sönë'.

⁴⁹ Ní'irö gubígui'ë Judas ga na' zoë' Jesús, rnnë':

—Padiux, Bönni' Usedi.

Ní'irö la' busudxín lotë' Lë'. ⁵⁰ Jesús rë' lë':

—Böcha'a, ¿bizxi huen zo'o ni?

Ní'irö gula'biguë'ë bönni' na', ate' gula'zönë' Jesús. ⁵¹ Tuë' bönni' dzáguië' Jesús gulecjë' guíë tuchi' queë', en benë' huë', guchúguië' guídi náguië' bönni' huen dxin queë' bixúz lo. ⁵² Jesús gudxë' lë':

—Bugú' guié tuchi' quiu' lidxi. Yúgu'të nupa tu'dí'ini guié tuchi', lu guié tuchi' ilátigaca. ⁵³ ¿Naru' cabí nōzinu' huáca ulidza' Xuza', ate' Lë' la' isöl-la'të' ziantërö ca chinnu cō' gubáz lá'ayi le naca zían gáyu'ë tu cō' huéaj? ⁵⁴ Channö guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

⁵⁵ Ní'irö Jesús gudxë' yugu' bönni' ni':

—¿Birúajtsali' nuá'ali' guié tuchi', en yágado' para sönli' neda' ca runli' rizönli'-në' gubán? Yugu' dza gurö'a loli' ga naca lu chila yudo', en busédigacada' bönnachi, pero biti' guzxönli' neda'. ⁵⁶ Raca caní yúgu'të lé'ni para udxín le nazúaj lu guichi lá'ayi, ca na' gula'nnë' bönni' gulu'ë didza' uláz queë' Dios.

Ní'irö yúgu'të bönni' usëda queë' Jesús bulu'cá'anë' Lë', en bulu'zxúnnajë' ni'.

Ridxinë' Jesús lógaquië' bönni' yudo'

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ní'irö yugu' bönni' na' zōngaquië' Jesús gula'ché'ë Lë', ate' bila'dxinë' lahuë' Caifás, bixúz lo, ga ni' nudúbigaquië' ca' yugu' bönni' yudo' usedi len bönni' gula tu'zéajni'inë'. ⁵⁸ Pedro sōjnáhuë' Jesús zi'tu' zí'tu'sö, en bidxinë' ga naca lö'a lidxi bixúz lo na', para ilé'enë' nacxi utságuië' Jesús.

⁵⁹ Yugu' bixúz unná bë' len bönni' gula tu'zéajni'inë', en bönni' yudo' tu'chi'a tu'söröë', bulu'guiljë' nu uzegui Jesús didza' sal-la' si' yë'ë bönni' na', para gaca ila'chúguië' queë' gatië'. ⁶⁰ Cuntu nu bila'dzölinë' sal-la' bila'dxinë' bönni' zían, en gula'nnë' queë' le cabí nácatë. Ga búdxitë

bila'dxinë' chopë' bönni', ate' lu yöl-la' rizi' yë' quegaquië' gula'nnë' queë', ⁶¹ ta'nnë':

—Bönni' ni gunnë': "Huaca uquínna' judo' queë' Dios, ate' uchisa' le ia'tsonna dzasö."

⁶² Ní'irö guzuínë' bixúz lo na', en rë' Jesús:

—¿Naru' cabí rubí'tso' didza'? ¿Bizxi caz lë ni ta'nnë' bönni' ni quiu'?

⁶³ Jesús bití' bi gunnë'. Ní'irö bixúz lo gudxë' Lë':

—Ní'a queë' Xanru' Dios ban rinná bé'eda' Li' quíxjö'u le nácatë. Gudíxjö'i' netu' channö nacu' Li' Cristo, Zxí'inë' Dios.

⁶⁴ Jesús rë' lë':

—Ca na' rno' naca'. Le nácatë rea' libí'ili', ilé'eli' neda', Bönni' Guljë' Bönachi, rö'a cuita lë'ë' ibëla Dios, ga ni' dë lu na'a yöl-la' unná bë', ate' guída' lu böaj lúxiba, en idxina' ga zóali'.

⁶⁵ Ní'irö lu yöl-la' rilé queë' guchözë' bixúz lo lari' nácuë', rnnë':

—¿Gunnë' zi'ë bönni' ni queë' Dios! ¿Núzxirö naquíniru' nu innë queë' bönni' ni? Chibiyön quézili' didza' zi' bë'ë queë' Dios. ⁶⁶ ¿Nacxi rusáca'li' queë'li'?

Bulu'bi'ë didza', gula'nnë':

—Nabáguë'ë xíguia' gátie'.

⁶⁷ Ní'irö bulu'chejë' zxöna' lahuë' Jesús, en gulu'ë dö' queë'. Gula'gápë'ë ru'ë Jesús ia'zica'rë', ⁶⁸ en të Lë':

—¿Nácatso' Li' Cristo? Gunnëya'atsöca' na'a, ¿nuzxi na' gudapa' Li'?

Pedro rnnë': "Biti' núnbë'a-në' Jesús"

(Mr. 14:66-72; Lc. 22:56-62; Jn. 18:15-18, 25-27)

69 Tsanni ni' gulaca lë na', rö'ë Pedro lö'alö, ate' bidxinnu tunu nigula huen dxin ga na' zoë', ate' rnnanu:

—Lësca' li' gudálenü' Jesús, bönni' Galilea na'.

70 Gudá'baguë'ë Pedro lógaca bönachi nacuá' ni', rnnë':

—Biti' nözda' nuzxi que na' ru'u didza'.

71 Cate' birúajë' Pedro ga nu riyaza lö'a, bilé'enu-në' ia'tunu nigula, ate' gúdxinu nupa nacuá' ni':

—Bönni' ni gudálenë' ca' Jesús, bönni' Nazaret na'.

72 Leyúbölö gudá'baguë'ë Pedro, en buzötjë' Dios, rnnë':

—Biti' ca' núnbë'a-në' bönni' ni.

73 Iá'láti'do'os gudzé, gula'biga' nupa nacuá' ni' ga na' zoë' Pedro, en tē' lē':

—Le nácatë li' nunu' ca' tsözxön légaquië' tu' naca bē'u yöl-la' ru'isö quiu' didza'.

74 Ní'irö gusí lahuë' Pedro rudxía dö' cuinë', en ruzötjë' Dios, rnnë':

—Biti' ca' núnbë'a-në' bönni' ni.

La' ná'asö gurödxitëba' böra. 75 Ní'irö yöjnenë' Pedro didza' gudxë' Jesús lë', gunné': Cate' si' cödxilöba' böra, tsonna luzuí chigunnó' bití núnbë'u neda', ate' burúajë' Pedro ni', en gurödxí yéchi'dë'ë.

27

Tu'dödë' Jesús lu në'ë Pilato

(Mr. 15:1; Lc. 23:1-2; Jn. 18:28-32)

1 Cate' za' rení' dza na', gulún xtídza'gaquië' yúgu'të bixúz unná bē' len bönni' gula tu'zėjni'inë' bönni' judío para ilútië' Jesús. 2 Gula'ché'ë Jesús

náguë'ë, ate' bulu'dödë' Lë' lu në'ë Poncio Pilato, bönni' rinná bë'ë uláz que yödzö Roma.

Ratië' Judas

³ Cate' chinözinë' Judas, bönni' na' budödë' Jesús lu ná'agaquië' bönni' yudo', narugu queë' Jesús gátië', buí'innë', ate' yöju'ë chi uruá' dumí plata na' lu ná'agaquië' bixúz unná bë', en yugu' bönni' gula na'. ⁴ Rë' légaquië':

—Bena' dul-la' tu' budöda'-në' bönni' tsahui' gátië'.

Ní'irö të' lë':

—Biti' gun lë ni ga cö'ötu' böniga. Le ben cazu' li na'.

⁵ Ní'irö gurú'unë' Judas yugu' dumí plata na' ga naca chila yudo', ate' buzë'ë ni', en yöjsí yenë'.

⁶ Bulu'zi'ë bixúz unná bë' yugu' dumí plata na', ta'nnë':

—Biti' sa'yéaj cú'uru' dumí ni ga rigú'uru' dumí que yudo', tu' naca lazjë' tu bönni' ratië' bönachi.

⁷ Ní'irö gulún xtídza'gaquië', ate' gulá'uinë' dumí na' tu la' yëla queë' tu bönni' huen rö'ö para gaca ga ila'gáchë'ë bönni' zi'tu'. ⁸ Que lë ni na', ga ridxintë na'a dza nazí'i le lataj na', La' Yëla Rön. ⁹ Caní guca ca na' gunnë' Jeremías, bönni' bë'ë didza' uláz queë' Dios, gunnë': “Gula'guélé'ë chi uruá' dumí plata na', tsca le gula'zéqui'në' bönni' Israel Lë', ¹⁰ ate' dumí na' gulá'uinë' la' yëla queë' tu bönni' huen rö'ö. Lë ni bulu'uinë' Xana' neda'.”

Ridxinë' Jesús lahuë' Pilato

(Mr. 15:2-5; Lc. 23:3-5; Jn. 18:33-38)

11 Cate' bulu'sudxinë' Jesús lahuë' Pilato, bönni' na' rinná bē'ē uláz que yödZ Roma, bönni' ni gunábinë' Jesús, rē' Lē':

—¿Nacu' Li' Bönni' inná bé'enë' bönachi judío?

Jesús rē' lē':

—Ca nácasö rnno'.

12 Cate' yugu' bixúz unná bē' len bönni' gula tu'zėjni'inë' bulu'zégui'ë Jesús didza', biti' bi didza' bubi'ë Jesús. 13 Ní'irö Pilato rē' Jesús:

—¿Naru' cabí riyöntsenu' cate' xö le ta'nnë' quiu'?

14 Jesús biti' bi didza' bubi'ë. Caní guca, bubábinë' bönni' unná bē' na'.

Rirugu queë' Jesús gátie'

(Mr. 15:6-20; Lc. 23:13-25; Jn. 18:38-19:16)

15 Cate' naca dza Laní Pascua na', dē caz tu le runë' Pilato, bönni' unná bē' na', ca ta'naba bönachi rusanë' tuë' bönni' yu'ë lidxi guié, núti'tës nu té'ëni usanë'. 16 Dza na' tu bönni' nabáguë'ë xíguia', lē' Barrabás, yu'ë lidxi guié ni'. 17 Cate' bulu'dubi bönachi zían ni', Pilato gunábinë' légaquië', rnnë': —¿Nuzxi ré'ënili' usana' queëli'? ¿Naru' Barrabás o Jesús, Bönni' na' lē' Cristo?

18 Caní gunné' Pilato tu' réquibe'enë' bulu'dödë bönni' yudo' Jesús lu nē'ë tu' tu'zxé'enë' Lē'.

19 Tsanni ni' rō'ë Pilato ga na' ruchi'a rusöröë, nigula queë' gusöl-la'nu nu tsöjödxi lē', rnna:

—Biti' bi gunu' queë' bönni' tsahui' ni, tu' gúdxide'eda' guduyëla lu yëla béchigal tu' nözinë' Lē'.

20 Yugu' bixúz unná bē' len bönni' gula tu'zėjni'inë' gula'gú'u yöl-lē'ë bönachi zían na' para ila'nabi Pilato usanë' Barrabás na', ate' gútië'

Jesús. ²¹ Leyúbölö bē'ē didza' bönni' unná bē' na', rē' légaquiē':

—¿Núzxilē' chopē' ni rē'ēnili' usana'-nē' queēli'?

Gula'nnē':

—Barrabás.

²² Ní'irö Pilato gunábinē' légaquiē', rnnē':

—¿Nacxi guna' queē' Jesús, bönni' na' lē' Cristo?

Yúgu'tē' ta'nnē':

—¡Budē'ē lē'e yaga cruz!

²³ Ní'irö bönni' unná bē' na' rē' légaquiē':

—¿Bizxi dö' benē'?

Zídzajrö gulu'ē didza', ta'nnē':

—¡Budē'ē lē'e yaga cruz!

²⁴ Cate' réquibe'enē' Pilato biti' birúaj xtídzē'ē, pero gula'dzátsarö bönachi, ní'irö gudélē'ē nisa, en gudibi nē'ē lógaquiē', rnnē':

—Biti' bi xíguia' nabága'a neda' tu' nözi yöl-la' guti queē' bönni' tsahui' ni. Le gun cázali' libí'ili' lē ni.

²⁵ Bulu'bí'i didza' yúgu'tē bönachi ni', ta'nná:

—¡Yöl-la' guti queē' bönni' ni ibága'tu' netu', en ila'baga' ca' zxí'initu'!

²⁶ Ca' guca, Pilato busanē' Barrabás na' lu ná'agaquiē'. Ní'irö gunná bé'enē' bönni' rōjáquiē' gudil-la ila'guínē' Jesús, ate' gudödi ni' budödē' Lē' lu ná'agaquiē' para ulu'dē'ē Lē' lē'e yaga cruz.

²⁷ Yugu' bönni' rōjáquiē' gudil-la nacu'ē lu nē'ē bönni' unná bē' na' gula'ché'ē Jesús lu yu'u yúlahui' nazí'i le pretorio, ate' ni' bulu'tubē' yúgu'tē bönni' rōjáquiē' gudil-la nacu'ē ni' ga na' zoē' Jesús.

²⁸ Ní'irö gula'lecjē' lari' nácuē' Jesús, en bulu'gácuē' Lē' tu lari' xiná chul-la, ca rácugaca nupa ta'nná bē'.

²⁹ Bulu'dxíē' icjē' tu le néquini ni'a nē'e yaga yötsi' le naca ca le dxia icjē' bönni' rinná bē'ē, en bulu'zōē'

tu guído' lu në'ë ibëla le ruluí'í ca tu yaga que bönni' yúlahui'. Ní'irö bulu'zóa zxbib' lahuë', en bulu'titjè' Lè', ta'nnè':

—¡Bica' ba Li', rinná bé'enu' bönachi judío!

³⁰ Ní'irö bulu'chejè' Lè' zxöna', ate' bulu'guélè'ë gui na', en gula'guínè' icjè'. ³¹ Gudödi bulu'titjè' Jesús, gula'lecjè' lari' na' nácuë', ate' bulu'gácuë' Lè' lari' que cazè'. Ní'irö gula'chë'ë Lè' para tsöjdá'agaquië' Lè' lè'e yaga cruz.

Tu'dë'ë Jesús lè'e yaga cruz

(Mr. 15:21-32; Lc. 23:26-43; Jn. 19:17-27)

³² Cate' ni' bila'rúajè' bönni' na', yöjxáca'gaquië' Simón, tu bönni' Cirene, ate' gulunè' ga bi'ë yaga cruz queë' Jesús.

³³ Cate' bila'dxinè' lataj nazí'í le Gólgota, le rna lu didza' xidza', Lataj Que Böga' Ícjaru', ³⁴ bulu'guijè' Jesús nupi zi nutsí'í zxígalá'aba' böa' guixi'. Cate' buxí'í ru'ë Jesús, biti' gú'unnè' guíjè'.

³⁵ Cate' chinudá'agaquië' Lè' lè'e yaga cruz, gula'guísië' lari' nácuë', en bulu'quitjè' lahui le gaca bë' núzxilè' guequi queë'. Caní guca, budxín lè na' gunné' bönni' bë'ë didza' uláz queë' Dios, gunné': "Gula'guísië' lari' nácuá', en bulu'quitjè' lahui le gaca bë'." ³⁶ Ní'irö gula'bö'ë ni', tu'yúé' Jesús. ³⁷ Lësca' bulu'zóè' lè'e yaga cruz ícjalè' Jesús tu didza' le riguixjö' le nabáguë'ë le rna caní: "Bönni' ni Jesús, Bönni' rinná bé'enè' bönachi judío."

³⁸ Ga ni' dë'ë Jesús, bulu'dë'ë ca' lè'egaca yaga cruz chopè' bönni' gubán. Tuë' bulu'dë'ë cuita lè'ë ibëla, en ia'túë' na' cuita lè'ë yögöla. ³⁹ Gula'dödè' ni' yugu' bönni' bulu'lidza zí'ë Jesús, en bulu'tá ícjagaquië', tu'titjè' Lè', ⁴⁰ ta'nnè':

—¡Ön, Li' na' uquínnaju' yudo', ate' tsonna dzasö ca' uchísatso' le! ¡Busölá cuinu' na'a channö nacu' Li' Zxí'inë' Dios! ¡Bötjatsöca' lë'e yaga cruz na'!

⁴¹ Lësca' caní bulu'titjë' Lë' yugu' bixúz unná bë' len yugu' bönni' yudo' usedi, en yugu' bönni' yudo' fariseo, len bönni' gula tu'zéajni'inë', ta'nnë':

⁴² —Yugu' nu yúbölö busölë' bönni' ni, pero biti' gaca usölá cuinë'. Channö náquië' Bönni' inná bé'enë' bönachi Israel, huötjatsöquië' na'a lë'e yaga cruz, ate' tséajlë'ëru' Lë'. ⁴³ Lë' buzxöni ládxe'ë Dios. Dios usölá cazë' Lë' na'a channö raza ládxe'ë Lë', tu' gunné': “Zxí'inë' Dios naca'.”

⁴⁴ Lësca' caní yugu' bönni' gubán na' dá'gaquië' lë'egaca yaga cruz ga ni' dë'ë Jesús bulu'lidza zi'ë Lë'.

Ratië' Jesús

(Mr. 15:33-41; Lc. 23:44-49; Jn. 19:28-30)

⁴⁵ Cate' bidxín huagubidza, guchul-la idútë yödzölió ga bidxintë idú ridödi xihuö. ⁴⁶ Idú ridödi xihuö na', bë'ë zidzaj didza' Jesús, rnnë':

—Elí, Elí, ¿lama sabactani?

Didza' ni rnna lu didza' xidza': “Dios quia', Dios quia', ¿bixx que nubéaj ládXu'u neda'?”

⁴⁷ Cate' nupa nacué' ni' bila'yöni didza' ni, ta'nná:

—Bönni' ni rulidzë' Elías, bönni' ni' bë'ë didza' uláz queë' Dios.

⁴⁸ La' guxíti'të' tuë' bönni' nútsë'ë ládjagaquië', en gudélë'ë tu le bululu rizxupi nisa, ate' buxúpinë' le nupi zi, en buzóë' le tu lu gui, ate' butságuië' le ru'ë Jesús para xupë'. ⁴⁹ Ní'irö ia'zíca'rë' bönni' ni' ta'nnë':

—¡Gulözagarö! ¡Uyútsöca'ru' channö huidë' Elías usölë' Lë'!

⁵⁰ Leyúbölö gurödxí'ë zidzaj Jesús, ate' burúajtë bö' naca cazë', gútité'. ⁵¹ La' ná'asö biröza'të lari' nal-la' lu yudo', birúaj choplö, le gudela' icjlö ga bidxintë xiní'i. Ní'irö gudödi budó' zxu', en gula'lá'a guiöj. ⁵² Gula'yalaj yeru ba quégaca nupa chinátigaca, nupa ni' gula'yéajlë' Dios, ate' bulu'bán bönachi na'. ⁵³ Gudödi bubanë' Jesús, bulu'rúajë' bönni' na' yeru ba quégaquië', en gula'yázië' yödzö lá'ayi Jerusalén, ga ni' bila'lé'e bönachi zían légaquië'.

⁵⁴ Ní'irö gúdxinë' bönni' na' rinná bé'enë' bönni' röjáquië' gudil-la, enca' yugu' bönni' röjáquië' gudil-la nacué'lenë' lë' tu'yúë' Jesús, ate' gunné':

—Le nácatë bönni' ni gúquië' Zxí'inë' Dios.

⁵⁵ Zí'tu'sö gula'cuá'anu nigula zían tu'yunu Jesús, nigula na' gula'dálennu Jesús cate' ni' buzë'ë luyú Galilea, ate' gulunnu xichinë', gula'gú'unu le gulahuë'. ⁵⁶ Lësca' María Magdalena, en María, xiná'agaquië' Jacobo, en José, nútsa'gacanu ladjagacanu, ate' zóanu ca' ni' xiná'agaquië' yugu' zxí'inë' Zebedeo.

*Ta'gu'ë Jesús yeru ba le nadaj lë'e guí'a guiöj
(Mr. 15:42-47; Lc. 23:50-56; Jn. 19:38-42)*

⁵⁷ Cate' chiridzö' dza na', bidxinë' José, bönni' Arimatea, tu bönni' rilé'enë' yöl-la' tsahui' queë', en dë'ë ca' Jesús. ⁵⁸ Bönni' ni yöjyúë' Pilato, en gunabë' lataj u'ë Jesús. Ní'irö Pilato gunná bë'ë ulu'nödzjë' queë' Jesús. ⁵⁹ Guzxi'ë José Lë', en buchölinë' Lë' tu lari' nazaca'. ⁶⁰ Ní'irö gulu'ë Lë' lu yeru ba cubi queë' le naguidjë' lë'e guí'a guiöj. Budë'ë tu

guiõj blaga zxõn ga nu riyaza yeru ba na', ate' söhuõjë'. ⁶¹ Gula'cuá'anu María Magdalena, en ia'tunu María ni', rö'gacanu ra' yeru ba na'.

Yugu' bönni' röjáquië' gudil-la tapa chi'ë ba queë' Jesús

⁶² Cate' za' rení' ia'tú dza, gudödi bulu'pë'ë que dza lá'ayi quégaquië' bönni' judío, bulu'dubë' yugu' bixúz unná bë', en yugu' bönni' yudo' fariseo ga zoë' Pilato. ⁶³ Të' Pilato:

—Bönni', röjnetu' bi gunné' bönni' rizí' yë'ë na', cate' ni' zoë' nabanë', gunné': "Cate' gaca tsonna dza ubana' lu yöl-la' guti." ⁶⁴ Que lë ni na' gunná be'e nupa ilún chi'i ba ni' ga idxintë dza bunny, para cabí ídigaquië' bönni' usëda queë' chi'i dzõ'ölö, en ulu'béajë' Lë'. Ní'irö ilë' bönachi: "Bubanë' Jesús lu yöl-la' guti." Channö caní gaca, didza' cabí nácatë ni ilu'ë gúntëro huiá' dö' ca ben didza' cabí nácatë na' gulu'ë zí'alö.

⁶⁵ Pilato gudxë' légaquië':

—Ni nacu'ë bönni' röjáquië' gudil-la. Guli'chë'ë queë'li'. Guli'tséaj, guli'gún chi'i yeru ba na' tsca séqui'li' gunli'.

⁶⁶ Ní'irö yöjáquië' ni', en bulu'sayjë' dxi'a yeru ba na', en bulu'dë'ë lë'e guiõj na' tu le gaca bë' channö isalaj, ate' bulu'cá'anë' ni' bönni' röjáquië' gudil-la ilún chi'ë le.

28

Rubanë' Jesús lu yöl-la' guti

(Mr. 16:1-8; Lc. 24:1-12; Jn. 20:1-10)

¹ Cate' chigudödi dza lá'ayi quégaquië' bönni' judío, en chizá' rení' dza domingo, yöjyúgacanu

María Magdalena en ia'tunu María na' yeru ba queë' Jesús. ² Tsárido'os gudödi budó' zxu'. Caní guca, tu' bötjè' tuë' gubáz lá'ayi queë' Xanru' narúajè' yehua' yubá. Bidxinè' ra' yeru ba na', ate' gudúë' guiöj blaga zxön na', en gurö'ë lu guiöj na'. ³ Nalá' lahui gubáz lá'ayi na' ca yösa bení', ate' zxíla'do'os naca lari' nácuë'. ⁴ Cate' yugu' bönni' na' röjáquië' gudil-la tapa chi'ë yeru ba na' bila'lé'enë' lë', guládxinë', en gula'zxízië'. Gula'dzö'ë lu yu, en guláquië' ca bönni' nati caz. ⁵ Ní'irö gubáz lá'ayi na' gudxè' yugu' nigula na', rnnë':

—Biti' gádxili'. Nözda' ruguíljali'-në' Jesús, bönni' na' bulu'dé'ë lë'e yaga cruz. ⁶ Biti' zoë' ni tu' chibubanë' ca na' chigunná cazë' Lë'. Guli'dá, uyuli' ga ni' gutë' Xanru'. ⁷ Guli'tséaj na'a, guli'tsöjödxi yugu' bönni' usëda queë' chibubanë' Jesús lu yöl-la' guti, ate' na'a Lë cazë' inöruë' loli' saca' luyú Galilea. Ni' ulé'eli'-në'. Chigudxa' libí'ili' le gulu'ë Dios lu na'a.

⁸ Ní'irö la' bulu'zá'tënu ra' yeru ba na', tádxinu, en tu'dzéjanu, ate' carelö söjácanu söjtíxjöi'iguequinu yugu' bönni' usëda queë'. ⁹ Tsanni ni' söjácanu, Jesús yöjtságuië' légacanu, ate' rë' légacanu:

—Padiux.

Ní'irö gula'bíga'nu ga zoë' Jesús, en bulu'nída'nu ni'ë. Gula'yéaj ládxi'gacanu Lë'. ¹⁰ Ní'irö Jesús rë' légacanu:

—Biti' gádxili'. Guli'tséaj, guli'tsöjtíxjöi'i yugu' böcha'a tsöjáquië' saca' luyú Galilea, ate' ni' ulu'lé'enë' neda'.

Le gula'guíxjö'ë yugu' bönni' röjáquië' gudil-la

11 Tsanni ni' sǒjácánu nigula na', yugu' bönni' na' rǒjáquië' gudil-la gulún chi'ë yeru ba na' bulu'dxinë' lu yǒdzǒ ni', ate' gula'guíxjǒi'inë' yugu' bixúz unná bē' yúgu'tē lē na' gulaca. 12 Cate' chibulu'tubē' yugu' bönni' gula tu'zėjni'inë', gulún xtídza'gaquië'. Ní'irǒ bulu'nǒdzjē' dumí zían quégaquië' bönni' na' rǒjáquië' gudil-la. 13 Tē' légaquië':

—Caní innali': "Bila'dxinë' bönni' usēda queë' chi'i dzǒ'ǒlǒ, en bulu'bėjǒ Lē' tsanni ni' rásitu'." 14 Channǒ huayǒnnē' bönni' rinná bē'ē lē ni, netu' uzėjni'itu' lē', en guntu' ga bití' bi gunē' queēli'.

15 Ní'irǒ yugu' bönni' rǒjáquië' gudil-la na' gula'zi'ē dumí na' ate' yǒjéngaquië' ca na' chinazédagaquië'. Caní guca, tu'zē' bönni' judío didza' ni ga ridxintē na'a dza.

Jesús risǒl-lē'ē yugu' bönni' gubáz queë'

(Mr. 16:14-18; Lc. 24:36-49; Jn. 20:19-23)

16 Ní'irǒ idxinéajtē' bönni' usēda queë' Jesús yǒjáquië' luyú Galilea, ate' bila'dxinë' lu guíado' na' chibulu'inë' Jesús légaquië'. 17 Cate' bulu'lé'enē' Jesús, gula'yėj ládxi'gaquië' Lē', pero bal-lē' gulaca chopa ládxi'gaquië'. 18 Ní'irǒ gubígui'ē Jesús ga na' nacu'ē, en rē' légaquië':

—Dios chinudödē' lu na'a yúgu'tē yǒl-la' unná bē' yehua' yubá, en luyú ni. 19 Que lē ni na', guli'tséaj, guli'tsǒjsēdi yúgu'tē bǒnachi idútē yǒdzǒlió. Buli'quíla légaquië' nisa, ugunli' dxin Lē' Dios Xuz, en Lē' Dios Zxí'ini, en Lē' Dios Bǒ' Lá'ayi. 20 Guli'sēdi légaquië' ilunē' yúgu'tē lē na' gunná bē'eda' libí'ili'. Buli'yútsöca', neda' caz zóalena'

libí'ili' yúgu'tè dza ga idxinrö dza údxi que yödzölió.
Ca' gaca.

Didza' cubi rucá'ana tsahui'
**New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022

58bf86df-ae22-508c-81dc-936dbf138c25